

Aposil

Bi Jisas minim dad ameb okok kiri tap tari tari gilak

Luk Tiopilas nop kauyaŋ ñu kil tikak

1 ¹Mam Tiopilas. Yad nep minim ned ñu kil tiknek ak, Jisas nop tik dapek, pobiŋ gil, wög wagin gil mid damil, tap tari tari gil, minim tari tari ag ñil gak ak, nep mij ned ak ñu kil tiknek. ²Kisen, God Jisas nop dad ap ran jak seb kab alaŋ siŋak dad amnak. Pen ne seb kab ar alaŋ siŋak amniŋ gak won ak, ne gek Kaun Siŋ ne minim ne dad ameb ag lak bi okok kirop ag ñi tep gak. Minim nibak magilsek ned ñu kil tikil nep ñinek. ³Jisas kimak pen kauyaŋ warikil, ñin akniŋ ñinjuil omal (40) nab ak ñin koŋai nep misen l'il, minim ne dad ameb bi ne okok eip midil, God bin bi dil kod midenigab minim ak kirop ag ñoligip. Nig gek, kiri udiŋ magil kiri ke niŋlak ne komiŋ midek. ⁴Pen kimil warikil, lim dai ar wagin aul midoligip ñin nab niŋ siŋak, ñin alap bi ne niŋ okok eip tap magil ñiblig gi agak, “Yad nibep ned agnek rek, Bapi yad tap tari nibep ñinigain agak ak, Jerusalem siŋaul nep midil, kod midenimib. ⁵Jon ñig pak ñeb bi ak bin bi kirop ñig ak nep pak ñoligip, pen ñin omal nep ap padikek, Kaun Siŋ ak apil nibep pak ñinigab,” agak.

Jisas ne kariŋ lim seb kab ar alaŋ siŋak ap ran jak amnak

⁶Pen ñin alap Jisas ne bi ne niŋ okok midelak nab siŋak misen lek, nop aglak, “Bi Kib, nak miñi kiŋ cin midek, cin Isrel bin bi kariŋ lim cin aul kauyaŋ ke kod midil, kariŋ lim ognap sek kod midil ginigabiŋ aka?” aglak. ⁷Agelak, kirop agak, “Ñin akal ginigab ak, Bapi gos ne ke niŋil ag lak; tap niŋ mer. ⁸Pen Kaun Siŋ ne nibep apek, niŋi kilis dil amil, Jerusalem bin bi, Judia bin bi, Sameria bin bi, bin bi kariŋ lim tiŋoŋ tiŋoŋ magilsek okok, yad tari tari giŋin ak kirop ag ñinigabiŋ,” agak.

⁹Niŋ agil, bi ne okok niŋ midel niŋlig gi, God nop dad ap ran jak seb kab ar alaŋ siŋak dad amek niŋlig gi, kimi bad alap apil nop kariŋak.

¹⁰Pen ne amek, kiri seb kab alaŋ niŋ midel niŋlig gi, magil nibak nep bi walij tid yimrek omal apil kirop eip warik miderek. ¹¹Bi nib omal agrek, “Bi Galili nib siŋ aul, nibi tari ginig seb kab alaŋ niŋ midebim? Nibi niŋlig gi midem niŋlig gi, God ne gek, Jisas ap ran jak seb kab ar alaŋ siŋak dad amiŋ ak, kisen ne ke akniŋ rek nep adik gi oniŋab,” agrek.

Judas kimak ak Mataias kau ne dak

¹²Olip Dim alaŋ midelak ak kirig gil, Jerusalem adik gi amnilak. Kanib par mer, Olip Dim Jerusalem nib ulep; Juda God nop sobok gep ñin ak ajpal rek nep.^a ¹³Jerusalem amil, kariŋ kineb kiri amjakil, kariŋ ñilik ar alaŋ miŋan ak amnilak. Bi midelak okok: Pita, Jon, Jems, Edru, Pilip, Tomas, Batolomyu, Matyu, Alpias ñi ne Jems ak, Saimon Selot ak, Jems ñi ne Judas ak. ¹⁴Kiri per per mogim gil, God nop sobok göligipal. Jisas nonim Maria ak, Jisas nimam sikop okok, bin ognap sek per niŋ göligipal.

¹⁵Pen ñin nab nib siŋak, bin bi ñinjuil akniŋ kagol oŋid (120) rek ap mogim gel niŋlig gi, Pita warikil kirop agak, ¹⁶“Ai mam sikop niŋim. Kaun Siŋ ne birarik nep Depid nop gos ñek, Judas Jisas nop mimig niŋak bi ak ginigab rek niŋil ñu kil tikek, agak agak rek nep gak. ¹⁷Jisas bi Judas nibak dek, cin eip midil, wög ne ak jim ñil goliŋipin,” agak.

¹⁸Pen kisen ne Jisas nop mimig niŋil, kab magil dak ak damil, lim dai alap tauil, mid damil, ñin nokim alap ap yap pakil, kogi ne ak pawikil, cibur magilsek lim gi söŋ apek kimak. ¹⁹Nig gil kimek, Jerusalem bin bi magilsek niŋil, lim dai tauil kimak nibak, yib Akeldama, aglak. Akeldama aglak minim wagiŋ ak, “Lakañ Yowak Lim Dai,” agil aglak.

²⁰Pita agak, “Depid birarik nep God Minim dai Sam ñu kil tikil agak, ‘Kariŋ ne cög nep midonimiŋ;

bin bi ognap kariŋ ne am ma midenimel,’ agak.

Depid minim alap pen agak,

‘Wög ne ak bi alap dinimiŋ,’ agak.

²¹Agak nibak, bi cin ke alap niŋil dinigabin. Cin Bi Kib Jisas eip tagoliŋipin ak, bi cin eip per tagoliŋip bi alap niŋil dinigabin. ²²Bi cin eip per tagil, Jon Jisas nop ñig pak ñak ak niŋil, mid damil, Jisas kimil warikil seb kab ar alaŋ amnak niŋak bi alap niŋil dinigabin. Bi nibak rek don me, Bi Kib Jisas kimil warikak minim ak ag ñi tep ginigab,” agak.

²³Pita nib agek, bi nak Mataias eip Josep eip kirop mal ag lilak. Pen Josep ñin ognap yib ne alap Basabas, alap Jastas, agöligipal. ²⁴⁻²⁵Bi nib omal kirop nig gil ag lil, God nop sobok gil aglak, “Bi Kib, Judas ned gi timel gil kimil, kariŋ ne midonimiŋ siŋak amnak ak, kau ne ak an dinimiŋ, agil, bi omal aul ag lipin. Nib ak, nak bin bi magilsek gos

^a 1:12 kilomita nokim alap nep rek

niñil gipal rek nipan ak me, nep ag niñobin, nak ke bi ak agek, cin niñil dinigabin,” aglak. ²⁶Nib agil, bi nib omal yir bopis tig gilig gi del, Mataias yib ap ranek, Jisas minim dad ameb aknib agip alaᅇ eip jim ñil, kauyaᅇ bi aknib umigan alaᅇ lak.

Kaun Siᅇ ne owak

2 ¹Bin bi Jisas nop niᅇ dilak okok, Pedikos ñin kib ak miñi, agil, apil karip ñilik migan nokim alap midelak. ²Nig gil midel niᅇlig gi, dai gu kib seb kab ar alaᅇ nib agil, yigen rek dil, karip ñilik migan bisig midelak siᅇak eyaᅇ owak. ³Pen magil nibak nep niᅇlak, mab milaᅇ ñon rek ak apil, pilajikil ke ke pig gi rik amil, bin bi nabic cög ar alaᅇ nokim nokim am midek. ⁴Am midek niᅇlig gi, Kaun Siᅇ apil, kaun kirop nab adaᅇ ap ran jakak niñil kiri minim yib ar ke ke aglak.

⁵Pen ñin nibak, Juda bin bi okok, kiri migan ke ke, karip lim okok nib okok nib apil, Jerusalem mogim gi midelak. Bin bi nib okok kiri God Minim ageb rek niñil, ar nibak rek nep gi midelak. ⁶Gu kib nibak agek niñil, tari geb, agil, bin bi koᅇai nep kasek karip nibak apil niᅇlak, minim yib ar ke ke yipid gil nep agelak. ⁷Kiri niñil, kib gaul gil aglak, “Bin bi siᅇ aul magilsek Galili nib. ⁸Pen titi gil minim yib cin ke ke apin rek yipid gil agebal niñobin? ⁹Cin ognap Padia nib, ognap Midia nib, ognap Ilam nib, ognap Mesopotemia nib, ognap Judia nib, ognap Kapadosia nib, ognap Podas nib, ognap Esia nib, ¹⁰ognap Prijia nib, ognap Pampilia nib, ognap Ijip nib, ognap karip lim Libia, Sairini taun gol okok nib, ognap Rom nib opin. ¹¹Bin bi Rom nib opal okok, ognap Juda bin bi yipid gil, ognap Juda bin bi mer pen miñi Juda bin bi gipal rek ar ak gipal. Ognap Krit nib, ognap Arebia nib opin. Pen cin niᅇ midon niᅇlig gi, minim yib cin ke ke agobin rek yipid gil agil, God ne tap aknib ke yib gip, agil, yib ne agel ar amek, niñobin,” aglak. ¹²Nib agil, gos par niᅇlig gi, pen ag niᅇek, pen ag niᅇek gil aglak, “Ke yib geb nibak tari ginig geb,” agil, gos par yib niᅇlak.

¹³Bin bi ognap pen kiri ñiñiloᅇ lil aglak, “Ak ñig wain koᅇai nep ñibil, saköl ñagip agebal,” aglak.

Pita minim ag ñak

¹⁴Pen Pita bi Jisas minim dad ameb bi aknib agip alaᅇ eip warikil, meg miᅇan dap ranil, bin bi koᅇai nep midelak okok kirop agak, “Nibi Juda bin bi cin abe, nibi bin bi Jerusalem siᅇaul kin midebim okok abe, siᅇaul tari gosip ak yad nibep minim agniᅇ gebin aul niᅇ tep ginimib. ¹⁵Nibi ognap agebim, ‘Bi siᅇ aul ñig wain koᅇai nep ñibil, saköl ñagip agebal,’ agebim ak, pen kiri ñig wain ñibel saköl ma ñagip. Miñi pib kisen nep aposip won ak nep me. ¹⁶Pen minim yib ke ke agebal niᅇebim nibaul, bi God minim agep Joel birarik nep agil ñu kil tikak rek nep geb me ak. Ne minim nibak ñu kil tikil agak,

- 17 ‘God ageb, “Ñin kisen ak,
 bin bi magilsek okok kirop Kaun yad soŋ gi yoknigain.
 Ñi pai nibi okok God minim ne ak bin bi okok kirop ag ñinigal.
 Bi praj nibi okok dai niŋnigal.
 Bi pobiŋ nibi okok wisin niŋnigal.
- 18 Ñin nibak, wög gi ñeb bin bi yad okok, bin okok abe bi okok abe,
 kirop Kaun yad soŋ gi yoken, minim tep yad ak bin bi okok kirop
 ag ñinigal.
- 19 Pen yad seb kab ar alaŋ tap ke ma gep rek ognap gil,
 lim dai ar wagin aul tap niŋep ma niŋep ke nib ognap ginigain.
 Lakañ gil, mab yinil, sikim adpil kib gil ginigab.
- 20 Piŋ melik ma ginigab;
 takin lakañ sek linigab.
 Niŋ genigab, kisen ñin aknib ke nib misenŋ linigab.
 Bi Kib melik tep aknib ke sek onigab.
- 21 Pen bin bi an an, Bi Kib yip di komiŋ yokaŋ, agil, ag niŋnigal okok,
 kirop di komiŋ yoknigab,” agak.
- 22 Pita ne Joel ñu kil tikak minim nibak ag dai juil agak, “Nibi Isrel
 bin bi, minim agniŋ gebin aul niŋ rep ginimib. Jisas bi Nasaret nib ak
 bi yokop mer; God ne ke nop ag yokek owak. Ñi yad ak ag yoken, tap
 ma gep rek koŋai nep gil, tap niŋep ma niŋep koŋai nep gil ginigab nab
 kirop siŋak niŋil, bi nibak God ne ke ag yokek owak ak niŋlaŋ, agil, nop
 ag yokek owak. Jisas ne tap ma gep rek nab nibi siŋak gak ak, nibi ke
 bir nipim. ²³God nibi ginigabim rek ned niŋil, Jisas nop di ñinmagil ar
 nibep ak lek, nibi dam bin bi tap si tap timel gipal okok kirop ñem, nop
 mab kros bak alaŋ ñag pak lel kimak. ²⁴Ne yur kib yib dil kimak ak pen
 pis nep cip tigel siŋak midil, ki gi yap pak amnimiŋ rek ma lak. God gek
 kauyaŋ warikak. ²⁵Depid pen birarik nep Jisas nop minim ñu kil tikil
 agak,
 ‘Yad nipin, Bi Kib yad eip per per mideb.
 Ne ñinmagil yipid yad pis ken mideb ak me, yad ma piriknigain.
- 26 Niŋ gip ak, cibur midmagil yad pis geb niŋil yad miñ miñ yib gil
 agebin.
 Miŋ goŋ yad kimniŋ geb pen gos sek midil ma piriknigain.
- 27 Ti ginig? Nak yip cip tigel migan ma kirig ginigan.
 Nak Bi Siŋ nak kirig gek, miŋ goŋ ne ki gi yap pak ma amnigab.
- 28 Nak yip komiŋ midep kanib ak yomnak.
 Yad nak eip midil, miñ miñ yib ginigain,’ agak,” agak.
- 29 Pita Depid agak minim nibak ag juil agak, “Ai mam sikop, yad nibep
 minim yipid gil agen, niŋ tep ginigabim. Based acik Depid kimek tigel
 gilak kau migan ak mideb; kau migan nibak miñi cin ak rek nep nipin.
- 30 Pen Depid ne God minim agep bi alap midoligip ak me, ne niŋak, God

birarik nep minim ag lil agak, ‘Nak ñi tiknigan tik damil tik linigal ñi alap ne kau nep dil, kiñ midenigab,’ agak. ³¹Depid tap kisen ginigab ak niñil, Mesaia ak^b ne kimil wariknigab, agil, agak, ‘Nop cip tigel migan ma kirig gak. Mib goñ ne ki gi yap pak ma amnak,’ agak.

³²“Miñi God gek, Jisas ne warikil komiñ mideb. Ne komiñ mideb ak cin magilsek udin magil cin ke nipin. ³³God Jisas nop dam ñinmagil yipid pis ar ne ak lak. Lil, ne Kaun Siñ ñinigain, agil agak ak, Jisas nop ñek, ne pen cinop ñek, apil gu kib agek, cin minim ke ke agosin siñaul nibi ke niñebim. ³⁴Pen Depid minim agak nibak, ne ke ma agak. Depid ne lim dai ar wagin aul midil, seb kab ar alañ ma amnak. Pen ne agak,

‘Bi Kib ne Bi Kib yad ak nop agak,

“Ñinmagil yipid yad pis ar bisig midenimin;

³⁵yad gen kausal maual nak okok,

talak migan nak okok midenigal,” agak,’ agak.

³⁶“Nib ak, nibi Isrel bin bi magilsek niñ rep ginimib: Jisas bi mab bak alañ ñag pak lem kimak bi nibak nep, God gek Bi Kib yib mideb. Ne nep Mesaia per kod midoligipin me ak,” agak.

³⁷Pita minim nibak agek, bin bi niñ midelak okok niñel ñaul amnak. Niñ gek, kiri Pita abe, Jisas minim dad ameb bi okok abe, ag niñil aglak, “Nib ak, mam sikop, cin miñi tari gin?” aglak.

³⁸Agelak, Pita agak, “Nibi nokim nokim magilsek midebim rek, tap si tap timel gipim ar ak, tari ginig nig gipin, agil, kirig gil, Jisas Krais nop niñ dil, ñig paknimib. Niñ genigabim, God tap si tap timel gipim ak niñil kirig gil, Kaun Siñ ne ak nibep ñinigab. ³⁹God birarik nep agak, ‘Yad Kaun yad nibep Isrel bin bi ñil, ñi pai nibi tik donigabim okok kirop ñil, bin bi par okok kirop abe ñil ginigain,’ agak. Nib ak, cin nipin, God bin bi an an olañ, agnigab okok, kirop magilsek Kaun Siñ ak ñinigab,” agak. ⁴⁰Pita kirop yimig niñil, minim koñai nep agil agak, “Bin bi miñi midebal ognap abramek gi timel gipal rek, nibi kirig gil, mid tep ginimib. Mer ak, yur kib dinigabim,” agak. ⁴¹Bin bi koñai nep Pita minim agak ak niñil, Jisas Krais nop niñ dil, ñig paklak. Ñin nibak nep, bin bi tri tausan (3000) rek Jisas Krais nop niñ dil, Jisas bin bi ne eip jim ñil midelak.

⁴²Nib ak, kiri per per apil, bi Jisas minim dad ameb okok eip jim ñil midil, God Minim ag ñelak ak niñ tep gin, agil, ag amil apil gilig gi, bred ti pañil jim ñil ñiblig gi, God nop sobok gilig gi mideligipal.

Jisas bin bi ne okok göligipal rek

⁴³God bi Jisas minim dad ameb okok kirop kilis ñek, tap ma gep rek koñai nep gil, tap niñep ma niñep koñai nep gil gel, bin bi okok niñil,

^b 2:31 Grik minim “Krais ak” abe, Hibru minim “Mesaia ak” abe wagin nokim alap nep mideb: “God ag lak Bi ak.”

kib gaul gilak. ⁴⁴Bin bi Jisas nop niņ dilak okok, jim ñil midil, bin bi tap ma midek okok, bin bi ognap kirop tap abramek bilok ñilak. ⁴⁵Lim dai, tap okok ak rek nep sikim gil, mani dil, bin bi tap ma midek okok kirop nonim li ñilak. ⁴⁶Kiri per per, ñin nokim nokim, God sobok gep karip ak am mogim göligipal. Pen karip kiri okok ak rek nep am mogim gil, bred ti paņil, midmagil ar nokim lilig gi, miñ miñ gilig gi, tap jim ñil ñibeligipal. ⁴⁷Pen bin bi midelak okok magilsek, Jisas niņ dilak bin bi kirop niņel, tep gak. Per per, ñin nokim nokim, Bi Kib ne bin bi ognap sek di komiņ yokek, kiri Jisas nop niņ dil, apil Jisas bin bi ne ned nib okok eip nab sakil mideligipal.

Bi tob timel gak ak, Pita gek, komiņ lak

3 ¹⁻³Praj nonim tik dowak ñin ak nep tob timel gak alap, nop ñin nokim nokim per per dapil, God sobok gep karip kijoņ wagin, Kijoņ Kil Tep, apal ak, gol siņak lel bisig midoligip. Midlig gi, bin bi God sobok gep karip ñilik miņan ap ameliligipal okok, kirop mani tap yip alap ñim, agil asib goligip.

Pen minek alap, Pita eip, Jon eip piņ kim gak digep won ak, God nop sobok gep won ak, God nop sobok ginig, ap padiker niņlig gi, bi tob timel gak nibak kirop mal niņil agak, “Yip mani ognap ñir,” agak. ⁴Agek, kiri mal nop niņ i sek li midil, Pita agak, “Cirop mal niņan!” agak. ⁵Agek, yip tap alap ñinig gebir, agil, kirop mal niņ midek niņlig gi, ⁶Pita agak, “Mani silpa, mani gol, yad ma mideb ak pen tap yad nokim alap mideb ak nep ñinigain. Jisas Krai Nasaret nib ak, yib ne agil nep agebin, ‘Warik amnoņ!’ ” agak. ⁷Pita nib agil, ñinmagil yipid pis kid nop dil, di warik ñek niņlig gi, magil nibak nep tob abe, tob gol abe tep gak. ⁸Tep gek, kasek warik amlig gi, talak talak gilig gi, God nop tep aglig gi, kiri mal eip God sobok gep karip ñilik miņan ak amnak. ⁹God nop tep, agil, tob taulig gi ajek ak, bin bi midelak okok niņil, ¹⁰bi tob timel per apil, God sobok gep karip kijoņ wagin, Kijoņ Kil Tep, apal ak, gol siņak bisig midil, mani tap okok asib agoligip bi nibak, titi gil tob yib taulig gi apeb, agil, kiri gos par niņil kib gaul gilak.

Pita minim ag ñak

¹¹Bi nibak ne, God sobok gep karip mis ken, Solomon Karip Badak, apal, miņan ak midil, Pita eip, Jon eip kirop mal nab nab lil di midek niņlig gi, bin bi magilsek kib gaul gilig gi, pig gi rikid ag apelak. ¹²Bin bi apelak, Pita ne niņil agak, “Isrel bin bi siņ aul, nibi tari ginig gos par niņil cirop bi mal niņ i sek lebiņ? ‘Cir mal bi kilis, bi tep midil gesir, bi nibaul kanib tag tep geb,’ agil, gos ak niņebim ar? Ak mer. ¹³Ebrahim, Aisak, Jekop, based acik cin sikop okok sobok göligipal, God nibak nep ne ke gek, bi wög gi ñeb ne Jisas warikek, bin bi okok niņil, ne melik

tep aknib ke sek mideb, agil, nival. Nibi pen Jisas nop ma dipek. Pailot, Jisas nop wisib yokin, agak ak pen nibi ke, nop dam mab bak alaŋ ñag pak lilaŋ, apek. ¹⁴Jisas ne Bi Siŋ; ne Bi Komiŋ Tep per nep God ageb rek nep geb. Pen nibi apek, Jisas ne bi niŋeb cin mer, bi cip ñagoligip bi ak cinop wisib yokan, apek. ¹⁵Ñig gil, Bi komiŋ midep magil ñeb Bi ak nop ñag pak lipek. Pen God gek, ne warikak ak, cin udiŋ magil cin ke niŋil agobir. ¹⁶Bi tob timel per niŋim aul, miŋi komiŋ losip niŋim. Jisas kilis ne gek me, komiŋ lip. Jisas niŋ dil, yib ne agor, ne gek pis nep komiŋ lip.

¹⁷“Pen midemam yad siŋaul. Nibi ke abe, bi kib nibi okok abe, sakil sek midil, Jisas nop nig gipek. ¹⁸Pen God ne bi minim ne agep okok kirop birarik nep gos ñek aglak, ‘Kisen God Mesaia ne yur kib yib dil kimnigab,’ aglak ak me, aglak rek nep gipek. ¹⁹Nib ak, tap si tap timel gipim ak, tari ginig nig gipin, agil, kirig gil, God nop adik gi apem, ne tap si tap timel gipim acir ak lig gi yoknigab. ²⁰Ñig gem, Bi Kib ne kaun nibep nab adaŋ kilis ne ñil, Krais ak nibep birarik nep ag lak ak ag yoknigab. Krais ak Jisas. ²¹God ne birarik nep agek, bi minim agep siŋ ne okok aglak rek, Jisas ne karip lim seb kab ar alaŋ siŋak mideb rek midenigab niŋlig gi, God tap magilsek kauyaŋ gi li rep ginigab ñin ak onigab. ²²Mosis agak, ‘Kisen Bi Kib God nibi, ne bi minim agep yad rek, bi wagin nibi ke alap, ag yoknigab. Ne apil, minim agnigab ak magilsek niŋ tep ginimib. ²³Bin bi minim ne ma diŋigal okok, bin bi ne ma midenigal; kiri pis nep sön ar eyaŋ amil, kimnigal,’ agak.

²⁴“Bi God minim agep Samyuel abe, bi God minim agep kisen olak okok abe, magilsek tap miŋi miseŋ leb niŋobin ak, bir ag ñilak. ²⁵God birarik nep nased acik nibi minim ag lak ak, nibi ke tap ame debim me ak. God based Ebrahim nop ginigain, agil, minim ag lak. Minim ag lil agak, ‘Ñi pai nak tikek, kiri tik dam dapil gil tiknigal okok, bi alap midil me, ne gek bin bi okok magilsek miŋ miŋ ginigal,’ agak. ²⁶Pen God Bi Wög Gi Ñeb ne Jisas karip lim wagin aul ag yokak ak, nibep nep nen agil, ned ag yokek owak. Isrel bin bi tap si timel timel yib gipal ak, tari ginig nig gipin, agil, ar nibak kirig gil, mid tep gilaŋ, agil, nibep Isrel bin bi siŋ aul ned ag yokek owak,” agak.

Pita eip Jon eip kirop minim kib aglak

4 ¹Pita eip, Jon eip bin bi kirop minim ag ñerek niŋlig gi, bi God nop tap sobok gep bi okok abe, God sobok gep karip polisman bi nabic kiri ak abe, bi Sadyusi okok abe, amil minim agelak nibak peyig niŋlak. ²Jisas kimil warikak rek, bin bi Jisas nop niŋ diŋigal okok ak rek nep kimil wariknigal minim ak, tari ginig nib ag ñebir, agel, milik yowak. ³Nib ak, kiri Pita eip Jon eip di cici lil, miŋi diŋep magil aul mer, tol minim kib agnigabin, agil, kirop mal dam miŋ lilak. ⁴Pen Pita Jon bi omal minim tep nibak ag ñerek, bin bi niŋil, koŋai yib niŋ dilak. Nib ak, bin bi Jisas niŋ dilak okok aknib paip tausan (5000) rek amnak.

⁵Pen minek, Juda bi kib karip lim nibak kod mideligipal okok abe, bi minim tig bilokep okok abe, bi lo minim ag ñeb bi okok abe, Jerusalem sijak ap mogim gilak. ⁶God nop tap sobok gep bi kib yib Anas eip, Kaiapas eip, yakam kiri bi Jon ak, Aleksada ak, bi yakam kiri ognap sek apil, nab nib sijak midelak. ⁷Kiri mogim gil agel, Pita Jon kirop mal poŋ dil dap nab sijak lel, kirop mal ag niñil aglak, “Bi tob timel gak ak titi gi gesir komiñ lip? Kilis akal nib dil, yib tari agil, nig gipir?” aglak. ⁸Agelak, Kaun Siñ ne am Pita nab adañ ap ran jakek niñlig gi, Pita agak, “Nibi Juda bi kib abe, bi minim tig bilokep abe, minim agebin aul niñim. ⁹Bi yim gep tob timel gak ak cir gor komiñ lak ak niñil, ‘Niri titi gi gesir komiñ lip?’ agil, cirop minim kib agebim ar? ¹⁰Nib ak, nibi minim agniñ gebin aul niñ tep ginimib. Isrel bin bi okok magilsek ak rek nep niñ tep ginimel. Jisas Kraiss bi Nasaret nib, cir yib ne ak nep niñ dil, yib ne agor, ne gek, bi nibaul nop pis nep komiñ lek, tag tep geb niñebim. Nibi Jisas Kraiss nop mab bak alaŋ ñag pak lipek ak pen God gek kauyañ warikak. ¹¹Bi Jisas nibak nop gos niñlig gi me, God Minim ñu kil tikil aglak, ‘Nibi bi karip gep okok, kab par alap, ak kab timel, agil, kirig gipek ak,

miñi karip sap nab eyañ piñil ñil mideb,’ aglak.

¹²God ne Jisas yib ne nep cinop agak niñil Jisas ne nep cinop di komiñ yokniñ rek lip. Lim dai ar wagin aul bi ke nib alap cinop di komiñ yokniñ rek ma lip, mer yib,” agak.

¹³Pita Jon kiri bi omal warikil, ma pirikil, abramek yipid gil nep agrek ak, bi kib nib okok niñil, wal yib agil aglak, “Bi omal aul kiri skul ma agrek ak pen kiri Jisas eip midil nig gil gebir,” aglak. ¹⁴Bi tob timel gak komiñ lak ak nab kiri sijak midek niñlig gi, kirop mal minim ag ginimel rek ma lak. ¹⁵Nib ak me, kiri aglak, “Kansol karip aul sön eyañ am midenimir,” aglak. Sön eyañ am mider niñlig gi, kiri ke ag niñ ag niñ gil aglak, ¹⁶“Bi omal aul cin tari gin? Kiri tap ma gep rek ak ger, Jerusalem bin bi magilsek bir nipal. Nib ak, kiri mal tap ma gep rek alap ma gipir agjin rek ma lip. ¹⁷Pen kiri amil, minim nibak bin bi tigoñ ognap ager, kiri ak rek nep niñnimel rek lip. Nig gip ak, cin kirop mal minim kilis agil agin, ‘Jisas yib ne ak kisen bin bi ognap ma agnimir, mer yib,’ agin,” aglak.

¹⁸Nib agil, kirop mal agel aperek aglak, “Jisas yib ak kisen ma agnimir; bin bi ognap Jisas minim ak ma ag ñinimir, mer yib,” aglak. ¹⁹Nib agelak, Pita Jon kiri pen pe agrek, “Cir God minim nop ak kirig gil, minim nibep ak dor, God nop tep ginigab aka mer? Nibi ke niñim. ²⁰Pen Jisas tari tari gak, minim tari tari agak ak, cir bin bi okok kirop ag ñi kirig gijir rek ma lip,” agrek.

²¹⁻²²Nib agerek, Kansol bi kib okok gos kiri ke niñil, ‘Bi aul mi ñinjuil omal (40) midil, miñi komiñ lip aul, bin bi okok niñil magilsek God nop

tep agebal. Cin bi nib omal aul kirop tap alap genigabin ak, bin bi siñ aul kal onigal,' agil, kirop mal yokop minim kilis agil, ag sönj yoklak.

Bin bi Jisas nop niñ dilak okok God nop sobok gilak

²³Pita Jon kirop mal nig gil ag sönj yokel, kiri am Jisas bin bi ne okok kirop niñil, bi God nop tap sobok gep bi kib okok abe, bi minim tig bilokep okok abe, minim tari tari aglak ak kirop ag ñirek. ²⁴Ag ñerek, kiri niñil magilsek God nop sobok gil aglak, "Nak Bi Kib nokim nep mideban. Nak seb kab ar alañ gi lil, lim dai wagin aul gi lil, ñig solwara gi lil, tap tari tari mideb okok magilsek gi lil, gi linak. ²⁵Birarik nep nak gek, Kaun Siñ ne based cin Depid nop gos ñek, minim nep ak agil agak, 'Juda bin bi mer okok kiri tari ginig kal jupal?

Bin bi okok tari ginig gos niñ tep gil mer,
minim ar nokim ag lil mimig minim apal?

²⁶Kiñ karip lim ke ke kod midebal okok abe,
gapman bi kib karip lim ke ke kod midebal okok abe,
minim ag ar nokim lil apal,

"God Bi Kib eip, Mesaia ne eip, kirop eip pen pen gin," apal,'
agak.

²⁷Kiñ Herod abe, gapman bi kib Podias Pailot abe, Juda bin bi mer okok ognap abe, Isrel bin bi siñ aul nib ognap abe, Jerusalem aul apil, Bi Wög Gi Ñeb siñ nak ak Jisas, Mesaia ag linak ak nep, minim ag ar nokim lilak.

²⁸Pen nak Bi kilis, ned gos nak ke niñil agnak, Krais nop nig nig ginigal agnak ak me, kiri nig ginimel rek lak; yokop ak kilis kiri ma midobkop.

²⁹Bi Kib, miñi cinop minim kilis timel yib agebal ak nak gos niñnimin.

Cinop bin bi wög gi ñeb nak kod midil, kilis nak cinop ñek, cin ma pirikil, kilis yib gil minim nak bin bi okok kirop miseñ ag ñin. ³⁰Bin bi tap gip okok, nak gek, cin Bi Wög Gi Ñeb siñ nak Jisas yib ne agon, kirop komiñ linimiñ. Nak gek, cin Jisas yib ne agon, tap ma gep rek ognap, tap niñep ma niñep rek ognap gin," aglak.

³¹Pen kiri God nop nig gi sobok gilig gi midel niñlig gi, karip midelak ak monmon rek dil, Kaun Siñ ne apil nab kirop adañ ap ran jakek, ma pirikil, God Minim ak kilis yib gil ag ñilak.

Jisas bin bi ne tap nonim li ñi tep gilak

³²Pen bin bi Jisas nop niñ dilak nib okok, minim ar nokim agil, gos ar nokim niñil, tap kiri tap tari midek okok, tap kiri jim ñil nep midek, tap cin ausek, agil ma niñlak. ³³Bi Jisas minim dad ameb okok, bin bi okok kirop minim kilis gi agil ageligipal, "Jisas nop ñag pak lel, kimil warikak, nop uñin cin ke niñnok," agöligipal niñil God kirop magilsek yimig yib niñil di tep yib gologip. ³⁴Kirop bi ognap tap ulep gi ma midek; magilsek tap midek. Bin bi lim dai aka karip ognap midek okok, sikim gi mani dil,

³⁵bi Jisas minim dad ameb okok kirop ñöligipal. Kiri pen dil, bin bi tap ma midek okok kirop nonim li ñöligipal.

³⁶Pen bi Lipai wagin tik damil tiklak bi alap yib ne Josep. Karip lim ne Saipras nib. Bi nibak ne bin bi ognap kirop minim sain agil ag ñi rep gek, kiri niñil gos sek mideligipal rek, bi Jisas minim dad ameb okok nop Banabas aglak. ³⁷Josep lim dai ne alap agek, bin bi ognap taulak niñil mani nibak dad apil bi Jisas minim dad ameb okok kirop ñak.

Ananaias ber tom agrek

5 ¹Pen bi ber alap miderek. Nigmil yib ne ak Ananaias, bin ne yib ne ak Sapaira. Ber mal kiri lim dai kiri alap ager taulak. ²Tauel, Ananaias ne mani nibak pis kid kiri ke nonim lil, pis kid dam Jisas minim dad ameb bi okok kirop ñak. Bine abe niñak.

³Pen Ananaias mani nibak nig gil dap ñek, Pita agak, “Ananaias, Seten nep gos ñek, nak tom agil agesan, ‘Lim taupal mani magilsek dapebin aul,’ agesan. Minim esek agesan nibak, Kaun Siñ nop ak rek nep esek agesan. Mani lim dai taupal nibak pis kid we gil opan. ⁴Lim dai nibak, lim dai nak. Sikim ginig, sikim gipnap; kirig ginig, kirig gipnap. Pen lim sikim gek, mani taulak nibak, magilsek donig, magilsek dopnap; ognap nep donig, ognap nep dopnap; magilsek karip nak siñak kirig onig, kirig opnap. Minim ma midobkop. Pen nak minim wai ñesan ak, cinop bi nep minim wai ma ñesan; God nop ak rek nep minim wai ñesan. Nak ti ginig nig gesan?” agak.

⁵Pita nib agek, Ananaias niñil, won nibak nep ap yap lim eyañ pakil pis nep kimak. Nig gek niñlig gi, bin bi okok gak nibak niñil, jel gek piriklak.

⁶Pen bi praj okok apil, cip se par ak walij kom kam gil, dam tigel gilak.

⁷⁻⁸Pen bine, nigmil ne kimek dam tigel gilak ak ma niñak. Ne yokop ulep won alap midil apjakek, Pita nop agak, “Lim dai niri ber ak sikim girek, mani nig aknib rek nep taulak aka?” agak.

Agek, bine agak, “Taulak ak dowip me ak,” agak.

⁹Agek, Pita nop agak, “Niri ber tari ginig minim ag ar nokim lil nig gipir? Bi Kib Kaun ne minim esek nibak ma niñnigab, agil, nig gipir? Niñan! Nagimil kimosip, dam tigel gipal bi okok midebal kijon wagin siñaul. Nep ak rek nep dad amnig gebal,” agak.

¹⁰Nib agek niñlig gi, magil nibak nep, Pita tob wagin siñak ap yap lim eyañ pakil kimak. Bi praj ñon nigmil nop dam tigel gilak nibak apil, bine ak rek nep bir pis nep kimak ak niñil, nop dam nigmil nop tigel gilak pis kid tigel gilak. ¹¹Krais nop niñ dilak bin bi okok abe, bin bi ognap okok abe, tap gak nibak niñil, magilsek jel gek piriklak.

Tap ma gep rek ognap ke ke gilak

¹²Bi Jisas minim dad ameb aknib umigan alañ tap ma gep rek konai nep bin bi midelak nab siñak gi midelak. Pen bin bi God Minim niñ dil Krais

nop niŋ dilak okok, maŋilsek ap mogim göligipal God sobok gep karip sön ar “Solomon Karip Badak” apal ak. ¹³Bin bi ognap okok, Kraiss nop niŋ dilak bin bi okok kirop niŋel, tep gak ak pen, Kraiss bin bi ne midebal okok, cin titi gił am kirop eip mogim gin, ag gos niŋil, piriklak. ¹⁴Pen per per bin bi kisen nib koŋai yib nep, Bi Kib nop niŋ dil, bin bi ned nib okok eip ap jim nil mogim göligipal. ¹⁵Jerusalem bin bi, bi Jisas minim dad ameb okok gilak rek niŋil, bin bi miñak gak okok dap kanib kib gol siŋak lil, mij par miŋan miŋan lil aglak, “Pita padikek, piŋ mimtaŋ ne ak kirop pak ñek, kirop komiŋ liniŋab,” aglak. ¹⁶Bin bi maŋ karip lim Jerusalem ulep siŋak midelak okok, ak rek nep bin bi tap gak okok dil, bin bi kijeki kiyob nilik sek midelak okok dil, dolak. Dapelak, kirop gel, maŋilsek komiŋ lak.

Jisas minim dad ameb bi okok kirop gi timel gił miñ lilak

¹⁷Niŋ gelak, bi God nop tap sobok gep bi kib yib ak abe, bi niŋeb ne bi Sadyusi okok abe, bi Jisas minim dad ameb okok kiri tap ma gep rek nig gel yib cinop ap yoniŋab, agil, bi okok kirop niŋel milik yowak. ¹⁸Kirop milik yapek, bi Jisas minim dad ameb okok kirop tig cici lil, dam gapman kai kirop ñel, miñ lilak. ¹⁹Miñ lilak ak, pen ñin nibak nep kislim eyaŋ, Bi Kib agek, ejol alap apił, kijoŋ ak yikil, kirop poŋ dad sön amnilak. ²⁰Sön amel, ejol agak, “Niŋi God sobok gep karip ak amił, bin bi okok kirop, God gek per per komiŋ mideniŋal minim tep ak maŋilsek ag ñi tep ginimib,” agak.

²¹Agek, miñab tikak niŋlig gi, God sobok gep karip ak amił, ejol ak agak rek, bin bi okok kirop wagin gił minim ag nilak. Niŋ gił ag nil niŋlig gi, God nop tap sobok gep bi kib yib ak abe, bi niŋeb ne okok abe apjakil, bi minim di bilokep okok kirop maŋilsek sik agel, ap Kansol kib ak mogim gel, bi God sobok gep karip kod midep bi okok ag yokil aglak, “Bi Jisas minim dad ameb okok miñ lipin ak miñi am ulik gi dowim,” aglak. ²²Agelak, bi God sobok gep karip kod midelak bi okok miñ lep karip ak amił niŋlak, bi Jisas minim dad ameb okok ma midelak. Kiri adik gi apił aglak, ²³“Cin am niŋin, kijoŋ ak giñlak rek midosiŋ, bi kod midep bi okok ak rek nep kijoŋ wagin ak niŋ midesal ak pen cin kijoŋ yikil, karip nilik miŋan eyaŋ amił niŋin, bi alap ma midosiŋ yib,” aglak. ²⁴Nib agelak, bi God sobok gep karip kod midelak bi kib kiri ak abe, God nop tap sobok gep bi kib okok abe, minim nibak niŋil, nig giŋ tari ginigab, agil, gos par yib niŋlak.

²⁵Niŋ gił gos par niŋ midel niŋlig gi, bi alap apił kirop agak, “Bi miñ lipek okok, kiri am God sobok gep karip ak midlig gi, bin bi okok kirop minim ag ñebal,” agak. ²⁶Nib agek, bi God sobok gep karip kod midelak bi kib kiri ak, bi ne ognap kirop ulik gił, bi Jisas minim dad ameb nib okok kirop diniŋ amnilak. Amił, Jerusalem bin bi siŋ aul cinop kab ju paknigal, agil, kirop ma ag gilak; kapkap ulik gi dolak.

²⁷Jisas minim dad ameb bi okok kirop kapkap ulik gi Kansol ap mogim gi midelak nab siñak dapel, God nop tap sobok gep bi kib yib ak kirop agak, ²⁸“Cin nibep, Jisas minim ak ma agnimib, agil, minim kilis gi agil apin ak pen ag mer niñil kirig gipin. Nibi pen amil Jerusalem bin bi kirop magilsek Jisas minim ak ag ñilig gi, cinop ag juil agebim, ‘Kiri nep Jisas nop ñag pak lilak,’ agebim,” agak.

²⁹Nib agek, Pita bi Jisas minim dad ameb ognap eip aglak, “Cin bin bi minim apal ak ma dinigabin; God minim ne ak nep ñinigabin! ³⁰Jisas nop mab bak alañ ñag pak lem kimak ak pen, apis based sikop sobok göligipal God ak nep gek, ne kauyañ warikak. ³¹Warikil, God ne gek, am karip lim seb kab ar alañ siñak amil, God ñinmagil yipid pis ken mideb. Nib ak cin nipin, ne nep Kiñ midil, cinop di komiñ yoknigab. Ne cinop Isrel bin bi yimig niñil, tap si tap timel gipin ak, tari ginig nig gipin, agil, kirig gon, ne niñil tap timel gipin okok kirig gil, cinop di komiñ yoknigab. ³²God gip nibak, cin uñin magil timid migan cin ke niñil, bin bi okok kirop ag ñobin. Bin bi minim ne niñ dil ageb rek nep ginigal okok, God ne Kaun Siñ ak kirop ñek, ne kirop ak rek nep minim tep nibak ag ñi tep gek niñnigal,” aglak.

³³Bi Jisas minim dad ameb okok nib agegak, bi minim di bilokep ap mogim gi midelak nib okok kal juil aglak, “Kirop pis nep ñag pak lin,” aglak. ³⁴Nib aglak ak pen, nab nib siñak bi alap midek, yib ne ak Gameliel. Ne bi Perisi, lo minim ag ñeb bi kiri alap. Juda bin bi magilsek nop niñel tep goligip. Bi Gameliel nibak warikil agak, “Bi ñon nibaul kirop agem sön amnilañ. Yad nibep minim alap ag ñin,” agak. Nib agek, bi nib okok ag sön yoklak. ³⁵Bi nib okok ag sön yokel niñlig gi, Gameliel ne bi Kansol okok kirop agak, “Isrel bi siñ aul, nibi bi siñ aul kirop tari ginig gebim ak, gos niñ tep gil ginimib. ³⁶Nibi nipim, ned bi Tudas, yad bi kib, agil agek, minim ne agoligip ak bin bi koñai nep, po hadred rek, niñ döligipal. Pen kisen bi ognap nop ñag pak lel, bin bi minim nop niñ döligipal okok ke ke amel kir gak. ³⁷Pen kisen, yib cinop dilak ñin ak, ak rek nep bi Judas Galili nib ak agak, ‘Cin gapman okok eip pen pen gil, kirop yik gi yoknigabin,’ agak. Nib agek, bin bi koñai nep minim nop dil, warik gapman eip pen pen gilak. Pen mid damil, bi nibak nop ak rek nep ñag pak lel, bin bi minim nop niñ döligipal okok ke ke amel kir gak. ³⁸Nib ak me, yad nibep agebin, bi minim kib agobin siñ aul kirop gi timel ma ginimib. Kirop yokop ag yokem amnimel. Minim kiri ke nep agenigal ak, kib ginimij ag mer niñil ap yonigab. ³⁹Pen God ne ke agek genigal ak, nibi ke nep tap alap ginimib rek ma linigab. Kirop gi timel gin, agenigabim ak, kirop eip pen pen ma ginigabim; God eip pen pen ginigabim,” agak.

⁴⁰Gameliel nib agek, bi okok agak rek niñil, bi Jisas minim dad ameb okok kirop agel apelak, kirop nag di tapin magil pa gis pakil, “Jisas minim ak kisen ma agnimib, mer yib,” agil, kirop ag yokel amnilak.

⁴¹Pen bi Jisas minim dad ameb okok, cinop tari ginig nig gipal, agil, ma niñlak. God cinop Jisas bi ne yipid gil, agil gek, cinop nig gipal, agil, tep gek niñlig gi, Kansol kib nibak kirig gil amnilak. ⁴²Amil, per per God sobok gep karip sön ar siñak amil, bin bi karip karip okok amil, Jisas ne Kraiss ak minim tep ak ag ñöligipal.

Tap bilok ñeb bi akñib ar oñid ag lilak

6 ¹Pen mid damil, bin bi Jisas nop niñ dilak okok koñai yib midelak. Pen Juda bin bi Grik minim nep niñlak okok, Juda bin bi kiri Juda minim yipid gil niñlak okok kirop ag gil aglak, “Bin kañil kiri okok kirop mani tap magil tap okok nonim li ñi tep gipal pen bin kañil cin okok kirop nonim li tep ma gipal,” aglak. ²Nib agelak, bi Jisas minim dad ameb akñib umigan alañ okok niñil, bin bi Jisas niñ dilak okok magilsek sik agel apelak aglak, “Ai mam sikop. Cin God Minim ag ñobin ak kirig gil, bin bi okok kirop tap nonim li ñinigabin ak, yipid gil ma ginigab. ³Nib ak, nibi bi akñib ar oñid niñil ag lem, kirop wög nibak ag lon, wög nibak ginigal. Pen God Kaun kirop ap ran jakil gos tep ñib bi okok nep niñil ag linimib. ⁴Cin pen God nop sobok gilig gi, bin bi okok kirop God Minim ak ag ñilig gi, gi midonigabin,” aglak.

⁵Minim agelak nibak niñel, kirop magilsek tep gek, bi akñib ar oñid ag lilak. Bi nib okok alap me Stipen ak. Stipen ne God nop niñ di kilis yib goliñip. Kaun Siñ nop ap ran jakil midoliñip. Alap Pilip ak, alap Prokoras ak, alap Naikena ak, alap Timon ak, alap Pamenas ak, alap Nikolas ak. Nikolas ne taun kib Adiok nib. Ne ned bi Juda mer ak pen kisen Juda bin bi gos niñlak rek niñ dak. Pen kisen ne Jisas nop niñ dak. ⁶Bi akñib ar oñid nib okok ag lil, kirop dam bi Jisas minim dad ameb okok midelak siñak dapel, kiri God nop sobok gil, ñinmagil nabic kirop ar alañ lilak.

⁷Pen kiri God Minim ag ñel, amek niñlig gi, Jerusalem bin bi koñai yib nep Jisas nop niñ dilak. Pen bi God nop tap sobok gep bi okok koñai yib nep Jisas minim tep ak niñil niñ dilak.

Stipen nop minim kib aglak

⁸God ne Stipen nop di tep yib gil, kilis ne nop ñek, Stipen ne tap ma gep rek okok, tap niñep ma niñep okok, koñai nep bin bi midelak nab siñak goliñip. ⁹Pen Juda bin bi karip lim ke ke okok nib ognap apil, Juda mogim gep karip alap apil, God nop sobok göliñipal; Juda mogim gep karip nibak, “Miñi Miñ Ma Midobin Karip” agöliñipal. Bi Juda nib okok, ognap Sairini taun nib, ognap taun kib Aleksadria nib, ognap Silisia Propins nib, ognap Esia Propins nib. Kiri Stipen gak rek niñil, kilis yib gil nop minim pen pen aglak ak pen, ¹⁰God Kaun ne Stipen nop gos tep yib ñek niñlig gi, bi Juda okok nop minim tari aglak ak, gos niñ tep gil pen ak rek nep minim tep yib agek, nop pen agnimel rek ma lak.

¹¹Pen kiri Stipen nop ag mer niñil, am bi minim tom agep ognap kirop kamger ag rep gel, kiri apil aglak, “Cin nipin, bi aul ne Mosis minim ñu kil tikak ak ag juil, God nop ag juil gip,” aglak.

¹²Kiri minim tom nibak agelak, bin bi yokop okok lil, bi minim tig bilokep okok lil, bi lo minim ag ñeb bi okok lil, cibur kirop ak timel gek, Stipen nop minim kib agniñ dam Juda Kansol kib midelak okok dad amnilak. ¹³Damil, bi minim tom agep ognap sek dapel, kiri aglak, “Cin nipin, bi nibaul per nep God sobok gep karip siñ aul ag juil, Mosis lo minim ñu kil tikak ak ag juil gip. ¹⁴Pen ne minim alap agosip nipin ak, agip, ‘Jisas bi Nasaret nib ak, kisen God sobok gep karip aul gi timel gil genigab, Mosis minim cinop ag ñak gipin ak kirig gil, minim kisen nib dil sain ginigabin,’ agip,” aglak.

¹⁵Pen Juda Kansol kib midelak bi okok, Stipen nop niñ i sek lil niñlak, milik jo milik ne ak ejol milik jo milik rek lak.

Stipen Juda Kansol Kib bi okok kirop Krai minim tep ak ag ñak

7 ¹Kiri minim esek nibak agel, God nop tap sobok gep bi kib yib ak Stipen nop agak, “Minim nep agebal nibak niñid agebal aka esek agebal?” agak.

²Agek, Stipen agak, “Bapi mam sikop, niñim! Based acik cin Ebrahim birarik nep taun kib Haran ma amnak ñin ak, karip lim Mesopotemia midek won ak, God melik tep ke sek mideb ak nop agak, ³‘Karip lim nak aul kirig gil, bin bi nak okok kirig gil, karip lim ke yad nep yomniñain ak amnimin,’ agak.

⁴‘Agek, Ebrahim karip lim kib Kaldia midoligip ak kirig gil, taun kib Haran am midoligip. Kisen Ebrahim nap kimek, God agek, apil karip lim nibi midebim nab siñaul midoligip. ⁵Ñin nibak God Ebrahim nop lim dai miñan alap ma agak. Apil yokop nep midoligip. Ñin nibak Ebrahim ñi pai alap ma tikak; yokop nep midoligip. Pen God Ebrahim nop agak, ‘Kisen lim dai nibaul, nak dinigan. Ñi pai nak tik donigan tik dapel amniñab okok, lim dai nibaul ak rek nep dil mideniñal,’ agak. ⁶Pen God minim alap agil agak, ‘Ñi pai nak tik donigan tik dapel amniñab okok, amil bin bi ognap karip lim okok midel, kirop magilsek miñ lil, gi timel yib gil, miñ wög rek ag lel, gel niñlig gi, mi akniñ po hadred (400) yinniñab. ⁷Pen bin bi kirop nig geniñal okok, yad pen kirop gi timel ginigain. Bin bi nak okok, karip lim nibak kirig gil, ap yip sobok gilig gi mideniñal karip lim aul,’ agak.

⁸Pen God Ebrahim nop minim kilis niñid alap ag lil agak, ‘Ñi pai nak tik donigan tik dapel amniñab okok, nibep kod mideniñain ak me, niñan lakañ sek wañ wak tib gi rik ginimib,’ agak. Agek, kisen Ebrahim ñi ne Aisak nop tik dapil, ñin akniñ ar oñid midil, ñin jil oñid ak ñi ak nop wañ wak tib gi rikak. Aisak pen Jekop nop tik dowak. Jekop ne pen ñi akniñ umiñan alañ okok kirop tik dapek me, cin Isrel bin bi wagin ke ke midobin.

⁹“Based acik cin nib okok, nimam ned sikop okok nimam kisen Josep nop gos timel niñil, milik yapek, bi ognap ñel, nop tau dad karip lim Ijip dad amnilak. Dad amel, mid tep ma gak ak pen God nop saköl ma gak. ¹⁰Tap miker Josep nop apek ak, God ne niñil Josep nop kod mid tep goligip. God ne Josep nop gos tep ñil gek, Ijip Kiñ Pero, bi Josep aul gos niñ tep yib geb, agil, nop agek, lim dai Ijip abe, karip tap ne okok magilsek abe, kod midoligip.

¹¹“Kisen ñin alap yuan kib yib ak, karip lim Ijip abe, karip lim cin Kenan aul abe apek, based cin karip lim Kenan aul midelak okok tap magil piyo niñil, tap ñiñeb alap ma midek, gos par yib lilak. ¹²Pen nap kiri Jekop minim alap niñak, tap magil koñai nep karip lim Ijip midek. Nib ak niñil ñi ne okok kirop agek, tap magil taunig Ijip amnilak. ¹³Am tau dapil, ñib sakil, kauyañ pen taunig amnilak. Amel, nimam Josep kirop agak, ‘Mam sikop, nibi yip bi an, agil nipim? Yad namam nibi Josep nep,’ agak. Agek, Ijip Kiñ Pero minim nibak niñil agak, ‘Ak Josep nimam sikop ne okok e!’ agak. ¹⁴Josep pen, bapi yad Jekop, bin bi ne okok eip kasek onimel, agil, minim ag yokek, nap Jekop bin bi ñinjuil omal nokim adik gi dam ajip pis kid adañ (75) rek dil, eip amnilak. ¹⁵Nap Jekop nig gil, karip lim Ijip am midil, kimak. Mid damil, based sikop nib okok magilsek kim saklak. ¹⁶Pen kisen ñi kiri okok nap tiñil damil, taun kib Sekem tigel gilak. Cip tigel nibak, based acik Ebrahim, Hemor ñi ne okok kirop mani alap ñil tauak.

¹⁷“Pen God Ebrahim nop ned ginigain, agil, minim ag lak rek ginig gil gak ak me, bin bi cin Isrel karip lim Ijip midelak okok, ñi pai tik damil tik dam dapil gil, koñai yib nep midelak. ¹⁸Bin bi cin Isrel koñai nep midelak ñin nibak, karip lim Ijip ak kiñ kisen nib miserñ lak. Kiñ kisen nib nibak based Josep nop ma niñak ak me, ¹⁹bin bi cin okok gi timel yib gil, minim kilis agek, ñi pai kiri okok tik dapil, sönj ken okok yokel, ke midil kimeligipal. ²⁰Nig gilak ak pen, ñiñ nab nib siñak, ber mal ñi wak tep yib alap tik dapil, yib ne Mosis agrek. Ñi nibak nop takin omal nokim karip ñilik miñan okok nep we ger midoligip. ²¹Kisen niñañ nibak nop dam sönj siñ eyañ lirek, Pero pai ne ak apil, nop niñil, dam ñi yad, agil, yimag loligip. ²²Ne nig gil yimag lek, kib gek, Ijip bin bi kiri tari tari göligipal ak, nop ag ñi tep gilak. Ne bi minim kilis gi agil, wög kilis gil goligip.

²³“Pen Mosis mi ne akñib ñinjuil omal (40) yinek, bin bi yad Isrel kirop am niñil owin agak. ²⁴Pen amil niñak, Ijip bi alap Isrel bi alap nop tapin magil pakek. Mosis niñil, bi Isrel nop di komiñ yokil, Ijip bi ak nop pis nep ñag pak lek kimak. ²⁵Pen Mosis gos ne niñak ak, ‘Bin bi yad Isrel agniñal, “God Mosis nop gos ñek, apil cinop tig asik yokek, mid tep ginigabin,” agniñal,’ ag niñak ak pen kiri gos nibak ma niñlak. ²⁶Pen miñek Mosis amil niñak, Isrel bi omal pen pen gerek. Nig gerek niñil agak, ‘Bi aul, niri mamil mal midebir; pen pen gebir ak kirig gir!’ agak.

27“Agek, bi alap bi alap nop pakek ak, Mosis nop di okdaŋ yokil agak, ‘Nak bi an agek, bi kib midil, cirop bi minim tig bilokep rek kod mideban? 28Nak tol Ijip bi ak ñag pak linak ak, miñi yip abe ñag pak linig ageban aka?’ agak. 29Nib agek, Mosis bi ñag pak lipin nibak nipal, agil, pirik gi am karip lim Midian amil, bi yokop alap rek midoligip. Ñin nab nib siŋak, ne bin dil, ñi omal tik dowak. 30Niŋ gil yokop nep midek mi ñinjuil omal (40) yinak. Kisen ñin alap miñ mab kab nep mideb Sainai Dim ulep siŋak midil niŋak, ejol alap apil, mab bid nokim alap milaŋ gek nab siŋak mişeŋ lek niŋak. 31Niŋ gek Mosis niŋil, tap nibak tari geb, agil, am ulep siŋak apil niŋek niŋlig gi, Bi Kib agak, 32‘Nased acik Ebrahim, Aisak, Jekop, God kiri yad midebin,’ agak. Nib agek, Mosis, ak Bi Kib nep ageb, agil, pirikil jep jep dil, kiyan gil udiŋ ma niŋak.

33“Pen Bi Kib Mosis nop agak, ‘Lim dai siŋ aul ap mideban rek, tob tirip nak ak tig juaŋ. 34Ijip bin bi okok bin bi yad Isrel karip lim Ijip midebal okok kirop gi timel yib gipal, yad nipin. Kiri sil agebal ak peyiŋ niŋil, apil kirop tig asik yokniŋ opin. Nib ak, nak adik gi Ijip amnoŋ,’ agak.

35“Isrel bin bi ned Mosis nop aglak, ‘Nak bi an agek, bi kib midil, cirop bi minim tig bilokep rek kod mideban?’ aglak. Pen kisen, God ejol ne ag yokek apil, mab bid milaŋ gek nab siŋak Mosis nop mişeŋ lek, God ne ke Mosis nop bin bi kib kiri midil kirop tig asik yokaŋ, agil, ag yokak. 36Pen Mosis Ijip amil, tap ma gep rek ognap siŋak gil, bin bi ne Isrel kirop dil ñiŋ solwara ‘Lakañ’ apal ak amil, tap ma gep rek ognap siŋak gil, kisen Isrel bin bi poŋ dil dam miñ mab kab nep midoligip nab okok amil, tap ma gep rek ognap siŋak giligi gi midoligip. Niŋ gi midek midek, mi ñinjuil omal (40) yinak.

37“Mosis ne nep me bin bi Isrel kirop agak, ‘God ne bi minim ne agep alap, ñi nibi ke bi yad rek alap, ag yokek nibep onigab,’ agak. 38Mosis ne miñ mab kab nep midoligip nab okok midek; ne apis based cin eip midek; Sainai Dim siŋak ejol alap apil Mosis nop minim ag ñak. Mosis minim nibak dil cinop Isrel bin bi ag ñinigab, agil, God ne minim komiŋ nibak Mosis nop ñak.

39“Mosis minim komiŋ nibak ag ñak ak pen based cin okok minim nibak ma dilak. Kiri Mosis nop ag juil, adik gi Ijip amnin, agil, gos ak niŋlak. 40Kiri Mosis nimam Eron nop aglak, ‘Bi nak Mosis cinop Ijip nib dowip ak, nop tari giŋ ak ma nipin. Nib ak, nak cinop tap god rek ognap gek, bi cin ognap god ginigan nib okok di ned amel, cin kisen amnin,’ aglak. 41Ñin nibak nep, god esek kaj kau ñilik rek alap gi lil, yakir tap okok pak dap sobok gi ñilak. Kiri tap ñinmagil kiri ke gi lilak okok niŋil, ak god cin, agil, miñ miñ giligi gi tap kib dagil niŋlak. 42Niŋ gelak, God kirop kirig gil agak, ‘Niŋ gipal ak, piŋ, takin, gap okok abramek sobok gilaŋ,’ agak. Ñin nibak kiri tap nib okok nep sobok göligipal ak me, bi God minim agep alap God Minim ak ñu kil tikil agak,

‘Isrel bin bi.

Nibi ned mi ñinjuil omal miñ mab kab nep midoligip nab okok
ajöligipim ñin ak,

kaj kau kaj sipsip tap okok pak yip sobok gi ma ñöligipim.

⁴³ Nibi tap yokop esek omal nibi ke gi lipek ak

nop tap pak sobok gi dagil ñilig gi, gi mideligipim.

Tap nibak, alap Molok agöligipim,

alap gap rek gi lil, Repan agöligipim.

Tap god tom nib omal nep,

sel karip gi di ajlig gi, sobok gilig gi mideligipim.

Gi mideligipim nibak, yad nibep ag yoken,

am miñ midenigabim taun kib Babilon bej kid okok,’ agak.

⁴⁴ “Based sikop cin okok miñ mab kab nep midoligip nab okok

midelak ñin ak sel karip dad ajöligipal. Sel karip nibak midek ak niñil,

God cinop eip mideb, agil niñöligipal. Sel karip nibak, God minim agak

rek nep gi lel midek. ⁴⁵ Kisen pen bi nap sikop okok, kiri sel karip nibak

yes kiri Josua based sikop cin okok kirop ñel, kiri dilak. Kisen, kiri sel

karip nibak dapelak niñlig gi, God ne bin bi karip lim siñaul midelak

okok piñil ju yik gi yokak. Sel karip nibak midil, mid damil, kisen

Depid tik dolak. ⁴⁶ Based Depid, bi God niñek tep gak bi ak, ne God nop

ag niñil agak, ‘Nak yau agek, yad karip nep tep alap gi len, nak God

Jekop ned sobok goligip ak, karip nibak midenigan,’ agak. ⁴⁷ Agek pen

God ne yau ma agak. Kisen Solomon ne God sobok gep karip nibak gi

lak.

⁴⁸ “Pen God ar i oklañ mideb ak, bin bi ñinmagil dil gi linigal karip

okok ma midenigab. Bi God minim agep alap minim nibak agil agak,

⁴⁹ ‘Bi Kib ak ne agip,

“Karip lim seb kab ar alañ siñak

sea kiñ yad rek ar siñak bisig midil,

lim dai wagin aul tob yad tau ribik lilig gi midebin.

Yip tari karip gi lem, yad kin midenim?

Yad karip siñ akal ake linim?

⁵⁰ Tap okok magilsek ñinmagil yad ke ma gi lipin aka?” agak,’ agak.

⁵¹ “Cin ke niñ rep gipin, agil, tap si tap timel nep gil, God Minim ma

nipim. Nased sikop göligipal rek nep gipim. Kaun Siñ ne nibep gos tep

ñek nipkep, pen per mer apim. ⁵² Nased sikop okok, bi God minim agep

okok kirop magilsek gi timel gilak. Bi God minim agep birarik okok,

‘God Bi Wög Gi Ñeb tep yib ak apeb,’ aglak. Pen nased sikop okok kiri bi

nib okok ak rek nep ñag pak lilak. Pen miñi God Bi Wög Gi Ñeb tep yib

nibak apek me, nibi nop mimig niñil ñag pak lipek. ⁵³ Pen God lo minim

ne ak, ejol ne okok kirop ag yokek dapel dipek, pen ageb rek niñil ma

gipim,” agak.

Stipen nop kab ju pak lilak

⁵⁴Stipen minim nibak agek niŋlig gi, kirop milik kal yib yapek, meg magil su ribikil kal julak. ⁵⁵Pen Kaun Siŋ ne Stipen ap ran jakil midek niŋlig gi, ne kilan gi niŋil seb kab ar alaŋ siŋak niŋak, God melik tep akniŋ ke yib ne midek niŋil Jisas ne God ŋinmagil yipid pis ken ar ne warik midek. ⁵⁶Stipen niŋil agak, “Niŋim! Yad niŋebin, seb kab ar alaŋ siŋak kiŋoŋ yik mideb. Bi ŋi ne ak God ŋinmagil yipid pis ken ar ne warik mideb!” agak.

⁵⁷Stipen nib agek, timid kiri ak ŋinmagil di piliŋ gil, dai magilsek warikil, minim bleble agil minim kib yib agil, pig gi rikid ag amil ne midek amnilak. ⁵⁸Nop di cici lil, dam dam taun kib nibak sōŋ ar eyaŋ dad amnilak. Bi nop minim esek aglak okok kal juil, waliŋ par kiri okok tig juil, bi praj Sol midek ulep siŋak yokel, ne kod midek niŋlig gi, kiri Stipen nop kab ju paklak. ⁵⁹Nop nig gil pakel niŋlig gi, Stipen Bi Kib nop sik par agil agak, “Bi Kib Jisas, kaun magil yad dan,” agak. ⁶⁰Nib agil, kogim yimil, sik kib par agil agak, “Bi Kib! Yip ŋag pak lebal aul, tap si tap timel gebal ak niŋil kirig ginimin,” agak. Nib aglig gi kimak.

8 ¹Stipen nop kab ju pak lilak ŋin ak, Sol maŋ siŋak midil, paj agil wobi yal yal agak.

Jisas bin bi ne kirop yik gi yokel, ke ke amnilak

ŋin nibak nep, Jerusalem kai wagiŋ gil, bin bi Jisas niŋ di midelak okok kirop gi timel yib gelak. Nig gelak, bin bi Jisas nop niŋ di midelak okok kiri magilsek piriŋ gil, kariŋ lim Judia okok abe, kariŋ lim Sameria okok abe, ke ke amnilak. Pen bi Jisas minim dad ameb akniŋ umigaŋ alaŋ okok kiri nep Jerusalem siŋak midelak. ²Pen God Minim ageb rek nep göligipal bi ognap, Stipen nop mapin yib gek niŋil sil kib yib aglig gi, cip dam tigel gilak. ³Sol pen, bin bi Jisas niŋ dipal okok gi timel yib ginigain, agil, kariŋ kariŋ gilig gi, bin bi nib okok kirop abramek lip gi dam miŋ loligip.

Pilip kariŋ lim Sameria amil God minim ag ŋak

⁴Bin bi Jisas nop niŋ di midelak okok piriŋ gi am kariŋ lim ke tiŋoŋ tiŋoŋ midelak. Pen nib okok am midil, Jisas minim tep ak dam bin bi nib okok kirop ag nōligipal. ⁵⁻⁶Bi nak Pilip ak rek nep amil taun kib alap kariŋ lim Sameria siŋak midil, bin bi okok kirop, Mesaia owak minim tep ak ag ŋak. Pilip minim agak ak abe, tap ma gep rek gak ak abe niŋil, minim ne tari tari agak ak, timid li niŋ tep yib gilak. ⁷Pilip ne bin bi kijeki kiyob ŋilik sek midelak okok koŋai nep gek, tap nib okok wal agil mis amnilak. Ne bin bi ŋinmagil tob pinok gek kalau gak okok koŋai nep abe, bin bi tob gi go geb mo geb gak okok koŋai nep abe kirop gek,

komiņ lak. ⁸Niņ gek niņlig gi, bin bi taun nibak kin midelak okok niņil magilsek miņ miņ yib gilak.

⁹Pen taun kib nibak bi alap kin midoligip, yib ne ak Saimon. Ne kij gil, tap ma gep rek ognap gek, Sameria bin bi okok magilsek gos par yib niņöligipal. Yad bi pobiņ yib midebin, agoligip. ¹⁰Saimon ne niņ gek, bin bi yib midek okok abe, bin bi yib ma midek okok abe, Saimon minim agak rek nep niņil aglak, “Bi nibaul ne god ‘Kilis Kib’ apin ak nep,” aglak. ¹¹Tap ma gep rek okok per goligip niņil bin bi okok gos par niņil, minim agoligip rek nep niņöligipal. ¹²Pen kisen Pilip apil, God bin bi dil karip ne seb kab alaņ sijak kod mideniņab minim tep ak abe, Jisas Krai minim tep ne ak abe ag ñek, bin bi okok kiri minim nop niņ dil, ñiņ paklak. ¹³Saimon ne ke ak rek nep, Jisas nop niņ dil ñiņ pakak. Pilip amek, Saimon nop sain gek niņlig gi, Pilip tap ma gep akniņ ke rek gek ak niņil, Saimon ne wal yib agak.

¹⁴Bi Jisas minim dad ameb okok Jerusalem midel niņlig gi, kirop minim alap aglak, “Sameria bin bi God Minim niņ dipal,” aglak. Kiri minim nibak niņil, Pita Jon kirop mal ag yokel, karip lim Sameria amnerek. ¹⁵⁻¹⁷Amil niņrek, bin bi okok Jisas nop niņ del, Bi Kib Jisas yib agil kirop ñiņ pak ñilak ak pen Kaun Siņ ne kirop ma owak. Niņ ak, Pita Jon bi omal, Kaun Siņ ne kirop owaņ, agil, sobok gil, ñinmagil nabic cög kirop ar alaņ lel, Kaun Siņ ne kirop nokim nokim owak.

¹⁸Kiri mal ñinmagil nabic cög ar alaņ ler, God ne Kaun Siņ bin bi okok kirop ñak ak, Saimon niņil, yad ak rek nep gin, agil, kirop mal mani yomiļ agak, ¹⁹“Mani aul dil, yip kilis nibak ñer, yad bin bi an an ñinmagil yad nabic cög ar alaņ len, kiri ak rek nep Kaun Siņ dinigal,” agak.

²⁰Niņ agek, Pita agak, “God tap tep ne yokop ñeb nibak, tari ginig mani taunig ageban? Mani nibak nak ke eip ki gi yonigab! ²¹Wög cir gobir ak nak eip mer. Cibur gos midmagil nak niņ di mideban ak, God niņek tep ma gip. ²²Tap si tap timel ginim, agil, gos niņeban ar ak kirig gil, God nop sobok geniņan ak, gos timel yib niņeban nibak niņil kirig ginimiņ rek lip,” agak. ²³Yad niņin, tap tep kiri sijak tap yad rek midobkop, agil, gos timel niņil, tap si tap timel gek ameb. Niņ ak, nak tap si tap timel gep magil ak, miņ wög gep bi rek mideban.

²⁴Agek, Saimon agak, “Niņ mal Bi Kib ak nop sobok ger, tap yip ginimiņ rek lip, agil agebir nibak ma ginimiņ,” agak.

²⁵Pen Pita eip Jon eip, Jisas kirop mal tari tari gak minim ak abe, Bi Kib minim tep ak abe, bin bi okok kirop ag ñi sakil, adik gi Jerusalem amniņ, kaniņ nab okok amlig gi, karip lim Sameria nab sijak karip tiriņ tironj koņai nep bin bi okok kirop Jisas minim tep ak ag ñilig gi amnerek.

Pilip ne bi Itiopia niņ alap nop Jisas minim tep ak ag ñak

²⁶Pen Bi Kib ejol alap apil Pilip nop agak, “Jerusalem niņ taun kib Gasa ambal kaniņ par ak amnoņ,” agak. ²⁷Agek, Pilip kaniņ agak par

nibak amil niŋak, bi kib alap, kaj hos lip gi dad ameb tap bad ar alap bisig gil, kanib par nibak amek. Bi nibak ne bin kwin Kadaki, karip lim kib Itiopia kod midek bin ak nop wög gilig gi, mani ne ak kod midoligip. Pen ne Jerusalem God sobok gep karip ak amil sobok gilig gi mid juil, ²⁸adik gi karip lim Itiopia amil, God Minim dai Aisaia ñu kil tikak ak dil, udin li niŋlig gi amek. ²⁹Pen God Kaun Pilip nop agak, “Hos tap bad lip gi dad ameb adan am ulep bak siŋak amil, bi nibak eip amnimir,” agak.

³⁰God Kaun agak rek nep, Pilip pig gi rikid ag ulep bak siŋak amil niŋak, bi Itiopia nib nibak, bi God minim agep Aisaia God Minim dai ñu kil tikak ak, udin li niŋlig gi amek. Pilip niŋil agak, “Nak mij udin li niŋlig gi ameban piyak ak, minim wagin ak nib ageb, agil nipan aka mer?” agak.

³¹Agek, ne pen agak, “Bin bi ognap rek yip ag ñel niŋil rek agnim,” agak. Nib agil ne Pilip nop agak, “Ap ar siŋaul bisigek cir eip amnir,” agak. Agek, Pilip am ar nibak bisigak.

³²Bi nibak God Minim dai Aisaia ñu kil tikak nibak udin li niŋek. Minim nibak nibgil mideb:

“Ne kaj sipsip poŋ dil dam ñag pak lipal rek nep midek.

Kaj sipsip ñilik kas tikel, wal ma agip rek,
ne ak rek nep minim alap ma agak.

³³Tap timel alap ma gak ak pen nop minim esek agil, gi timel gilak.

Nop pis nep ñag pak lel kimak ak me, kisen bi an rek midil,
‘Nib nib goligip,’ agnigab?” agak.

³⁴Bi kib Itiopia nib ak minim nibak niŋil, Pilip nop agak, “Minim ageb nibaul, God minim agep bi ak ne ke ageb aka bi ke nib alap ageb?” agak.

³⁵Agek, Pilip God Minim dai udin li niŋesir ak nep wagin gil ag dam dam, Jisas minim tep ak ag ñi tep gak.

³⁶Pen nig gil minim ag damlig gi niŋrek ñig alap midek. Bi nibak Pilip nop agak, “Ñig mideb aul yip ñig pak ñinigan aka?” agak. ³⁷Agek, Pilip agak, “Nak Kraiss nop cibur gos midmagil yad niŋid nep niŋ dipin agenigan ak, yad nep ñig pak ñinigain,” agak. Agek, bi nibak pen agak, “Jisas Kraiss ne God Ñi ne mideb ak, yad niŋ dipin,” agak. ³⁸Agek, kaj hos tap lip gi dad ameb ar bisig aperek ak, hos ak sek nib siŋak lil, ñig eyaŋ amil, Pilip bi nibak nop ñig pak ñak. ³⁹Ñig gil ñig pak ñil, gol siŋak aper niŋlig gi, dai Bi Kib Kaun ne Pilip nop dil, ke miŋan alap dad amek niŋlig gi, bi pobiŋ nibak nop ma niŋak. Ne pen miñ miñ yib gilig gi kanib ar nibak amnak. ⁴⁰Pen Bi Kib Kaun ne Pilip nop dam karip lim Asotas lek, bin bi karip lim nib okok taun ke ke midelak okok kirop magilsek Jisas minim tep ak ag ñi dam dam, taun kib Sisaria amjakak.

Sol Jisas nop niŋ dak

9 ¹Pen Sol ne Bi Kib minim tep niŋ dil kisen göligipal bin bi okok kirop ñag pak lin, agil, per kilis yib goligip. Minek alap ne am God

nop tap sobok gep bi kib yib ak nop agak, ²“Yip mij ognap ñu kil tik ñenimin, yad dam Juda mogim gep karip ke ke mideb taun kib Damaskas amil, kirop ñinigain. Mij nibak ñu kil tikil agninin, ‘Taun kib Damaskas siñak, nibi bin bi Jisas nop niñ dipal ognap Juda mogim gep karip okok midenimel ak, Sol nop agem, kirop miñ lil Jerusalem donimiñ,’ agil, ñu kil tikninin,” agak. ³Sol mij nibak dil, Damaskas ulep ulep gek niñlig gi, dai melik seb kab ar alañ nib ap yapil nop niñak. ⁴Sol kaj hos ar alañ nib ap yap lim eyañ pakek niñlig gi, minim alap nop agak, “Sol, Sol, yip tari ginig gi per gi timel gipan?” agak. ⁵Agek, Sol agak, “Bi Kib, nak bi an?” agak.

Agek, agak, “Yad Jisas, yip per gi timel gipan ak nep agebin. ⁶Pen nak warikil, Damaskas amil, bi alap apil nep minim agenimiñ rek niñil ginimin,” agak.

⁷Pen bi Sol eip olak okok minim magil ak nep niñil, bi nonim ak ma niñil, gos par yib niñil minim ognap ma aglak. ⁸Sol pen warikil udin ñilil niñak, udin ne ak pis nep kwoi gak. Nig gek, bi ne eip olak okok ñinmagil kid ne ak dil, poñ dil Damaskas amnilak. ⁹Nop nig gil udin kwoi gek, ñig, tap magil tap okok ma ñibil, ñin omal nokim yokop nep midek.

¹⁰Pen Jisas nop niñ dak bi alap Damaskas midek, yib ne ak Ananaias. Bi nibak ne nigrikep niñak, Jisas nop agak, “Ananaias!” agak.

Agek agak, “Bi Kib, yad midebin,” agak. ¹¹⁻¹²Agek, Jisas agak, “Sol bi taun kib Tasas nib ak, God nop sobok gilig gi, nigrikep niñip, bi Ananaias apal ak, nop am di niñosip, udin ne kwoi gak ak ñilil niñip. Ne miñi yip sobok gilig gi mideb Judas karip ak. Nib ak, nak kanib ‘Yipid’ apal ak amil, Judas karip ak amjakil kirop agninin, ‘Sol nop niñnig apebin,’ agninin,” agak.

¹³Jisas ne nib agek, Ananaias agak, “Bi Kib. Yad nipin bin bi koñai yib nep apal, ‘Bi Sol nibak bin bi nep pis ken midebal Jerusalem okok kirop per gi timel yib gip,’ apal. ¹⁴Ne miñi Damaskas aul owip ak, bi God tap sobok gep bi kib okok mij ognap nop ñel, bin bi an an yib nak agel ar amniñab okok, kirop miñ lin, agil, owip,” agak.

¹⁵Ananaias nib agek, Bi Kib nop agak, “Amnoñ! Bi nibak wög ognap yad ke nop ag lipin. Ne minim tep yad ak Isrel bin bi kirop ag ñil, Isrel bin bi mer okok kirop ag ñil, kiñ okok kirop ag ñil ginigab. ¹⁶Pen ne yur mab dil miker kib dilig gi wög yad nibak ginigab. Nig ginigab ak yad ke nop ag ñi tep ginigain,” agak.

¹⁷Bi Kib nib agek, Ananaias amil, Sol midek karip ak apjakil, miñan eyañ amil, Sol nop nabic cög ar alañ ñinmagil lil agak, “Mam Sol. Bi Kib Jisas nep kanib nab siñak ap yapil misen lek niñnak ak, yip ag yokosip opin aul. Nak udin nak kauyañ ñil niñil, Kaun Siñ ne nep am ap ran jaknimiñ, agil, yip ag yokosip opin me aul,” agak. ¹⁸Ananaias nib agek niñlig gi, tap apab sagañ bad rek Sol udin nop karikil midek ak, wal gi

yapek niŋlig gi, dai udin ñil niŋak. Udin ñil niŋil, warik amil, ñig pakak. ¹⁹Sol tap ñibil kilis dak.

Sol Damaskas bin bi okok kirop Jisas minim tep ak ag ñak

Pen Sol ne ñin ognap bin bi Jisas nop niŋ dilak okok eip Damaskas kin midlig gi, ²⁰Juda mogim gep karip okok gi tagil, Jisas ne God Ñi ne mideb minim tep ak bin bi okok kirop ag ñak. ²¹Ne nig gil ag ñi midek niŋlig gi, kiri niŋil pak ju dilig gi aglak, “Bi aul nep me, Jerusalem bin bi Jisas nop niŋ dilak okok kirop gi timel goligip! Miñi bin bi ognap sek nag li dam, bi God sobok gep bi kib okok kirop ñinim, agil, owip,” aglak. ²²Pen Sol Jisas minim tep ak ag ñi damil, Jisas ne nep Mesaia ak minim yipid gil yib agek, bi Juda Damaskas kin midelak okok minim alap pen agnimel rek ma lak.

²³Pen kisen mid damil, Juda kai ap mogim gil, minim ag ar nokim lil aglak, “Sol nop ñag pak lin,” aglak. ²⁴Pen minim aglak nibak, bi alap niŋil Sol ag ñak. Taun kib nibak, birarik nep kab wari gi kis kis gilak ak me, kijon tam ajoligipal okok, Sol nop ñag pak lin, agil, piñ nab kislim eyaŋ uliñin li midelak. ²⁵Nig gelak niŋil Sol bi ne okok kislim nab eyaŋ nop di wad miŋan pobin alap yigil, nag ñon gil, lip gi wari nibak miŋan alap mis ken ar alaŋ nib lim eyaŋ yokel, pirik gi amnak.

Sol Jerusalem am midek

²⁶Sol Jerusalem amil, bin bi Jisas piñ ar midelak okok eip midenim, agek pen kiri niŋil, bi aul Jisas bi ne alap mer, cinop ñag pak linig owip, agil, jel gek piriklak. ²⁷Nig gelak, Banabas ne Sol nop dam bi Jisas minim dad ameb okok midelak siŋak amil, kirop agak, “Bi nibaul nop niŋil ma piriknimib. Minek alap taun kib Damaskas amlig gi, kanib nab siŋak amil, Bi Kib nop niŋek, nop minim ognap agak. Kisen am Damaskas bin bi kirop ma pirikil, Jisas minim tep ak abramek nep ag ñak,” agak. ²⁸Banabas nib agek, kiri Sol nop del, ne kirop eip Jerusalem kin midil, taun kib nibak miŋan miŋan okok amil, Jisas minim tep ak abramek yib nep ag ñoligip. ²⁹Pen bi Juda Grik minim niŋlak okok nop eip minim pen pen ag amil apil gil, nop ñag pak lin, agil, gos ak niŋlak. ³⁰Pen bi Jisas nop niŋ dilak ognap minim nibak niŋil, nop poŋ dil dam taun kib Sisaria amil yokel, taun kib Tasas amnak.

³¹Ñin nab nib siŋak, karip lim Judia, Galili, Sameria okok, bin bi Jisas nop niŋ dilak okok mid tep göligipal. Kaun Siŋ ne kirop kod mid tep gil, kilis ñek niŋlig gi, kiri kilis gil, Bi Kib nop gos niŋlig gi midil, bin bi ognap sek Jisas minim tep ak ag ñel, kiri ak rek nep Jisas nop niŋ dilak.

Pita Inias nop gek warik amnak

³²Pita karip lim ke ke okok gi ajlig gi, bin bi Jisas nop niŋ dilak okok kirop am niŋ ajoligip. Nig gil kirop niŋ ajil, minek alap, bin bi Jisas nop

niņ dilak okok kirop niņin, agil, karip tirig tiroņ Lida amnak. ³³Karip lim nibak bi alap midek, yib ne ak Inias. Pen n̄inmagil tob ne okok kalau gek, kau ar ne ak nep kin midoligip mi aknib jil oņid yinak. ³⁴Pita bi nibak nop agak, “Inias. Tap nep gip ak Jisas gek komiņ linigab. Warikil, kau nak ak yad tep gan,” agak. Nib agek niņlig gi, magil nibak nep Inias nop komiņ lek warikak. ³⁵Inias warikil gi tagek niņlig gi, karip tirig tiroņ Lida bin bi okok abe, karip lim Seron bin bi okok abe nop niņil, Bi Kib nop niņ dilak.

Tabita kimak, Pita gek, warikak

³⁶Pen Pita karip tirig tiroņ Lida nibak midek niņlig gi, bin Jisas nop niņ dak alap kimak yep taun kib Jopa siņak. Bin nibak yib ne Tabita. Pen Grik minim agil nop Dokas agōligipal. Ne bin bi okok kirop kod mid tep gil, bin bi yim gep rek okok kirop wōg gi n̄oligip. ³⁷Bin nibak nop tap gek bir kimek, nop n̄ig pak n̄il cip se dam karip n̄ilik miņan ar alaņ lilak. ³⁸Jisas bin bi ne Jopa midelak okok minim alap niņlak, Pita ap midek karip tirig tiroņ Lida siņak. Lida taun kib Jopa ulep siņak mideb niņil kiri bi omal kirop ag yokel, Pita midek siņak amil minim kilis agil agrek, “Nak cir eip kasek apek amnin,” agrek. ³⁹Agerek, Pita kirop mal eip Jopa amil amjakel niņlig gi, nop poņ di dam Tabita kimak dam lilak karip miņan ar alaņ amnilak. Pita nop poņ di dad amel niņlig gi, bin kaņil ap midelak okok, bin kimak nibak ned komiņ midoligip ak, walij par walij ognap kirop yokop n̄oligip okok, Pita nop yomlig gi, sil aglig gi midelak.

⁴⁰Pita pen bin bi ap midelak nib okok kirop ag sōņ eyaņ yokil, kogim yimil, God nop sobok gilig gi, adik gil, cip se niņlig gi agak, “Tabita, warikan!” agak. Agek, Tabita uđin n̄il Pita nop niņil, warik bisigak. ⁴¹Pita pen n̄inmagil kid ne ak dil, tig warik n̄il, bin kaņil okok abe, bin bi Jisas nop niņ dilak okok abe, kirop magilsek sik agek apelak agak, “Tabita aul,” agak. ⁴²Pen Pita niņ gek, minim nibak Jopa bin bi magilsek niņil, bin bi koņai nep Bi Kib nop niņ dilak. ⁴³Pen Pita ne taun kib Jopa nibak, bi kaj kau wak wōg goligip bi alap eip n̄in ognap tapin kin midōligipir. Bi nibak yib ne Saimon.

Ejol alap apil Konilias nop minim agak

10 ¹Pen ami bi okok kirop kod midoligip bi kib alap taun kib Sisaria midoligip. Yib ne ak Konilias. Ami bi ne kod midoligip nib okok kirop “Itali Ami Bi” agōligipal. ²Bi kib Konilias nibak eip, bin bi karip ne okok eip, God nop niņ dilak. Juda bin bi tap kiri ognap ma midoligip ak, Konilias ne mani tap okok abramek n̄oligip. Pen ne God nop per sobok goligip. ³Minek alap pib kim gak magil ak, Konilias ne nigrikep niņak, God ejol alap apil agak, “Konilias!” agak. ⁴Agek, Konilias pirikil nop niņ i sek lil agak, “Bi kib, yip tari ageban?” agak.

Agek, ejol ak nop agak, “Nak God nop sobok gil, bin bi yim gep okok kirop tap abramek ñil gipan ak, God nop tep gek nep saköl ma gip. ⁵Nak bi ognap agek, kiri am taun kib Jopa amil, bi Saimon Pita apal ak nop agel onimiñ. ⁶Ne Saimon, bi kaj kau wak wög geb ak eip kin midebir ñig solwara gol siñak,” agak.

⁷Pen ejol minim nibak agil amek niñlig gi, Konilias bi wög nop gi ñöligipir omal abe, ami bi God nop niñ dak alap abe agek apelak, ⁸kirop ejol ak minim tari tari agak ak ag ñi tep gil ag yokek, Jopa amniñ pañdilak.

⁹Kiri am am kanib nab siñak kinlak. Minek am am, pib nab epel magil ak, Jopa mañ mañ gilak. Won nibak Pita God nop sobok ginig amnak karip ar alañ migan ak. ¹⁰Ne amil, God nop sobok gi midek niñlig gi, nop yuan kib yib lak. Pen bin bi ne okok tap magil dagilel niñlig gi, Pita nop dai alap yomak. ¹¹Pita nop dai ak yomek niñak, seb kab ar alañ migan pag yikek, wad kib alap ñon par omal omal gol pis pis ñon gil midek nab siñak yap yap lim wagin eyañ yowak. ¹²Wad migan nib eyañ kaj, kimin kobri, toi, yakir ke ke okok magilsek nep midek. ¹³Minim alap pen nop agak, “Pita, nak warikil tap nib piyak okok pak ñiñan,” agak.

¹⁴Agek, Pita pen agak, “Bi Kib. Mer yib! Tari ginig, ñiñan, agil ageban? Cin Juda bin bi tap bil gep nib okok tap ognap ma ñibin yib,” agak.

¹⁵Agek, minim nibak kauyañ agak, “Tap tari tari God tap ñiñeb, agip okok, bil gep, agil ma agnimin,” agak.

¹⁶Gak nibak, yij omal nokim gak. Kisen me, tap wad kib nibak adik gi seb kab ar alañ amnak.

¹⁷Ñig gek, Pita nigrikep nipin nibak tari ginigab, agil, gos par niñ midek niñlig gi, Konilias bi ag yokek nop agniñ olak bi ñon ak kijon wagin siñak apjaklak. ¹⁸Apjakil aglak, “Bi Saimon Pita siñak mideb aka?” aglak.

¹⁹Pita nigrikep niñosip nibak gos niñlig gi midek niñlig gi, God Kaun nop agak, “Nak niñan! Bi omal nokim nep piyo niñ apebal. ²⁰Nib ak, warikil tam siñak eyañ amnoñ. Yad ke kirop ag yoken apebal. Nib ak, apek eip amnin agenimel ak, gos par ma niñil eip amnimin,” agak.

²¹God Kaun nib agek, Pita siñ eyañ amil bi nib okok kirop agak, “Bi piyo niñebim bi ak, yad me aul. Yip minim alap agniñ apebim aka?” agak.

²²Agek, aglak, “Bi kib Konilias, ami bi okok kirop kod mideb bi kib ak cinop ag yokek apobin. Ne God nop niñ dil, God Minim ageb rek gip; Juda kai nop niñel kirop magilsek tep gip. Pen ne nigrikep niñak, God ejol alap apil nop agak, ‘Nak bi ognap ag yokek, am Saimon Pita nop poñ di dapel, minim agonimiñ ak niñnimin,’ agak,” aglak.

Pita Konilias karip amnak

²³Nib agerek, Pita kirop agek karip ñilik migan eyañ amil kinlak.

Minek Pita, bi Jopa nib Jisas nop niŋ dilak ognap dil, Konilias ag yokak bi ñon nibak eip am am kanib nab siŋak kinlak. ²⁴Minek ak, Sisaria amjakil, Konilias karip ak amjaklak. Pen Konilias ne Pita apeb, agil, bin bi ne okok abe, nimid nimam ne okok abe, kirop sik agek ap mogim gi midelak. ²⁵Pita ne amil karip migan amnig gek niŋlig gi, Konilias nop nabiŋ pakil, nop bi kib, agil, am tob wagin ne siŋak kogim yimak. ²⁶Nig gek niŋlig gi, Pita pen nop tig warik ñil agak, “Nak warikan! Yad ak rek nep bi alap me aul,” agak.

²⁷Agek, warikek niŋlig gi, minim aglied gi, karip ñilik migan eyaŋ amnerek. Amil Pita niŋak, bin bi koŋai nep ap mogim gi midelak. ²⁸Pita kirop agak, “Nibi ke nipim, cin Juda bin bi asik mosik gi tep gipin. Juda bin bi mer okok eip ma ajpin; karip kirop ma ambin. Pen yad nigrikep niŋnek, God yip minim alap agak. Ne minim agak nibak, yad bin bi ognap asik mosik midebal, agil, kirop asik mosik ginim rek ma lip. ²⁹Nib ak niŋil me, Konilias minim ag yokak ak niŋil ma kirig gipin; agak rek nep niŋil opin. Nib ak, minim tari midek ag yoknak opin?” agak.

³⁰Pita nib agek, Konilias agak, “Yad menik nep me, miñi pib kim gip magil ak rek, karip ñilik migan eyaŋ God nop sobok gi midlig gi niŋnek, bi walij tid yib yimak alap apil, midenek bak siŋak warikil midek. ³¹Ne yip agak, ‘Konilias, nak God nop sobok gil, mani tap okok bin bi tap ma mideb okok kirop abramek ñil gipan ak, God niŋip. ³²Nib ak me, bi ognap ag yokek, taun kib Jopa amil, Saimon yib ne alap Pita apal ak, nop poŋ di dolaŋ. Ne Saimon bi kaj kau wak wög geb ak eip kin midebir ñig solwara gol siŋak,’ agak. ³³Ejol ak yip nib agek, yad kasek nep bi yad ognap ag yoken, nep am ulik gi dapesal, yip tep gip. Cin bin bi siŋaul God eip midobin rek, Bi Kib minim kirop ag ñinimin, agil, nep ag yokek opan ak, miñi cinop ag ñek niŋin,” agak.

Pita Konilias bin bi ne okok kirop minim ag ñak

³⁴Konilias nib agek, Pita agak, “Yad miñi nipin, God ne, bi ulep siŋaul nib nep bi tep, bi par okok nib bi timel, agil, ma niŋip. ³⁵Karip lim ke ke okok nib, wagin ke ke okok nib, bin bi an an God nop niŋil siskol dil, minim ne niŋil ageb rek ginigal bin bi okok, kirop magilsek dinigab. ³⁶Pen God ne cinop Isrel bin bi minim tep ag yokak ak nipim. Yad ke eip jim ñil midelaŋ, agil, God ne Jisas Krai nop ag yokak. Jisas Krai ne nep me, bin bi okok magilsek Bi Kib kiri mideb. ³⁷Nibi ke nipim, Jon bi ñig pak ñeb ak, ñig pak ñilig gi, minim tep nibak wagin gil, karip lim Galili ag ñak. Nig gil agek, ag damlig, ag damlig, bin bi karip lim Isrel midebal okok magilsek niŋlak. ³⁸Pen nibi nipim, Jisas Nasaret nib ak God eip midil, Kaun Siŋ ak nop ñek, kod midek niŋlig gi, kilis ne nep dil, karip lim ke ke okok magilsek taglig gi, bin bi okok gi tep gilig gi, bin bi Seten kirop gek koslam midelak okok kirop gek, komiŋ loligip.

³⁹“Pen Jisas Juda bin bi karip lim kiri okok gi taglig gi, Jerusalem gi taglig gi, gak gak rek cin udin cin ke niɲnok ak agebin. Pen kisen nop mab bak alaɲ ñag pak lel kimak. ⁴⁰Kimak ak pen ñin omal midil, God gek, ñin omal nokim ak kauyaɲ warikil, am miseɲ lek udin cin ke niɲnok. ⁴¹Bin bi magilsek nop udin ma niɲlak. God cinop bin bi ag lak okok nep Jisas nop udin niɲnok. Ne kimil warikek niɲlig gi, eip midil jim ñil tap ñibil ñig ñibonok. ⁴²Jisas cinop agak, ‘Minim tep yad ak bin bi okok kirop ag ñil agnimib, “God agak rek me, kisen Jisas bin bi komiɲ midenigal okok abe, bin bi kimnigal okok abe, kirop magilsek minim kib agnigab,” agnimib,’ agak. ⁴³Pen ar nibak, bi God minim agep okok magilsek Jisas Kraiss nop agil aglak, ‘Bin bi an an Kraiss yib kilis yib ne ak niɲ dinigal okok, tap si tap timel gipal ak, God niɲil kirig ginigab,’ aglak,” agak.

Juda bin bi mer okok Kaun Siɲ dilak

⁴⁴Pen Pita nig gil minim ag midek niɲlig gi, Kaun Siɲ ne bin bi niɲ midelak okok kirop magilsek owak. ⁴⁵⁻⁴⁶Kaun Siɲ kirop apek, kiri minim ar ke ke aglig gi, God yib ne agel ar amek, Juda bin bi Jisas nop niɲ dilak Pita eip Jopa nib olak okok, God Juda bin bi mer okok kirop Kaun Siɲ ñib me ak, agil, wal yib aglak.

Pita pen agak, ⁴⁷“God ne Kaun Siɲ cinop ñak rek ak, miɲi bin bi siɲ aul kirop ak rek nep ñib. Nib ak, kiri ñig paknigaun, agel, bin bi ognap kirop mer agnimel rek ma lip,” agak. ⁴⁸Pita nib agil bi ne ognap kirop agak, “Nibi bin bi siɲ aul kirop Jisas Kraiss yib ne agil ñig pak ñinimib,” agak. Ñig pak ñel niɲlig gi, kiri aglak, “Pita, nak cinop eip ñin sikol magil eɲap siɲaul midenimin,” aglak. Agel, ñin sikol magil eɲap kirop eip kin midek.

Pita Jerusalem amek nop minim ag gilak

11 ¹Pen Jisas minim dad ameb bi okok abe, karip lim Judia bin bi Jisas nop niɲ dilak okok abe niɲlak, Juda bin bi mer okok ognap God Minim niɲ dilak. ²Nib ak, kisen Pita Jerusalem amek, Juda bi mer okok ak rek nep wak tib gi rik ginimel, agöligipal bi okok, Pita nop kal gil aglak, ³“Nak tari ginig bi wak tib gi rik ma gipal okok karip kiri amil, kirop eip tap jim ñil ñiban?” aglak.

⁴Nib agelak, Pita taun kib Jopa midil nigrikep niɲak kesim ak kirop ag ñilig gi agak, ⁵“Yad taun kib Jopa midil, God nop sobok gi midil, nigrikep niɲnek, seb kab ar alaɲ nib, wad kib alap rek ñon par omal omal gol pis pis tin gil midek yap yap wagin yad midenek siɲak ap yowak. ⁶Apek, yad wad nibak midek ulep siɲak amil niɲnek, kaj, kimin kobri, toi, yakir okok okok magilsek midek. ⁷Pen minim alap yip agak, ‘Pita, nak warikil tap nib piyak okok pak ñiɲan,’ agak.

⁸“Agek, yad pen agnek, ‘Bi Kib. Mer yib! Tari ginig, ñiñan, agil ageban? Cin Juda bin bi tap bil gep nib okok tap ognap ma ñibin yib,’ agnek.

⁹“Nib agenek, minim nibak kauyañ agak, ‘Tap tari tari God tap ñiñeb, agip okok, bil gep, agil ma agninin,’ agak. ¹⁰Gak nibak, yij omal nokim gak. Pen kisen tap wad kib nibak adik gi seb kab ar alañ amnak.

¹¹“Pen magil nibak nep, bi omal nokim karip kin midenek ak apjaklak. Bi nib okok bi kib Konilias, Sisaria nib ag yokek, yip poñ dinig olak. ¹²God Kaun yip agak, ‘Gos par ma niñil, kirop eip abramek amninin,’ agak. Nib agek, yad mam Jisas minim niñ dipal aknib kagol oñid dil, cin bi okok eip Konilias karip ne ak amninok. ¹³Amjakon, Konilias kesim dil agak, ‘Ejol alap apil yip agak, “Bi ognap agenimin, taun kib Jopa amil, bi alap Saimon Pita apal ak nop poñ di dolañ. ¹⁴Poñ di dapel, ne nep minim ognap ag ñek, bin bi karip nak eip midebim okok, God nibep magilsek di komiñ yokek, bin bi ne midenigabim,” agak,’ agak.

¹⁵“Konilias yip nib agek, yad wagin gil minim ag ñen niñlig gi, Kaun Siñ ne cinop ned owak rek, bin bi nib okok kirop ak rek nep owak. ¹⁶Nig gek, Bi Kib cinop ned agak minim ak gos niñnek. Ne agak, ‘Jon kirop ñig pak ñak ak pen mañ mideb, God ne nibep Kaun Siñ ak pak ñinigab,’ agak. ¹⁷Pen cin Bi Kib Jisas Kraiss nup niñ dinok ñin ak, God tap tep yib cinop ñak rek, kirop ak rek nep ñak. Nib ak, yad titi gil God nop, ‘Nig ma ginimin,’ apnep?” agak.

¹⁸Pita nib agek, bi nop minim kal ag gilak okok minim agak ak niñil, minim kal ognap sek ma ag gilak. God yib agel ar amek niñlig gi aglak, “Cinop nep mer; Juda bin bi mer okok ak rek nep, tap si tap timel gipal ak, tari ginig nig gipin, agil, nop sobok genigal ak, ne niñil, tap si tap timel gipal okok kirig gil, komiñ per midep magil ak kirop ñinigab,” aglak.

Adiok bin bi Jisas minim tep ak niñ dilak

¹⁹Pen Stipen nop kab ju pak lilak ñin nab siñak, bi Juda Jerusalem midelak okok, bin bi Jisas nop niñ dilak okok kirop gi timel yib gel, kiri pirik gi ke ke amnilak. Ognap pirik gi karip lim Pönisia amnilak, ognap pirik gi karip lim ñig tib kis gak airan Saipras amnilak, ognap pirik gi taun kib Adiok amnilak. Amil, Jisas minim tep ak Juda bin bi mer okok kirop ma ag ñilak, bin bi kiri ke Juda kai ju am nib okok mideligipal okok kirop nep ag ñilak. ²⁰Pen bin bi Jisas minim tep ak niñ dilak ognap Saipras nib, ognap Sairini taun nib, pirik gi Adiok amil, Bi Kib Jisas minim tep ak Juda bin bi mer okok kirop ag ñilak. ²¹Bi Kib kilis ne ak kirop eip midek ak me, bin bi okok kirop Jisas minim tep ak ag ñel, bin bi korjai nep Bi Kib nop niñ dilak.

²²Pen Jerusalem bin bi Jisas nop niñ dilak okok, minim nibak niñil, bi kiri Banabas nop agel, Adiok amnak. ²³Banabas ne Adiok amjakil niñak,

God ne bin bi nib okok yimiḡ niḡlig gek, Jisas minim tep ak niḡ dilak. Nib ak me, ne miñ miñ gil, kirop minim ognap sek ag ñilig gi agak, “Bi Kib nop niḡ dipim ak ma kirig ginimib; nop nokim nep cibur gos midmagil nibi nab adaḡ niḡ di kilis gil, cig gilig gi nep midenimib,” agak. ²⁴Banabas ne bi tep yib. Kaun Siḡ ne Banabas apil ap ran jakil midek. Ne Jisas minim tep ak pis nep niḡ dak. Ne Jisas minim tep ak bin bi okok ag ñek, bin bi koḡai nep Bi Kib nop niḡ dilak.

²⁵Banabas pen bi Sol nop am donim, agil, taun kib Tasas amnak. ²⁶Banabas Tasas amjakil, Sol nop piyo niḡil, poḡ dil adik gi am Adiok amil, mi nokim nibak bin bi Jisas nop niḡ dilak okok kirop Jisas minim tep ak ag ñilig gi miderek. Adiok bin bi Jisas Kraiss nop niḡ dilak okok, ned yib ñil Kraiss Bin Bi aglak.

²⁷Ñin nab nib siḡak, bi God minim agep ognap Jerusalem nib Adiok amnilak. ²⁸Amil, God Kaun ne bi kiri alap Agabas nop gos ñek agak, “Yuan kib yib karip lim magilsek linig geb,” agak. Agek, agak rek yuan kib yib ak, gapman bi kib Klodias kod midoligip ñin ak owak. ²⁹Nig gil yuan kib lak niḡil Adiok bin bi Jisas nop niḡ dilak okok aglak, “Bin bi Jisas minim tep ak niḡ dipal ognap karip lim Judia okok midel niḡlig gi, kirop yuan kib yib lip ak, cin nokim nokim kirop mani ognap mogim gil ñin,” aglak. ³⁰Nib agil, mani li mogim gil, Banabas eip Sol eip kirop ñil aglak, “Niri bi omal mani aul damil, Kraiss bin bi ne kod midebal bi kib okok kirop ñir,” aglak.

Herod Jems nop ñag pak lil, Pita nop miñ lak

12 ¹Ñin nab nib siḡak, gapman bi kib Herod, bin bi Jisas niḡ dilak okok ognap kirop gi timel gil, dam miñ lak. ²Ami bi ne okok ognap agek, Jon nimam Jems nop tu par kid dil pis nep ñag pak lel kimak. ³Herod agek nig gelak, Juda bin bi okok niḡil miñ miñ gilak. Miñ miñ gilak ak, Herod niḡil, Pita nop ak rek nep agek, nop dam miñ lilak. Gilak nibak, Juda bin bi Bred Yis Sek Ma Ñiḡeb ñin nab siḡak gilak. ⁴Herod Pita nop nig gil dam miñ lil, ami bi aknib jil pis kid adaḡ (16) kirop nonim li yigwu par yigwu par lil agak, “Pib nab kislím eyaḡ bi omal omal nop kod tep gi midenimib,” agak. Herod gos ne ak ke niḡil agak, “Pasopa ñin ak ap padikek me, kisen Pita nop dam bin bi mideniḡal nab siḡak amil minim kib agniḡabin,” agil gos niḡak.

⁵Pita ne nig gil miñ midek niḡlig gi, bin bi Jisas nop niḡ dilak okok Pita nop gos niḡlig gi, kilis gil God nop sobok gilig gi nep midelak.

⁶Pen gapman bi kib Herod Pita nop minim kib agnim, agil, niḡak ñin nibak nep kislím nab eyaḡ, Pita nop sen omal ñon gil, ami bi omal pis kid pis kid niḡ midel niḡlig gi, Pita nab eyaḡ kinek. Ami bi ognap ak rek nep kijon wagiḡ siḡak niḡ midelak. ⁷Pen dai Bi Kib ejol ne alap warik midek niḡlig gi, mab milaḡ rek am miñ lep karip ñilik miḡan ak sikid amnak.

Ejol nibak am Pita nop tiglem pak niñil agak, “Kasek jakan!” agak. Agek, Pita warikek niñlig gi, sen nop ñon gilak ak wisibak.

⁸Ejol Pita nop agak, “Sib nag nak ak pog lil, tob tirip nak piyak di lan,” agak. Agek, Pita ejol agak rek nep gek, ejol ak agak, “Walij par kib nak ak yimek, yad eip amnir,” agak. ⁹Agek, walij par kib ne ak yimil, karip ñilik migan midek ak kirig gil, ejol ak eip pañdirek. Ejol gak nibak, Pita ne ag niñak e, ak nigrikep niñebin agil niñak. ¹⁰Pen ami sikop niñ midelak kijon wagin omal sil gil, kijon kilis yib ain dil gilak kijon sön eyañ ak ke yikek niñlig gi, mis amnirek. Amil, kanib nab okok amlig gi Pita niñak, ejol ak ma midek.

¹¹Nig gek niñil Pita agak, “Miñi niñ rep gipin. Ak Bi Kib nep, ejol ne ak ag yokek, apil gapman bi kib Herod yip miñ kilis lip ak wisib yokip. Gapman bi kib Herod abe, Juda bin bi okok abe, tap timel yip ginig gesal ak, ginimel rek ma lip,” agak. ¹²Nib agil, gos niñ tep gil, bi nak Jon Mak nonim Maria karip ak amnak. Karip nibak bin bi koñai nep apil, God nop sobok gi midelak. ¹³Pita apil, kijon ak pak gu gu gek, pai Roda, karip nibak wög gologip ak kijon ak yikniñ owak. ¹⁴Pai nibak kijon apil niñak, Pita meg migan ak nep agek. Ne nig niñil, miñ miñ yib gil, saköl padek kijon ma yikak; am bin bi okok kirop agak, “Pita ap mideb sön eyañ,” agak.

¹⁵Agek, kiri aglak, “Nak saköl losip ageban,” aglak. Nib agelak, ne kilis yib gil agak, “Esek ma apin; niñid yib agebin. Pita mideb sön eyañ,” agak. Agek aglak, “Ak kaun ne ak rek lip ap mideb,” aglak. ¹⁶Pen Pita ne kijon ak kauyañ pak gu gu gek gek gek, am kijon ak yik yokil niñlak, Pita nep midek niñil wal yib aglak. ¹⁷Wal agel niñlig gi, Pita kirop ñin milic gi ñil agak, “Minim ma agnimib!” agak. Nib agil, miñ lep karip midek niñlig gi, God ejol alap ag yokek apil, nop tari tari gil dowak minim ak kirop ag ñilig gi agak, “Minim nibaul Jems abe, bin bi Jisas nop niñ dipal okok abe, kirop ag ñinimib,” agil, ke migan alap amnak.

¹⁸Minek miñab tikek niñlig gi, ami sikop okok Pita ma midek ak niñil, tari gip, agil, ag ap ran ap yaplig gi midelak. Pirikil, “Akal,” agil, piyolak ak pen ma niñlak. ¹⁹Herod ami sikop nib okok kirop, Pita nop kasek piyo niñil dowim, agek, piyo mer niñel, kirop minim kib agil, minim agek, ami bi ne ognap ami bi nib okok pis nep ñag pak lilak.

Herod kimak

Kisen Herod karip lim Judia kirig gil, am taun kib Sisaria midoligip. ²⁰Herod am Sisaria midil, taun kib omal Taia Saidon bin bi okok kirop niñek milik yowak. Pen Taia Saidon bin bi apil, bi Herod karip ne kod midek bi Blastas nop sil ag ñil aglak, “Cinop per yuan gek, apil Herod karip lim ne aul tap magil tau dad ambin sek. Nib ak, cinop kal kal ma junimib; kapkap jim ñil midojin,” aglak. Agelak, Blastas ne pen agak, “Ak niñid agebim,” agak.

²¹Pen Herod minim nibak niñil, ñin alap minim agnigain, agil, ag lak. Kisen ag lak ñin nibak apek, ne kiñ kai yimbal rek walij tep tep yib okok yimil, sea kiñ kib ne ar ak bisig gil, bin bi okok kirop minim ag ñak.

²²Herod minim nibak ag ñek niñlig gi aglak, “Ak bi alap rek ma ageb; god alap rek ageb,” aglak. ²³Pen Herod minim nibak niñil, “Yip minim nibak rek ma agnimib; God yib ne nep agem ar amnañ,” ma agak. Nib ak, Bi Kib ejol ne alap ag yokek, apil Herod nop gek, miñak kib gil, kiso i lek pis nep kimak.

²⁴Pen God Minim ak ag ñel amek niñlig gi, karip lim okok kid kid amnak.

²⁵Pen Banabas eip Sol eip Jerusalem midil, tari ginig orok ak bir gipir, agil, Jon Mak nop poñ dil adik gi Adiok amnilak.

Banabas eip Sol eip minim ag ñilig gi amnirek

13 ¹Taun kib Adiok nib siñak bi God minim agep bi ognap abe, bi God minim ag ñeb bi ognap abe midelak. Bi nib okok me, alap Banabas; alap Simion. Bi Simion nibak nop Bi Kiñir agöligipal. Bi alap Lusias, ne Sairini taun nib. Bi alap Maneyen, ne Kiñ Herod bi niñeb ne alap. Pen bi alap Sol. ²Pen ñin alap kiri tap magil ma ñibil, Bi Kib nop nep sobok gi midel niñlig gi, Kaun Siñ ne kirop agak, “Ñibi Banabas eip Sol eip agem, wög kirop ag linek ak ger amnimiñ,” agak. ³Nib agek, kiri tap magil ma ñibil, God nop sobok gil, Banabas eip Sol eip kirop ñinmagil ar alañ lil, God kirop mal kod mideñ, agil, kirop ag yoklak.

⁴⁻⁵Kaun Siñ ne kirop kod midek niñlig gi, bi nak Jon Mak, wög cirop sikol sikol ognap gi ñañ, agil, nop poñ di Selusia taun ñig gol eyañ amil, ñig magöb dil, karip lim ñig tib kis gak airan Saipras amnilak. Amil, taun kib Salamis amil, Sol eip Banabas eip Juda mogim gep karip okok amil, bin bi okok kirop God Minim ag ñirek. ⁶Pen bin bi Saipras midelak nib okok kirop God Minim ag ñi dam dam, taun kib Pepos amjakil, Juda bi alap kij coge su juep bi alap nabiñ pakrek. Bi nibak yib ne Ba-Jisas. Ne minim esek agil agak, “Yad God minim agep bi alap,” agak. ⁷Taun kib Pepos siñak, Saipras gapman bi kib yib kin midoligip, yib ne Segias Polas. Bi nibak ne bi gos niñ kid yib yikil niñoligip. Ne Banabas eip Sol eip God Minim yip ager niñin, agil, kirop agek apil, nop God Minim ag ñirek. Pen bi kij coge su juep bi ak ne bi kib nibak bi niñeb ne alap. ⁸Bi Ba-Jisas nibak, Grik minim agil nop Elimas agöligipal. Banabas eip Pol eip kiri Segias Polas nop God Minim tep ak ag ñer, ne timid li peyig niñ tep gak ak pen, bi kij su juep bi ak niñil, Banabas Pol minim timel ke gi agil, Segias Polas Jisas minim ak ma niñ dinimiñ, agil, nop agak, “Bi nib omal minim esek agebir ak ma niñnimin,” agak. ⁹Sol yib ne alap me Pol agöligipal. Kaun Siñ ne Pol nop ap ran jakil gos tep ñek niñlig gi, bi kij su juep bi ak nop niñ i sek li midlig gi agak, ¹⁰“Nak kijeki kiyob ñilik

tik dowak; gi timel nep gipan. Tap tari tari tep mideb ak kirig gil, bin bi okok kirop esek ar ak nep gipan. Nak per per Bi Kib minim niñid ne ak dil minim esek rek lipan. Nak ñin akal gi timel gipan ak kirig ginigan? ¹¹Nig gipan ak, God gek, ñin bad alap udin nep kwoi gek pib melik ma niñnigan,” agak.

Pol minim nibak agek, dai Ba-Jisas niñak, kimi kiñir rek bad alap udin ne pak karikek pis nep kislim gak. Nig gek, bi alap yip ñinmagil di kanib yoman, agil, tig ririkol gilig gi midek. ¹²Banabas Pol kiri bi omal Bi Kib minim ak nop ag ñerek ak niñil, Segias Polas ne wal agak. Nib ak, Ba-Jisas gak ak niñil, ne Jisas nop niñ dak.

Banabas Pol kiri taun kib Adiok, karip lim Pisidia siñak amnirek

¹³Pen Pol bi ne okok eip ñig magöb dil, Pepos kirig gil, Pega taun, karip lim Pampilia siñak amnilak. Am midil, Jon Mak ne kirop mal siñak kirig gil, adik gi Jerusalem amnak. ¹⁴Kiri pen Pega taun kirig gil, taun kib Adiok, karip lim Pisidia siñak amnirek. Am midil, Juda God nop sobok gep ñin ak, Juda mogim gep karip ak amil, bisig miderek. ¹⁵Juda mogim karip kod midelak bi okok warikil, Mosis lo minim ñu kil tikak dai ognap abe, bi God minim agep okok ñu kil tiklak dai ognap abe, udin li niñil bin bi ap midelak okok kirop aglak. Kiri minim ag dai juil, bi alap ag yokel Banabas Pol bisig miderek siñak amil agak, “Mam omal. Bin bi siñ aul niñ dep minim ognap midonimij ak, cinop ag ñer niñin,” aglak.

¹⁶Agelak, Pol warikil minim agniñ ñinmagil dap ranil agak, “Nibi Juda bin bi okok abe, Juda bin bi mer God nop sobok gipim okok abe, minim agniñ gebin aul timid li niñim. ¹⁷God ne birarik nep apis based sikop cin okok dak. God nibak ne Isrel bin bi God cin me. Kisen kiri karip lim Ijip am midelak, God kirop kod mid tep gek, ñi pai tik dapil, koñai yib nep midelak. Bi kib Pero kirop, ma amniñgabim, agak ak pen God kilis ke yib ne ak gil, kirop poñ di dapek Ijip mis ken olak. ¹⁸Kiri mi ñinjuil omal (40) miñ mab kab nep midoligip nab siñak midil, God nop minim koñai yib nep aineb li agölöigipal ak pen God kirop kod mid tep gak. ¹⁹Pen ned karip lim Kenan bin bi tigoñ ke ke akniñ ar oñid midelak, pen God bin bi ne kirop kod mid tep gil kilis ne ñek, bin bi tigoñ ke ke akniñ ar oñid ned midelak okok kirop eip pen pen gil, yik gi yokil ñag pak lil, karip lim nibak karip lim kiri ke rek dilak. ²⁰Kiri Ijip midel mi yinak ak wök pagil, karip lim eywo nep nab okok midel mi yinak ak wök pagil, bin bi yik gi yokil, karip lim kiri dilak mi yinak ak abe wök pagil gel me, mi akniñ po hadred pipti (450) yinak.

“Pen God kirop dam karip lim Kenan siñaul lil, bi minim tig bilokep ognap ag lek, kirop kod midelöigipal. Kisen bi God minim agep Samyuel midek ñin ak, ²¹bin bi Isrel okok kiri Samyuel nop aglak, ‘Nak kiñ alap ag lek, cinop bin bi magilsek kod mideniñgab,’ aglak. Agelak, God bi nak

Kis ñi ne Sol nop ag lek, kiñ kiri midoligip. Bi nibak Benjamin kigin tik damil tik damil tik lilak. Sol kiñ kiri midek, mi ñinjuil omal (40) yinak. 22 Pen kisen God ne gek Sol kiñ ma midek. God ne Depid kiñ kiri ag lak. God ne Depid minim agil agak, ‘Cibur gos midmagil yad ke gos gip rek ak, Jesi ñi ne Depid cibur gos midmagil ne abe akñib rek nep gos gip; tap tari tari gañ ag niñnigain ak, ne nig akñib rek nep ginigab,’ agak.

23 “Pen God ne gek, Depid ñi pai tikek, tik dam dapil gil, Jisas nop tik dolak. Nib ak, God ned minim kilis ag lak rek, ne Isrel bin bi kirop Di Komiñ Yokep Bi alap ag yokak. 24 Pen Jisas wagin gil wög ma gak won ak, Jon ne apil, Isrel bin bi kirop agak, ‘Tap si tap timel gipim ak, tari ginig nig gipin, agil, kirig gem, nibep ñig pak ñinigain,’ agak. 25 Jon wög ne gi dai junig gek ñin nab ak, bin bi okok kirop agak, ‘Nibi yip bi an, agil, gos niñebim? Bi Kib per kod midebim bi ak yad mer. Bi nibak kisen onigab. Tob tirip ne ak di nag wisibnim rek ma lip,’ agak.

26 “Ai mam yad, nibi ognap Ebrahim ñi pai ne midebim; nibi ognap Juda bin bi mer pen God nop sobok gipim. Kraiss bin bi di komiñ yokep minim Jon ag ñi midoligip nibak, God ne cinop nen agil agak. 27 Jerusalem bin bi okok abe, bi kib kiri okok abe, Jisas ne Kraiss ak owip, agil ma niñlak. Jisas nop ñag pak lel kimañ, aglak ak, God minim agep minim ñu kil tiklak rek nep gilak. Pen God nop sobok ginig Juda mogim gep karip per apeligipal ak, kiri minim ñu kil tiklak nibak per per nep niñöligipal. 28 Ne tap timel alap gip aka agil, piyo mer niñil, gapman bi kib Pailot nop aglak, ‘Nak agek nop ñag pak lilañ,’ aglak. 29 Pen God Minim agak rek, magilsek nep Jisas nop gilak. Kisen bin bi ne okok apil, cip se tig asik dam kab migan tigel gilak. 30 Tigel gilak ak pen God gek kauyañ warikak. 31 Ne warikil, komiñ midek niñlig gi, bin bi ne eip Galili nib Jerusalem olak okok, nop ñin koñai nep niñ midelak rek, miñi Isrel bin bi kirop Jisas minim tep ak ag ñebal.

32 “Pen cir bi omal opir aul, nibep Kraiss minim tep ak ag ñinig opir. God birarik nep apis based sikop cin kirop minim kilis ag lil ginigain agak minim nibak nep 33 gos niñ midil, God ne Jisas nop di warik ñak. Gak nibak apis based sikop okok ma niñlak ak pen cin ñi pai tik lep kiri okok miñi bir nipin. Depid ne God Minim dai Sam siñak Kimep yigwu nab nib ñu kil tikil agak,

‘Nak Ñi yad.

Yad miñi Nap nak midebin,’ agak.

34 God ne gek, Jisas warikak ak me, kisen kimil, miñ goñ ki gi yap lig pak amniñig rek ma lip. Minim nibak God Minim dai alap niñgil mideb:

‘Yad Depid nop minim siñ kilis niñid ag linek ak nibep nep ñinigain,’ agak.

35 Pen God Minim dai alap niñgil mideb:

“ ‘Nak Bi Siñ nak kirig gek,

mib goṅ ne ki gi yap lig pak ma amniniṅ, agak.

³⁶“Pen Depid ne God wög nop ag lak ak, bin bi ne mideligipal ñin nibak gi damil kimak. Pen Depid ne kimek, nap nised sikop kirop tigel göligipal okok dam tigel gel, mib goṅ ne ki gi yap lig amnak. ³⁷Pen God ne gek warikak Bi nibak, mib goṅ ne ki gi yap lig ma amnak.

³⁸“Ñib ak, midemam niṅim. Jisas ne kimil warikak ak me, God tap si tap timel gipim ak niṅil kirig ginigab minim tep ak nibep ag ñobir. ³⁹Cin Juda lo minim ar ak nep niṅil genigabin ak, God tap si tap timel gipin ak niṅ nep midenigab. Pen Jisas mab bak alaṅ ñag pak lel kimak ak me, cin Jisas nop niṅ donigabin ak, God tap si tap timel gipin ak niṅil, kirig gil, cinop bin bi tep yad, agnigab. ⁴⁰Pen bi God minim agep okok birarik nep aglak rek cinop ma ginimiṅ, agil gos ak niṅ rep ginimib. Kiri aglak,

⁴¹ ‘Ñibi bin bi yip aleb aleb ñibim okok niṅim!

Ñibi midebim magil aul, tap ke nib alap ginigain.

Tap ginigain nibak nibep ned agenigal ak,
ñiñiloṅ li agebal, ag gos niṅnigabim.

Ñib ak, nibi pak jep jep dil

pis nep kim kir ginimib!’ aglak,” agak.

⁴²Pol eip Banabas eip minim nibak agil, Juda mogim gep karip nibak mis amer niṅlig gi, bin bi okok aglak, “God nop sobok gep ñin kisen ak kauyaṅ apil, cinop minim nibak ognap sek ag ñir,” aglak. ⁴³Bin bi okok mogim gi midelak okok karip ak kirig gil, ke ke amel niṅlig gi, Juda bin bi yipid gil ognap abe, bin bi okok nib Juda kai niṅ döligipal rek niṅ dilak ognap abe, Pol eip Banabas eip kirop kisen gil amnilak. Pol Banabas kanib nab siṅak amlig gi kirop agrek, “ ‘God cinop yimig niṅil di tep gip,’ agil, gos ar nibak nep niṅlig gi midenimib,” agrek.

⁴⁴Pen Juda God nop sobok gep ñin kisen ak, bin bi taun kib nibak midelak okok magilsek rek, Bi Kib minim niṅnig ap mogim gilak. ⁴⁵Pen Juda bi kib okok bin bi koṅai sikerek olak ak niṅel, milik yapek, Pol Banabas kirop bi omal niṅil gos timel niṅlak. Pol minim tari tari bin bi okok kirop agak ak ag juil, yib ne ak ag sikol gilak. ⁴⁶Juda bi okok nig gelak, Pol eip Banabas eip ma pirikil, minim pen kilis gil agrek, “God Minim tep ak nibep Juda bin bi ned ag ñir, apir ak pen nibi minim tep nibak ma dil, cin komiṅ per midep magil ak niṅ diṅin rek ma lip, apim ak me, miñi Juda bin bi mer okok kirop ag ñinigabir. ⁴⁷Tari ginig: Bi Kib cinop agil minim nig gil agak,

‘Yad agen, nibi Juda bin bi mer okok kirop melik kiri midil,
karip lim ke ke okok amenigabim,

bin bi okok magilsek melik nibak niṅel niṅlig gi,
yad kirop di komiṅ yoknigain,’ agak,” agak.

⁴⁸Juda bin bi mer okok minim nibak niṅil, miñ miñ gil, Bi Kib minim ak, minim tep aknib ke yib, aglak. Ñib ak, bin bi God, per per midenimel, agil, ag lak okok magilsek minim tep nibak niṅ dilak.

⁴⁹Pen Bi Kib minim ak, karip lim nib okok magilsek agel amnak. ⁵⁰Nig gak ak, Juda bin bi okok niñel milik yapek, amil Adiok bin pobiñ God nop niñ dilak ognap abe, bi pobiñ karip lim nibak kod mideligipal okok ognap abe, kirop agel, kiri amil bin bi koñai nep dapil, Pol eip Banabas eip kirop gi timel gil, karip lim kiri okok ag mis yoklak. ⁵¹Nig gil ag mis yokel, bi omal kiri Adiok kirig amlig gi, minim tep dam ag ñosir ma dipim, agil, tob kiri acip acip okok lig gi yokil amil, taun kib Aikoniam amnirek. ⁵²Pen Kaun Siñ ne bin bi Jisas nop niñ dilak okok ap ran jakek, kiri miñ miñ yib gilig gi midelak.

Pol eip Banabas eip taun kib Aikoniam ajerek

14 ¹Pol eip Banabas eip am taun kib Aikoniam kin midil, Juda mogim gep karip ak amil, minim ag ñi tep ger niñlig gi, Juda bin bi okok lil, Juda bin bi mer okok lil, koñai nep Jisas nop niñ dilak. ²Pen Juda bin bi ognap, Jisas minim agebir ak ma niñ dinigabin, agil, amil Juda bin bi mer okok kirop minim niñep ma niñep tom agelak niñil kiri bin bi Jisas niñ dilak okok kirop niñel milik kal yowak. ³Pen Pol eip Banabas eip, minim nibak niñil, karip lim nibak ma kirig amnirek. Kiri siñak nep kin midil, Bi Kib minim ak kilis gil miseñ nep ag ñöligipir. Bi Kib kirop mal eip kod midek niñlig gi, tap ma gep rek ognap, tap niñep ma niñep rek ognap gerek, bin bi ognap niñil aglak, “Nib ak, minim agebir nibaul niñid nep agebir,” agil niñlak. ⁴Pen Aikoniam bin bi nib okok asik ke ke lil, pis ak Juda bin bi okok minim aglak rek niñ dilak, pis ak bi Jisas minim dad ameb okok aglak rek niñ dilak. ⁵Pen Juda bin bi ognap okok lil, Juda bin bi mer ognap okok lil, bi pobiñ kiri okok abe, Pol eip Banabas eip kirop gi timel gil, kab ju pak lin, agil, gos ak niñelak. ⁶Kiri mal pen minim nibak niñil, pirik gi am taun kib omal Listra Debi, karip lim Likonia siñak amnirek. ⁷Amil, nib okok gi ajlig gi, Kraiss minim tep ak ag ñöligipir.

Bi tob timel gak alap, Pol gek, komiñ lak

⁸Pen taun kib Listra nibak, bi alap nonim nop tik dowak ñin ak nep tob timel gek, kanib ma tagoligip bi alap midoligip. ⁹Bi nibak ne ap bisig midil, Pol minim agek ak niñ midek. Pol bi nibak nop niñ i sek lil gos niñak, bi nibaul, God yip gek komiñ linimiñ rek lip, ag gos niñeb, agil gos niñak. ¹⁰Nib ak, Pol nop niñil, meg miñan dap ranil agak, “Warikan!” agak. Agek, bi nibak kasek warikil, tob taulig gi amnak.

¹¹Pol nig gek, bin bi niñ midelak okok minim yib kiri Likonia minim ak agil aglak, “Bi seb kab ar alañ nib okok, god omal bin bi rek lil ap agebir aul,” aglak. ¹²Nib agil, Banabas nop, god Sus, aglak. Pen Pol ne minim koñai nep agoligip rek, nop, god Hemis, aglak. ¹³God esek Sus sobok göligipal nibak, sobok gep karip ak yokop gi lilak taun gol nib siñak me, god esek Sus sobok gep bi kib ak abe, bin bi

siŋak midelak okok abe, god Sus per sobok gipin ak miñi owip aul, agil, kaj kau anŋlam ognap dil, mab sim tep tep ognap tig rik dil, bin bi koŋjai yib olak.

¹⁴Pen Pol eip Banabas eip, gelak nibak niŋil, waliŋ kiri okok tig bil bil gil, bin bi koŋjai nep midelak nab nib siŋak amil agrek, ¹⁵“Nibi tari ginig nig gebim? Cir mal god mer! Nibi bin bi yib midebim rek, cir ak rek nep aknib rek midobin. Cir Jisas Kraiss minim tep ne ak nibep ag ñinig opir. God ne seb kab alaŋ gi lil, lim dai wagin aul gi lil, ñig solwara ak gi lil, tap tari tari mideb okok magilsek gi lil, gak. Cir nibep Kraiss minim tep ak agor, tap yokop esek sobok gi midebim okok kirig gil, God komiŋ mideb ak nep sobok gi midenimib, agil, nibep agobir. ¹⁶Pen ned bin bi kariŋ lim ke ke okok midil, gos kiri ke niŋil tap yokop sobok gilak ak, God niŋil kirop gi timel ma gak. ¹⁷Pen nibi yokop ma midebim; nop niŋniŋ, niŋniŋabim. Ne per per nibep di tep gip. Ne nep gek, miñab pakil, tap magil koŋjai nep midek niŋlig gi, miñ miñ gilig gi tap ñib midebim. Nib ak, ne nig gip ak niŋil, niŋid nep God cin mideb ak, agil, bir nipkep,” agrek. ¹⁸Nib agrek ak pen bin bi nib okok kilis gil, bi nib omal aul seb kab ar alaŋ nib opir, agil, kaj kau anŋlam ognap pak sobok gi ñinig gelak ak niŋil Pol Banabas koslam yib ag mer agrek.

Pol nop kab ju paklak

¹⁹Pen kiri mal taun kib Listra nibak nep midel niŋlig gi, Juda kai taun kib Adiok, kariŋ lim Pisidia siŋak mideligipal bin bi ognap abe, taun kib Aikoniam mideligipal bin bi ognap abe apil, bin bi nib okok kirop minim esek agil aglak, “Bi omal minim tep ma agebir; esek agebir,” aglak. Nib agelak, bin bi nib okok niŋil, Pol nop kab ju pak lil, pis nep kimib, agil, lip gi dam kab wari kis kis gilak ak mis ken kideyaŋ yoklak. ²⁰Nig gelak niŋil bin bi Jisas nop niŋ dilak okok apil piŋil kis kis gel niŋlig gi, Pol warikil taun kib nab nibak adik gi amnak. Pen minek Pol eip Banabas eip Listra kirig gil Debi amnirek. ²¹⁻²²Pol eip Banabas eip Debi amil, Jisas minim tep ak bin bi okok kirop ag ñerek, bin bi koŋjai nep Jisas nop niŋ dilak. Pen kiri mal, ned orok kanib ar ak nep amnir, agil, adik gi Listra, Aikoniam, Adiok kariŋ lim Pisidia siŋak amlig gi, bin bi Jisas minim tep ak ager niŋ dilak okok kirop kauyaŋ ag ñi tep gilig gi amnirek. Kirop ag ñi tep gilig gi agrek, “Jisas minim tep ak ma kirig ginimib; niŋ dipim rek nep niŋ dil midenimib. Nig gem, nibep miker koŋjai ñinigal pen gos ak ma niŋniŋimib; God cinop dil kod midenigab, agil, kilis gil, gos ar ak nep niŋjem amniŋiŋ,” agrek. ²³Nib agil, coc ke ke nib okok, bin bi Jisas niŋ dilak okok bi nabic midenimel, agil, bi ognap wog nibak ag lirek. Nig gil, kiri mal tap magil ma ñibil, God nop sobok gilig gi agrek, “Bi Kib, bi siŋ aul nep niŋ dipal rek, kirop kod midenimin,” agrek.

Pol eip Banabas eip taun kib Adiok, Siria Propins siŋak amnirek

²⁴Nig gil kariŋ lim Pisidia okok ajil, kariŋ lim Pampilia amnirek. ²⁵Pampilia amil, Jisas minim tep ak bin bi Pega taun okok kirop ag ñil, taun kib Atalia amnirek.

²⁶Atalia amil, ñig magöb dil, taun kib Adiok, Siria Propins siñak, ned kin midil orek siñak adik gi amnirek. Kiri ned amniğ gerek minek ak, Adiok bin bi Jisas nop niñ dilak okok, God nop sobok gil aglak, “Minim tep nak ak bin bi okok kirop ag ñiniğ amebir rek, kirop mal kod mid tep genimin,” agil, kirop mal ag yokel, amil, minim nibak ag ñi ajöligipir. ²⁷Ñib ak, adik gi Adiok apil, bin bi Jisas nop niñ dilak okok kirop sik agel apelak, God ne gek kiri tari tari gilak okok magilsek ag ñi tep gilak. Juda bin bi mer okok koñai nep Jisas minim tep ak niñ dilak kesim ak abe ag ñilak. ²⁸Kirop nig gil ag ñil, kirop eip ñin bad alap tapin miderek.

Bi kib Jerusalem ap mogim gil minim aglak

15 ¹Pen bi ognap karip lim Judia nib Adiok apil, bi Juda mer Jisas nop niñ dilak okok kirop ag ñilak, “Mosis birarik nep cinop Juda bin bi agak, ‘Ñiñan kisen tik dapil, wañ wak kiri tib gi rik ginimib,’ agak. Nib ak, nibi ak rek nep wak tib gi rik ma ginigabim ak, God nibep di komiñ ma yoknigab,” aglak. ²Ñib agelak, Pol eip Banabas eip minim ak yipid gil ma agebal, agil, kirop eip minim pen pen agel amnak. Niğ gelak, Adiok bin bi Jisas nop niñ dilak okok, bin bi kiri ke ognap abe, Pol Banabas bi omal abe ag lil aglak, “Ñibi Jerusalem amil, minim nibaul dam, bi Jisas minim dad ameb okok abe, Jisas bin bi ne okok kirop kod midebal bi okok abe kirop ag ñem, kiri pen ag amil apil gil gos tari niñnigal ak, adik gi ap agem niñin,” aglak. ³Ñib agil, kirop ag yokel, kiri am karip lim Pönisia nab siñak amlig gi, Juda bin bi mer okok Jisas nop niñ dilak minim nibak ag ñel niñlig gi, ai mam niñil magilsek miñ miñ gilak. Karip lim Pönisia nibak kirig gil, kiri amil karip lim Sameria nab siñak amlig gi, minim ak rek nep ag ñel niñlig gi, ai mam okok ak rek nep niñil miñ miñ gilak. ⁴Pen kiri karip lim Sameria kirig gil, amil Jerusalem amjakerek, bin bi Jisas nop niñ dilak okok abe, bi Jisas minim dad ameb okok abe, Jisas bin bi ne okok kirop kod midelak bi okok abe, kirop ag wasu dil use tep apebim e aglak. Agelak, Pol eip Banabas eip, God ne gek tap tari tari girek ak magilsek kirop ag ñi tep girek.

⁵Ñib agerek, Perisi bi Jisas nop niñ dilak okok ognap warikil aglak, “Juda bin bi mer okok Jisas nop niñ dinigal ak, wak tib gi rik gil, Mosis lo agak agak rek nep gilañ,” aglak.

⁶Ñib agelak, bi Jisas minim dad ameb okok abe, Jisas bin bi ne kod midöligipal bi okok abe, minim nibak ag tep gin, agil, ap mogim gilak. ⁷Ap mogim gil, minim nibak ag amil apil gi midel niñlig gi, Pita warikil agak, “Mam sikop. Nibi nipim, ned God cinop nonim lil, Juda bin bi mer okok Jisas minim tep ak niñ dinimel, agil, yip ag lek, yad am kirop Kraiss minim tep ak ag ñi ajpin. ⁸God gos timid midmagil cin magilsek niñip ak, Kaun Siñ cinop ñak rek, Juda bin bi mer okok kirop ak rek nep ñak. Niğ gak ak cin nipin, ne kirop abe di tep gip. ⁹Cinop Juda kai minim

alap ke agil, Juda bin bi mer okok kirop minim alap ke agil ma gip. Kraiss minim tep ak niŋ dipal ak me, God ne tap si tap timel gipal gac midmagil kirop nab adaŋ mideb ak lig gi yokip. ¹⁰ God Juda bin bi mer okok pis nep dip rek, nibi tari ginig neb neb gilig gi agebim, ‘Mosis lo minim nu kil tikil agak agak rek nep, lo sikol alap ma ginigabim ak, God nibep di komiŋ ma yoknigab,’ agebim? Asik mosik gi rep ginimib, apim ak, apis based sikop gi mer niŋlak. Cin ak rek nep gi mer nipin ak pen miŋi Juda bin bi mer, Jisas nop niŋ dipal okok kirop, miker nibak dinimel, agil, agebim ar? ¹¹ Ak tep mer. Bi Kib Jisas cinop Juda kai yimig niŋip ak, wagin nokim nibak nep me, Bi Kib Jisas ne ke gek, cin nop niŋ don, cinop di komiŋ yoknigab. Nib aknib rek nep, Bi Kib Jisas Juda bin bi mer okok kirop yimig niŋip ak, wagin nokim nibak nep me, Bi Kib Jisas ne ke gek, kiri nop niŋ del, kirop ak rek nep di komiŋ yoknigab,” agak.

¹² Pen bin bi ap midelak okok magilsek, minim alap agil mer, kapkap midel niŋlig gi, Banabas eip Pol eip kirop kesim dil, kiri mal karip lim ke tigoŋ tigoŋ amlig gi, Juda bin bi mer okok Jisas minim tep ak ag ni ajerek niŋlig gi, God ne tap ma gep rek okok, tap niŋep ma niŋep okok gak ak, kesim ar nibak magilsek kirop ag ni tep girek. ¹³ Pen bi omal minim ag dai juer niŋlig gi, Jems warikil agak, “Mam sikop. Minim agniŋ gebin aul niŋim! ¹⁴ God Juda bin bi mer okok kirop yimig niŋil di tep gil, bin bi yad ke mideniŋal, agil, bir dip ak, Saimon miŋi nep minim agosiŋ ak nipin. ¹⁵ God gip nibak, God minim agep okok birarik nep agil nu kil tiklak rek nep gip. Minim nibak nu kil tikil aglak,

¹⁶ ‘Bi Kib ne ageb,

“Kisen yad adik gi apil,

Depid karip pag ajil gi pag jisipik masipik gi yowip ak,
yad ke kauyaŋ gi tep gen, kilis yib gi mideniŋal.

¹⁷ Nib ak, Juda bin bi mer karip lim ke okok nib okok nib,
ognap bin bi yad mideniŋal apin okok, yip piyo niŋniŋal.

¹⁸ Tap tari tari kisen ginigab ak,
yad birarik ped okok ag linek. Yad Bi Kib nibak nep minim aul
agebin,” ageb,’ aglak,” agak.

¹⁹ Jems minim nibak agil agak, “Gos yad nipin ar ak, Juda bin bi mer Jisas nop niŋ diniŋal okok, kirop miker ognap ma niŋin. ²⁰ Pen kirop miŋ nu kil tik yokil agin, ‘Bin bi ognap tap yokop god esek okok sobok gi niŋig, kimin kaj tap okok pakenimel, nibi ma niŋnimib. Bin si bi si ma ginimib. Kimin kaj tap okok kiŋam tig kibor juel kimonimniŋ ak, ma niŋnimib. Kimin kaj tap okok lakaŋ ak ma niŋnimib,’ agin. Minim ognap sek ma agin. ²¹ Pen ti ginig: based sikop birarik nep gilak rek, miŋi ak rek nep taun tigoŋ tigoŋ magilsek, God nop sobok gep niŋ ak Juda mogim gep karip ak am mogim gil, per per minim Mosis agil nu kil tikak ak udiŋ li niŋoliŋipal,” agak.

Juda bin bi mer okok kirop mij ñu kil tikil yoklak

²²Jems nib agek, bi Jisas minim dad ameb okok lil, bi Jisas bin bi ne okok kirop kod midelak bi okok lil, bin bi Jisas nop niñ dilak okok magilsek lil, aglak, “Cin bi cin ognap ag lon, Pol Banabas bi omal eip Adiok amnilañ,” aglak. Nib agil, bi Jisas bin bi ne okok kod midelak bi omal Judas Basabas eip, Sailas eip, kirop ag lilak. ²³Mij alap ñu kil tikil, Pol Banabas bi ñon ñilak. Mij nig gil ñu kil tiklak:

Mam sikop, nibi midebim?

Cin namam nibi, bi Jisas minim dad ameb okok abe, Jisas bin bi ne okok kirop kod midebir bi omal ak abe, nibep Juda bin bi mer taun kib Adiok abe, Siria Propins abe, Silisia Propins abe midil Jisas nop niñ dipim okok, mij ñu kil tikil yokobin. ²⁴Ti ginig: minim alap owip nipin, bin bi cin siñ aul ognap, cinop ag niñil mer, gos kiri ke ak nep niñil, amil minim kib nibep gos par linimib rek minim ognap nibep ag ñilak. ²⁵Nib ak, cin bi ognap cin ke ag lon, bi midmagil cin tep yib Pol Banabas bi omal kabsek ninigal. ²⁶Pol Banabas bi omal okok ajil, bi okok cirop ñag pak linigal, agil, gos ar ak rek ma nipir. Bi Kib Jisas Kraiss minim tep ne ak bin bi okok kirop ag ñir, agil, gos nokim nibak nep niñil, abramek ag ñi tep gilig gi ajöligipir. ²⁷Judas Sailas bi omal ag yoknig gebin. Kiri amil mij ñu kil tikobin aul minim ar ak nep nibep ag ñi tep ginigair.

²⁸Cin mogim gil, minim nibak ag amil apil gon niñlig gi, Kaun Siñ ne cinop gos tep ñek, mij ñu kil tikil miker ognap nibep ma ñinigabin, agil, ag lipin. Yokop minim omal nep agnigabin, agil, ag lipin. ²⁹Bin bi ognap tap yokop god esek okok sobok gi ñinig, kimin kaj tap okok pakenimel, nibi ma ñinimib. Kimin kaj tap okok lakañ ak ma ñinimib. Kimin kaj tap okok kinjam tig kibor juel kimonimiñ ak, ma ñinimib. Bin si bi si ma ginimib. Tap agobin aul kirig ginigabim ak, gi tep ginigabim.

Minim bir apin me ak. Nibi mid tep ginimib.

Mij ñu kil tiklak ak me ak.

³⁰Mij nibak ñu kil tikil bi okok ñel, kiri Jerusalem kirig gil, taun kib Adiok, Siria Propins okok adik gi amnilak. Amjakil, bin bi Jisas nop niñ dilak okok agel, magilsek ap mogim gelak niñil mij dolak ak ñilak. ³¹Mij ñel, bin bi kiri minim nibak uñin li niñel, kirop tep yib gek, gos sek midil cibur kirop miñ miñ yib gak. ³²Judas Sailas bi God minim agep bi omal miderek ak me, ñin bad alap Adiok kin midil, Jisas bin bi ne okok kirop minim koñai nep ag ñi tep ger niñlig gi, kiri Jisas minim tep ne niñ di kilis gil gos sek midelak. ³³⁻³⁴Nig gil ag ñi dai juil, amnig ger niñlig gi, bin bi Jisas nop niñ dilak nib okok ap mogim gil, sobok gilig gi, Bi Kib kirop mal kod mid tep gek, kiri kapkap mid tep gir, agil, kirop mal ag yoklak. ³⁵Pen Pol eip Banabas eip Adiok siñak kin midil, bi nib okok nib bi ognap eip, Bi Kib minim tep ak bin bi okok kirop ag ñilig gi miderek.

Pol Banabas ke ke amnirek

³⁶Pen mid damil, Pol ne Banabas nop agak, “Cir mal ned tagil Bi Kib minim agor amnak karip lim okok, niņ di kilis gilig gi nep midebal aka agil, am niņil owir,” agak. ³⁷Agek, Banabas agak, “Niņ ak, Jon Mak nop abe poņ di dad amnir,” agak. ³⁸Agek, Pol agak, “Ni nibak ned poņ di dad amor, wög gi sakil ma owak; ne Pampilia nep amil kirig amnak. Niņ ak, miņi nop poņ di ma dad amnigabir,” agak. ³⁹Pol niņ agek, kiri mal ke nep pen pen agil, Banabas ne Jon Mak eip niņ magöb dil, karip lim niņ tib kis gak airan Saipras amnirek. ⁴⁰Pol ne pen Sailas nop dak. Bin bi Jisas nop niņ dilak okok, sobok gil, Bi Kib ne Pol Sailas kirop mal kod mideņ, agil, bi omal ag yoklak. ⁴¹Pol ne Siria Propins okok abe, Silisia Propins okok abe gi taglig gi, bin bi Jisas nop niņ dilak okok kirop God Minim ognap sek ag niņ tep gek, kiri niņil niņ di kilis gi midelak.

Pol karip lim ajoligip okok kauyaņ adik gi amnak

16 ¹Pol Sailas kiri mal tag tag lil, Debi amil, Litra amjakrek. Karip lim niņ okok Jisas nop niņ dak bi alap midek; yib ne ak Timoti. Bi nibak nonim ne ak Juda niņ bin alap pen Jisas nop niņ dak. Nap ne ak Grik niņ bi alap. ²Listra bin bi Jisas nop niņ dilak okok abe, Aikoniam bin bi Jisas nop niņ dilak okok abe, Timoti bi tep aglak. ³Pol pen, Timoti yad eip Jisas minim ak ag niņ ajojir, agil gos niņak ak pen, Juda bin bi okok agnigal, “Timoti nap ne ak Grik bi alap rek, niņ ne wak tib gi rik ma gak rek, minim ne ak ma dobin,” agnigal, ag gos niņil, Timoti nop dad amek wak tib gi rik gilak. ⁴Pol Sailas Timoti kiri taun taun okok gi ajlig gi, bi Jisas minim dad ameb okok abe, bi Jisas bin bi ne okok kirop kod midelak bi okok abe, Jerusalem siņak mogim gil minim tari tari aglak ak, bin bi Jisas nop niņ dilak okok kirop ag niņ, niņ ginimib, aglak. ⁵Niņ gil tigoņ tigoņ gi taglig gi, bin bi Jisas nop niņ dilak okok, kirop Jisas minim tep ak ag niņ tep gel, kiri minim nibak niņ dil, kilis gil, ne agak rek nep gi midelak. Niņ nokim nokim per per bin bi ognap sek Jisas minim tep ak niņil, Jisas nop niņ dilak.

Pol nigrikep niņak

⁶Pol bi ne okok eip Esia Propins midebal bin bi okok kirop Kraiss minim tep ag niņ, agil, amniņ gelak ak pen Kaun Siņ ne, ma amniņib mer, agak. Niņ ak, karip lim Prijia nab okok tagil, Galesia Propins nab okok taglig gelak. ⁷Kiri am am, karip lim Misia maņ maņ aplig gi, Bitinia Propins amniņ agelak ak pen Jisas Kaun ne kirop, ma amniņib mer, agak. ⁸Jisas Kaun ne niņ agek, kiri Bitinia Propins ma amniņlak; karip lim Misia nab siņak amlig gi taun kib Troas amniņlak. ⁹Troas amil, kislim nab eyaņ Pol nigrikep niņak, bi Masedonia Propins niņ alap warik midil, nop

minim neb neb gi agil agak, “Nak ñig juil pis aul Masedonia apil, cinop gi ñinimin,” agak. ¹⁰Pol nig gi nigrikep ñjek, cin agnok, “Ak God nep, Masedonia bin bi kirop Jisas minim tep ak am ag ñim, ag ñosip,” agil, magil nibak nep Masedonia amñig gi tap gi jin ginok.

Bin Lidia Jisas nop niñ dak

¹¹Amil ñig magöb dil, Troas kirig gil, karip lim ñig tib kis gak airan Samotres amninok. Minek pen Samotres kirig gil, Niapolis taun amjaknok. ¹²Ñig magöb dil, Pilipai, Masedonia Propins nab siñak amjaknok. Rom gapman bin bi koñai nep amil, Pilipai midil, kod mideligipal. Nib ak, karip lim nab siñak Pilipai taun kib yib midek. Cin ñin bad alap Pilipai okok kin midonok. ¹³Juda God nop sobok gep ñin ak, God nop sobok gep kau alap midenigab, agil, taun kijon kirig gil, ñig gol ar eim amninok. Amil niñnok, bin ognap ap midelak. Nib siñak bisigil, kirop minim ag ñinok. ¹⁴Bin niñ midelak nib okok, bin alap taun kib Taiataira nib, yib ne ak Lidia. Ne walij mik okok gi lek, taeligipal. Ne God nop sobok goligip. Bi Kib ne bin nibak nop gos tep ñek, Pol minim tep agak ak, niñid ageb, agil, niñ dak. ¹⁵Pen Lidia abe, bin bi karip ne eip kinlak okok abe, kirop ñig pak ñon, Lidia agak, “Yad Bi Kib yipid gil niñ dipin, agil niñim ak, nibi apil karip yad kin midenimib,” agak. Cinop nib agek, minim ne dil, am karip ne ak kin midonok.

Pol Sailas kirop mal miñ lilak

¹⁶Cin minek alap God nop sobok gep kau ak amil, pai miñ wög gep alap nop nabiñ paknok. Pai nibak nop kijeki abañ ñagek, tap tari tari kisen ginigab ak, bin bi okok kirop ag ñek, nop mani ñöligipal. Ne nig gek, bi nop tau dapel, miñ wög kirop goligip bi okok mani kib döligipal. ¹⁷Cin amonok niñlig gi, pai nibak cinop kisen gilig gi agak, “Bi siñ aul, God ar i oklañ mideb ak nop wög gipal. God titi gil nibep di komiñ yoknigab, minim ar nibak nep nibep ag ñebal,” agak. ¹⁸Pen pai ak minim nibak rek per per agek agek agek, ñin alap Pol nop yirik yib gek, adik gil kijeki pai abañ ñagak ak nop agak, “Jisas Kraiss yib ne ak niñil, pai nibaul nop kirig gil mis amnon!” agak. Dai kijeki nop abañ ñagak ak, sön amnak.

¹⁹Pen pai nibak nop mani tael, kirop miñ wög goligip bi okok, Pol kijeki ag yokak minim ak niñil, mani kib dipin ak kisen ma dinigabin, agil, Pol Sailas kirop mal di cici dil, Rom bi pobiñ midelak okok minim kib agnig, lip gi dam minim agep kau ak amnilak. ²⁰Rom bi minim tig bilokep bi pobiñ okok minim kib agil aglak, “Bi omal aul bi Juda nib. Taun kib cin aul apil ger, cin bin bi karip lim cin nap nib aul ger, milik kal yowip. ²¹Cin Rom bin bi minim ned nib ar ak ke mideb, pen kiri minim kisen nib minim cin ma niñep ar ak, niñil ginimib, agil, ag ajebir,” aglak.

²² Bin bi niņ midelak okok ak rek nep, minim ar nibak nep agil, Pol Sailas kirop mal minim kib agel, bi minim tig bilokep bi pobiņ okok aglak, “Waliј kirop mal okok tig juil, yir di pakim,” aglak. ²³ Agel, yir di pak adik madik gil, dam miņ lep karip nilik migan ak yokil, bi miņ lep karip kod midek ak nop aglak, “Kirop mal niņ tep gi midenimin,” aglak. ²⁴ Agel, bi miņ lep karip kod midoligip ak, kirop mal poņ di dam karip nilik migan yib siņak eyaņ lil, tob kid kirop mal di mab kib migan ak yokel amek, pak ribik wos gak.

²⁵ Pen kislīm nab kib eyaņ, Pol Sailas kiri mal God nop sobok gilig gi, kimep ognap ag miderek niņlig gi, bi nagiman ognap kiri peyig niņ midelak. ²⁶ Niņ gerek niņlig gi, dai monmon kib yib ak dil, miņ lep karip ak sek tig jinomno gil, kijon okok ke yikil, bi nagiman okok kirop sen non gilak okok magilsek wisibak. ²⁷ Niņ gek, bi nagiman okok kirop kod midek bi ak warikil niņak, kijon okok magilsek yikil midek. Ne niņil, “Bi nagiman okok, kijon yikek, pirikil am sakpal rek, bi kib yad ak yip naņ pak linigab,” agil, tu par kid ne ke ak tig lip gi dil, ne ke piņil linig gek. ²⁸ Pol pen nop sik kib par agil agak, “Tari ginig nak ke piņil linig geban? Cin ma pirik gi ambin. Magilsek midobin aul,” agak.

²⁹ Pol nib agek, nagiman kod midek bi ak sik agil agak, “Sip kasek dowim,” agak. Agek, sip dapel, ne dad pig gi rikid agil karip nilik migan eyaņ amil, jel gek, gil gil gilig gi, amil Pol Sailas miderek wagin siņak kogim yimak. ³⁰ Pen niņ gil kogim yimil, warikil, kirop mal poņ di mis eyaņ amil agak, “Bi kib tep yad omal, yad tari gen, God yip di komiņ yoknimiņ?” agak.

³¹ Agek, nop agrek, “Bi Kib Jisas nop niņ denigan ak, nak ke abe, bin bi nak eip kin mideban okok abe, nibep di komiņ yoknigab,” agrek. ³² Nib agil, bi nibak nop abe, bin bi ne eip kin midelak okok magilsek abe, kirop Bi Kib minim tep ak ag nirek. ³³ Nib ag ner, kirop mal kislīm nab kib eyaņ nep damil, miņ goņ paklak okok niņ li yokak. Niņ gek, magil nibak nep nop abe, bin bi ne okok abe, kirop magilsek niņ pak nirek. ³⁴ Kirop magilsek niņ pak ner, bi nagiman okok kirop kod midek bi ak, kirop mal poņ di dam karip ne damil, tap magil nek, niņerek. Bi nibak ne ke abe, bin ni pai ne okok abe, miņi cin God nop niņ dipin, agil, miņ miņ yib gilig gi midelak. ³⁵ Minek pen, Rom bi kib okok polisman okok kirop aglak, “Bi miņ midebir omal kirop wisib yokem amnir,” aglak. ³⁶ Agel, bi nagiman okok kirop kod midek bi nibak, minim nibak dam Pol Sailas miderek siņak amil agak, “Minim tig bilokep bi kib okok nirep apal, ‘Wisib yokem amnir,’ apal. Nib ak, niri mal amnir. Bi Kib nirep kod mid tep gek, kapkap mid tep gi midenimib!” agak.

³⁷ Agek, Pol agak, “Cir mal ak rek nep bi Rom nib omal pen minim kib niņil mer, bin bi nab siņak cirop mal yir di pak adik madik gil, dam miņ lipal ak, tep ma gip. Nib ak, cirop mal kapkap we gil ag yokin, agil,

agebal ar? Bi kib okok kiri ke miñ lep karip aul apil, cirop bi omal poŋ di damil, kausek sön eyaŋ amnin,” agak.

³⁸Pol nib agek, polisman okok minim nibak niñil, adik gi amil minim tig bilokep bi kib okok kirop ag ñel, Pol Sailas kiri Rom nib bi omal minim ak niñil, piriklak. ³⁹Pirikil, kiri am Pol Sailas kirop bi omal poŋ di damil, kausek sön eyaŋ amil, minim sain sain agil aglak, “Nirep mal tep gonimiŋ ak, taun kib nibaul kirig gil amnimir,” aglak. ⁴⁰Pol Sailas miñ lep karip ak kirig gil, bin Lidia karip ak am midil, bin bi Jisas nop niŋ dilak okok eip mogim gil, Bi Kib minim tep kirop ag ñel, kiri niñil, minim tep nibak dil, gos sek midil, miñ miñ gilak.

Tesalonaika bin bi Pol Sailas kirop mal ñag pak linig gelak

17 ¹Pen Pol Sailas kiri mal taun kib Pilipai kirig gil, amil taun kib Ampipolis amjakerek. Ampipolis kirig gil, am taun kib Apolonia amjakerek. Pen Apolonia kirig gil, am taun kib Tesalonaika amjakil niñrek, Juda mogim gep karip alap midek. ²Niñil, Pol per goligip rek, Juda God nop sobok gep ñin omal nokim, bin bi okok eip Juda mogim gep karip ñilik migan ak amil, kirop eip minim ag amil apil gak. ³God Minim wagin ak kirop ag ñi tep gil, God minim agep bi okok birarik okok, Mesaia ak yur kib dil kimil kauyaŋ warikniŋab aglak minim nibak ag ñi tep gil, “Mesaia ak Jisas, bi nibep agebin aul,” agak. ⁴Pol nib agek, bin bi ognap niñid ageb, agil, minim agek rek nep niŋ dil, Pol Sailas pis ak amnilak. Bin yib sek koŋai nep abe, Grik bin bi God nop niŋ dilak koŋai nep abe, Pol agak minim nibak niŋ dilak.

⁵Pol Sailas minim ager bin bi koŋai nep niŋ delak ak, Juda bi okok ognap niñel, milik yapek, bi timel yokop taun kanib nab siŋak midelak okok ognap del, kiri pen am bin bi koŋai nep dap lil, minim gi gu kib yib gilak. “Cin Pol Sailas kirop mal piyo niñil, bin bi siŋ aul kirop ñon, bi omal kirop ñag pak lilaŋ,” agil, am Jeson karip ak binem kis kis gil piyo mer niñlak. ⁶Piyo mer niñil, Jeson nop dil, bin bi Jisas nop niŋ dilak ognap sek dil, dam gapman bi kib midelak siŋak amil, minim kib aglak. Minim kib agil aglak, “Pol Sailas bi omal karip lim ke tigoŋ tigoŋ magilsek gi tagil ager, bin bi okok magilsek minim pen pen minim saköl gipal. Pen miñi ap midebir karip lim cin aul. ⁷Kiri gapman bi kib cin Sisa minim ne tib juil, kiŋ cin ke alap mideb, agil, bi Kiŋ nibak Jisas apal. Pen bi Jeson aul, bi nib omal kirop dam karip ne ak lek kin midesir,” aglak. ⁸Nib agelak, bin bi koŋai nep ap midelak okok abe, taun gapman bi kib okok abe niñil, minim saköl kib yib aglak. ⁹Minim saköl kib yib agil, Jeson nop mani ognap dil, bin bi nop eip dolak okok mani ognap dil, aglak, “Kisen minim nibak kauyaŋ ginigabim ak, mani nibi nibaul pis nep dinigabin,” aglak. Nib agil, kirop ag sön yoklak.

Taun kib Beria bin bi koŋai nep Jisas minim tep ak niŋ dilak

¹⁰Kislim gak magil ak nep, bin bi Kraiss nop niŋ dilak okok Pol Sailas kirop mal dam yokel, taun kib Beria amnirek. Beria amjakil, Juda mogim

gep karip ak amnirek. ¹¹Amil, Jisas minim tep ak ag ñerek, Juda bin bi Beria midelak okok, bin bi Tesalonaika midelak okok rek mer; minim kirop mal ak niñel, tep gek niñlig gi, “Pol niñid ageb aka?” agil, God Minim ak ñin nokim nokim per per udin li niñ tep göligipal. ¹²Pen Juda mogim gep karip nibak bin bi olak okok koñai nep Jisas nop niñ dilak. Grik bin yib midek okok ak rek nep, koñai nep Jisas nop niñ dilak. Grik bi ak rek nep, koñai nep Jisas nop niñ dilak.

¹³Pen Pol amil Beria bin bi kirop God Minim ag ñeb, agel, Juda bin bi Tesalonaika midelak okok minim nibak niñel, milik yapek, apil, Beria bin bi kirop minim neb neb gel, kal junig gelak. ¹⁴Nig gek niñlig gi, bin bi Jisas nop niñ dilak okok, Pol nop dam yokel, ñig solwara gol okok amnak. Pen Sailas Timoti bi omal Beria siñak miderek. ¹⁵Pen bi ognap Pol nop dam taun kib Atens yokil, adik gi amnig gelak niñil Pol kirop agak, “Sailas Timoti kirop mal agem, kasek onimir,” agak.

Pol taun kib Atens midek

¹⁶Pol ne Sailas Timoti kirop mal taun kib Atens siñak kod midlig gi niñak, bin bi nib okok god tom kiri sobok göligipal tap okok, koñai yib nep midek. Ne niñek, cibur nop ak timel yib gak. ¹⁷Nig gek, Juda mogim gep karip ak amil, Juda bin bi okok ognap abe, Grik bin bi God nop niñ dilak ognap abe, kirop eip minim ag amil apil goligip. Pen ñin nokim nokim per per minim agep kau siñak amil, bin bi ap midelak okok, kirop eip ak rek nep minim ag amil apil goligip. ¹⁸Taun kib Atens nibak, bin bi gos ar ke ke niñlak okok, yib ke ke agil, ognap Epikorian bin bi aglak, ognap Stowik bin bi aglak. Nin alap, Pol bin bi nib okok kirop Jisas kimil warikak minim tep ak agek, Epikorian bi gos tep niñeb ognap, Stowik bi gos tep niñeb ognap, Pol minim agak ak niñil, nop eip ag amil apil gil, ognap aglak, “Bi minim ñig ñig lip minim ak tari minim agnig geb?” aglak. Pen ognap aglak, “Bin bi par okok sobok gipal god kiri okok rek nep ageb,” aglak. ¹⁹⁻²⁰Pen Pol nop dam kansol kai midelak siñak amil aglak, “Nak minim kisen ke nib bin bi okok kirop ageban ak, miñi cinop ak rek nep ag ñi tep gek, cin abe minim wagin nibak niñ rep gin,” aglak. ²¹Pen bin bi Atens nib okok abe, bin bi ke okok nib apil Atens kin midelak okok abe, minim kisen nib ar ognap niñil ag midojin, agil, gos ak nep niñöligipal.

²²Pol pen ne kansol kai midelak nab siñak warikil agak, “Niñi Atens bin bi. Yad niñin niñi kilis yib gil, tap ognap sobok gin, agil, gos ak niñim. ²³Yad siñ aul tagil niñin, niñi kab kaunan ke ke gi lil, tap ke ke sobok gipim rek, yib ak ar nibak ñu kil tik lipim. Pen kab bid tap sobok gi ñeb alap gi lipim ak, yib ak ñu kil tik lipim, ‘Bi sobok gipal ma niñin ak, kab kaunan ne me aul,’ apim. Minim ma niñin, agil, ñu kil tik lipim nibak, miñi nibep minim wagin ak agnig gebin.

24“God lim dai wagin aul gi lil, tap lim dai ar wagin aul mideb okok magilsek gi lil gak Bi nibak ne Bi Kib yib. Seb kab ar alañ abe, lim dai wagin aul abe, Bi Kib midil kod mideb. Bin bi okok God sobok gep karip ñinmagil kiri gi lel, ne ap karip nab nib okok ma midenigab, mer. 25God ne cinop gi lil, ake bad ak ñek, ake lilig gi midobin. Tap cin okok magilsek ne nep ñib. Ne Bi kilis timel ke yib niñil cin ñinmagil cin tap tep alap gil nop ñijin rek ma lip. 26Ne bi nokim alap nep, Adam nop gi lek, Adam ne pen tik damil, tik dam dapil gel, miñi bin bi ke ke okok lim dai ar wagin aul tigoñ tigoñ magilsek okok midobin. Pen God ne nep ned gos niñil gek me, bin bi ognap karip lim apil apil midil, mid damil, kisen ne ke agak ñin ak, bin bi okok nib ognap apil kau kiri nibak dipal. 27God ne ke gos niñil geb ak, ñin ognap koslam midil, yip piyo niñil, di ririkol gilig gi, yip piyo niñ dinimel, agil, geb. Pen nop niñ dinig gonigabin ak, ne cinop magilsek par okok ma mideb. Cin eip mideb aul. 28Ñinmagil ar ne ak me, cin midobin. Pen bi minim ñu kil tikep nibi ke ognap, ‘Cin abe ñi pai ne midobin,’ apal ak, niñid apal.

29“Pen cin God ñi pai ne midobin rek, gol, silpa, kab okok dil, gos cin ke niñil, ñinmagil cin ke tap ognap kaunan gi lil, ma sobok gñin. 30Ned God minim tep ne ma niñeligipal rek, kirop minim kib ma agak. Pen miñi bin bi karip lim ke tigoñ tigoñ magilsek kirop ageb, ‘Tap si tap timel gipim ak, tari ginig nig gipin, agil, kirig gim,’ ageb. 31Kisen ne ke nep niñip ñin ak, Bi ne ag lak ak nop ag yokek apil, bin bi lim dai ar wagin aul midebal magilsek minim kib agil, nonim linigab. Cin nipin, Bi minim kib agnigab nibak, nop ñag pak lel kimek, God gek kauyañ warikak. Nig gak ak, bin bi okok magilsek niñil, minim kib agnigab agak ak, misen nep agak ak niñlañ, agil, gak,” agak.

32Pol, bi alap kimil warikip minim agosip ak niñil, bin bi niñ midelak okok ognap ag sik aglak; pen ognap aglak, “Ñin ognap sek minim nibak kauyañ agek niñin,” aglak. 33Nib agel niñlig gi, Pol kansol kai midelak okok kirop kirig amnak. 34Pen taun kib Atens nibak, bin bi ognap Pol minim nop ak dil, Jisas nop niñ dilak. Bin bi nib okok me, bi alap yib ne ak Dionisias. Ne bi kib kansol kib kiri karip lim nibak nib bi alap. Bin alap yib ne ak Damaris. Pen bin bi ognap sek abe Jisas nop niñ dilak.

Pol am taun kib Korid okok midek

18 1Pol taun kib Atens kirig gil, taun kib Korid okok amnak. 2Pol Korid amil niñak, bi Juda ber mal miderek. Nigmil yib ak Akwila; nop karip lim Podas tik dapel, kib gil ne ju dam karip lim Itali, taun kib Rom ulep siñak, midoligip. Pen kisen gapman bi kib Klodias, Juda bin bi ognap Rom ma midenimel, agek, Akwila eip bin ne Prisila eip, Itali kirig gil, am Korid siñak miderek. Pen Pol, ber mal kirop am niñnig gil, karip kirop amnak. 3Bi ber nibak, kiri sel karip göligipir. Pen

Pol ak rek nep wög nibak rek goligip ak me, amil kirop eip kin midil, sel okok göligipal. ⁴Pol ne pen, Juda bin bi okok abe, Grik bin bi okok abe, kiri magilsek Jisas minim tep ak niñ dilan, agil, Juda God nop sobok gep ñin ak, ne per per Juda mogim gep karip ak amil, kilis gil kirop eip minim ag amil apil goligip.

⁵Pen kisen Sailas eip Timoti eip Masedonia Propins kirig gil, Pol Korid midek siñak aper, Pol ne per per Jisas minim tep ak ag ñi damil damil, Juda bin bi okok kirop minim ag ñil, Mesaia per kod midoligipin ak me Jisas nep, agoligip. ⁶Pol nib agek, Juda bin bi okok minim ne ak ma niñil, nop ag juil, minim timel agel niñlig gi, Pol ne, Jisas minim tep ak tari ginig kirig gipal, agil, walij ne ak pipal paklig gi agak, “Yad nibep Jisas minim tep ak ag ñen ma nipim rek, God nibep di komiñ ma yoknigab ak, tap nibi ke. Miñi nibep Juda bin bi kirig gil, Juda bin bi mer okok kirop am ag ñinigain,” agak.

⁷Pol nib agil, kirop kirig gil, bi Juda mer alap karip ak amnak. Bi nibak yib ne Titias Jastas. Ne God nop sobok goligip. Karip ne ak Juda mogim gep karip gol ulep siñak. ⁸Pen Krispas, bi Juda mogim gep karip kod midoligip bi ak, bin bi ne eip kin midelak okok eip Jisas nop niñ dilak. Taun kib Korid okok, bin bi ognap koñai nep, Pol Jisas minim tep agak ak niñil, niñid ageb, agil, minim nibak niñ dil, ñig paklak.

⁹Ñin alap kislím eyañ Pol nigrikep niñak, Bi Kib nop agak, “Nak ma piriknimin. Nak gos sek midil, kilis gil, minim tep yad ak bin bi okok kirop abramek ag ñek amnañ. ¹⁰Yad nep eip midebin. Taun kib aul bin bi yad koñai yib nep midebal; bin bi ognap nep gi timel ginimel rek ma lip,” agak. ¹¹Bi Kib nib agek, Pol Korid nep kin midil, mi nokim alap takin akniñ kagol oñid ak, bin bi okok kirop God Minim ak ag ñi midoligip.

¹²Pen Rom bi kib okok Galio nop ag lel, ne amil Akaiia Propins kod midek ñin ak, Juda bin bi okok, Pol nop niñel milik yapek, minim ag ar nokim lil, nop di cici li dam minim kib agniñ dad amnilak. ¹³Pol nop minim kib agil aglak, “Bi aul bin bi siñ aul kirop agil, ‘Ñibi God nop sobok ginig gil, nib nib gim,’ ageb. Pen minim ageb ak dil genigal ak, kiri lo cin tib junigal,” aglak.

¹⁴Nib agelak, Pol pen agniñ gebin ag niñak ak pen, Galio pen warikil, Juda bin bi okok kirop agak, “Ñibi Juda bin bi. Bi aul tap timel alap gobkop, minim kib agniñ gebim ak nipnep. ¹⁵Pen nibi yokop minim magil okok nib okok nib dil, pen pen agil, bi yib kiri ñilak okok ak rek nep dil, minim pen pen agebim, ak minim kib mer; minim yokop nibak yad ma niñnigain. Ak minim yad mer. Minim nibak nibi ke agniñib!” agak. ¹⁶Nib agil, bi polisman ne okok agek, minim kib agep miñan ak kirop yik gi dam mis eyañ yoklak. ¹⁷Kiri mis amlig gi, bi Juda mogim gep karip kod midoligip ak, Sostenes, polisman okok nop yir dil pak gis gi paklak. Gapman bi kib Galio niñil, minim alap ma agak.

Pol kauyaŋ taun kib Adiok, Siria Propins siŋak amnak

18 Pen Pol Korid tapin kin midil, bin bi Jisas minim niŋ dilak okok kirop, “Niberik siŋaul midem,” agil, Akwila Prisila ber mal eip karip lim Siria amnin, agil, Senkria taun, niŋ solwara gol siŋak amnilak. Senkria okok am midil, Pol minim kilis niŋid niŋid nep God nop agebin agil, kimkas ne tikak. 19-21 Niŋ magöb dil, Senkria kirig gil, amil amil taun kib Epesas amjaklak. Pol ne Juda mogim gep karip niilik miŋan ak amil, Juda bin bi okok eip minim ag amil apil gek. Niŋ gek, bin bi okok nop aglak, “Niŋ ognap sek cinop eip siŋaul midenimin,” aglak. Pen minim kirop ak ma dil agak, “Nibi siŋaul midem. God yip, yau, agenigab ak, kisen adik gi nibep ker onigain,” agak. Nib agil, Akwila Prisila ber mal kirop bin bi nib okok eip Epesas siŋak ag lil, ne niŋ magöb dil paŋdak. 22 Niŋ magöb nibak amil amil Sisaria amjakek, Pol niŋ magöb nibak kirig gil, wagin ar amil Jerusalem amnak. Jerusalem amjakil, bin bi Jisas nop niŋ dilak okok, “Nibi midebim?” agil, kirop eip minim ognap agak. Pol niŋ gil, Jerusalem kirig gil, niŋ magöb kauyaŋ dil, taun kib Adiok, Siria Propins siŋak amnak.

23 Pol Adiok amil, yokop tapin niŋ bad alap kin mid kirig gil, amil Galesia Propins okok abe, karip lim Prijia okok abe gi taglig gi, bin bi Jisas nop ned niŋ dilak okok, kiri Jisas minim tep ak niŋ di kilis ginimel, agil, kirop magilsek ag ni tep gak.

Bi nak Apolos minim ak

24 Pen bi Juda taun kib Aleksadria nib alap apil Epesas siŋak midek. Yib ne ak Apolos. Ne bi gos tep niŋil minim ag tep gep bi alap. Ne God Minim dai ned niŋ kil tiklak ak niŋ tep goligip. 25 Bi ognap nop Bi Kib Kanib Ameb minim ak ag niŋlak. Nib ak me, ne kilis yib gil, Jisas ne akal nib apil bi tipeg bi rek midek ak, bin bi okok kirop yipid gil nep ag niŋligip. Pen minim ag niŋligip nibak, Jon bi niŋ pak neŋ ag niŋligip rek nep niŋil ag niŋligip. Minim ognap sek ma niŋjak. 26 Pen Apolos ma pirikil, Juda mogim gep karip ak amil, minim nibak abramek yib ag niŋligip. Pen niŋ alap minim ag niŋ midek niŋil Prisila Akwila ber mal niŋil, nop poŋ di dam karip kiri ak amil, God Kanib Ameb minim ma niŋjak magil ognap nop ag niŋ tep yib girek.

27-28 Kisen Apolos ne Akaia Propins amniŋ gek, Epesas bin bi Jisas nop niŋ dilak okok, Apolos ne amil kirop minim tep ak ag niŋigab ak tep, agil, Akaia bin bi Jisas nop niŋ dilak okok kirop mij alap niŋ kil tikil aglak, “Bi God wög gep Apolos amjakek, nop dinimib,” aglak. Niŋ gel me, Apolos Akaia Propins amjakil, mij nibak yomek, Akaia bin bi God kirop yimig niŋil gos tep neŋ, Jisas nop niŋ dilak bin bi okok, Apolos nop dilak. Nop del, ne pen kau kirop dil, minim agep kau siŋak Juda bin bi okok eip

minim ag amil apil gil, God Minim ar ak ag ñi tep gilig gi, “Mesaia, agil, kod midebim ak Jisas nep,” agak. Nig gil, ag ñi tep gek, nop minim alap pen agnimel rek ma lak. Nig gek, bin bi Jisas nop niñ dilak okok kirop gi ñi tep gek, mid tep gilak.

Pol Epesas am midil Kraiss minim tep ak ag ñak

19 ¹Apolos Korid kin midek ñin nab nib siñak, Pol ne amil Galesia Propins siñak abe, karip lim Pijia siñak abe, nab siñak gi taglig gi, taun kib Epesas amjakak. Amjakil niñak, bin bi Jisas nop niñ dilak ognap midelak. ²Pol kirop ag niñak, “Nibi Jisas nop niñ dipek ñin ak, Kaun Siñ sek dipek aka mer?” agak.

Agek, aglak, “Mer. Kaun Siñ alap mideb, agil, cin ma nipin,” aglak.

³Nib agelak, Pol kirop agak, “Pen nibi ñig pakpek ak, wagin ak tari, ag gos nipim?” agak.

Agek, aglak, “Cin Jon agoligip minim ak dil me, ñig paknok,” aglak.

⁴Nib agelak, Pol agak, “Jon Isrel bin bi okok agek, ñig pakeligipal ak, tap si tap timel gipin ak, tari ginig nig gipin, agil, niñel me, kirop ñig pak ñoligip. Pen Jon kirop agoligip, ‘Bi Kib kisen onigab ak apek, nop niñ dinimib,’ agoligip. Bi kisen onigab agak nibak, Jisas nep,” agak. ⁵Pol nib agek, cin Bi Kib Jisas nop niñ dil bin bi ne ke yib midojin, agil, ñig paklak. ⁶Kiri ñig pakel niñlig gi, Pol ñinmagil ne kirop ar siñak lek, Kaun Siñ kirop apek, kiri minim ar ke ke aglig gi, God minim tep ak ag ñilak. ⁷Bi aknib umigan alañ rek nig gilak.

⁸Pol takin omal nokim, Juda bin bi mogim gep karip olak okok eip, God bin bi dil kod midenigab minim ak niñ dinimel, agil, kilis gil, misen nep minim ag amil apil gi midoligip. ⁹Pen bin bi ognap gos midmagil kiri ak, gos midmagil kiri nab okok nep midek niñil, Pol minim agak ak ma dinigabin, agil, bin bi magilsek midelak nab siñak amil, Bi Kib Kanib Ameb ak minim timel aglak. Nib agel, Pol bin bi Jisas nop niñ dilak okok kirop nep poñ di dam, Tiranans skul karip kib ak amil, kirop minim ag ñi midoligip. ¹⁰Pol nig gil ag ñi midek, mi omal yinek me, Juda bin bi okok lil, Grik bin bi okok lil, Esia Propins midelak okok magilsek Jisas minim tep ak niñlak.

Sipa ñi ne okok

¹¹God ne Pol eip midek niñil ne tap ma gep rek ke yib ognap goligip. ¹²Bin bi ognap kiri Pol agsip walij bad ne okok dam, bin bi miñak gak okok miñ goñ kirop lel, warik ameligiipal; kijeki kiyob ñilik bin bi abañ ñagoligip okok kiri ak rek nep soñ ameligiipal.

¹³Juda bin bi ognap kij tap okok gil, kijeki kiyob ñilik tap okok ag soñ yok ajöligipal. Pen kisen, Pol gek rek niñil, cin ak rek nep Bi Kib Jisas yib agon, kijeki kiyob ñilik soñ amnılañ, agil, kijeki kiyob ñilik bin bi abañ

ñagak okok kirop aglak, “Jisas, Pol minim ne ageb bi ak, yib ne agobin ak niñil, mis amnoñ!” aglak. ¹⁴Pen bi God nop tap sobok gep bi kib yib alap Sipa, ñi ne aknib ar onjid nig gi midelak. ¹⁵Pen minek alap kiri, kijeki kiyob ñilik ag yokin, agil, nib agel niñlig gi, kijeki bi abañ ñagak ak minim kirop ak niñil kirop pen agak, “Yad Jisas nipin, Pol nop nipin ak pen nibi bi an?” agak. ¹⁶Nib agil, bi kijeki abañ ñagak ak kilis ke yib kirop talak gil, tapin magil pak adik madik gil, walij kirop okok tig bil bil gi yokek, kiri magil nep me karip nibak kirig gil, sapai sek pirik gi amnilak.

¹⁷Pen minim nibak, Juda bin bi abe, Grik bin bi abe, Epesas midelak okok magilsek niñil, jel gek pirikil, Bi Kib Jisas yib ne ak nep agel ar amnak. ¹⁸Nig gek, bin bi Jisas nop niñ dilak okok koñai nep ap mogim gil, tap tari tari gi timel gilak okok ag misen lilak. ¹⁹Kij tap okok gil, buk ñu kil tikil löligipal okok, bin bi ognap dapel, bin bi ognap okok niñ midel niñlig gi, kiri mab pak dagilel yinak. Buk tap nib okok, mani kab magil silpa tauep wök pagel, pipti tausand (50,000) rek amnak. ²⁰Pen taun kib Epesas nibak nig gelak me, Bi Kib minim tep ak tigoñ tigoñ amil kilis yib gak.

Epesas bin bi minim saköl aglak

²¹Pen kisen, God Kaun ne Pol nop gos ñek, Pol agak, “Yad Masedonia amil, Akaia amil, Jerusalem amnigain. Pen kisen Rom ak rek nep amnigain,” agak. ²²Nib agil, bi omal ne eip wög göligipir, Timoti eip Erastas eip kirop ag yokek, Masedonia Propins amnirek. Ne pen Esia Propins tapin ñin bad alap kin midek.

²³Pol Epesas midek ñin nab nib siñak, Epesas bin bi ognap warikil, Bi Kib Kanib Ameb minim tep nibak niñ dilak bin bi okok kirop niñel, milik yapek, pen pen ginig rek gelak. ²⁴Pen bi alap, yib ne Demitrias ak, bi ne ognap eip kab silpa dil, god esek sobok göligipal, yib Artemis, agöligipal ak, karip sikol kil tep ognap gi lel, bin bi ognap apil, tau dam lil, bin kib cin Artemis nop sobok gep karip ak, agil, sobok göligipal. Bi nib okok wög nibak gil, mani kib yib döligipal. ²⁵Demitrias ne, bi nop wög göligipal okok abe, bi wög kiri göligipal nibak rek göligipal bi okok abe agek, ap mogim gelak, agak, “Ñibi nipim, cin wög nokim nibak gil me, mani kib yib dipin. ²⁶Pen miñi bi narik Pol apil, bin bi okok kirop minim esek agil agip, ‘Ñinmagil dil tap gipal okok tap sobok gep mer,’ agip. Nib agosip, Epesas siñaul abe, Esia Propins okok abe, bin bi koñai yib nep minim ne niñ dipal. ²⁷Pol minim esek ak agek, niñ dil, tap gi lon taeligipal ak, kisen ma tauniñal. Pen ar nibak nep ma agebin. Cin ke abe, bin bi Esia Propins okok magilsek abe, bin bi karip lim ke tigoñ tigoñ magilsek abe, god kib Artemis ak nop sobok gipin. Pen nop kirig gil, karip kib nop sobok gipal ak, ak rek nep kirig ginimel rek lip, agil, agebin,” agak.

²⁸Demitrias nib agek, bi nib okok niñel, milik kal yib yapek, meg miñan dap ranil aglak, “Atemis Epesas nib ne kib yib! Atemis Epesas nib ne kib yib!” aglak. ²⁹Nig gil minim kib agel amek niñlig gi, bin bi taun kib nibak magilsek apil, Pol bi ne omal di cici lil lip gi dam minim agep kau siñak dad amnilak. Pol bi ne nib omal ne eip Masedonia Propins nib ap miderek. Yib kiri mal ak, Gaias eip Aristakas eip. ³⁰Pol pen, bin bi ap mogim gil, minim agelak nab siñak amnin, agak ak pen bin bi Jisas nop niñ dilak okok nop mer aglak. ³¹Pen Esia Propins gapman bi kib ognap, Pol nop bi niñeb ne okok me, nop minim yokil aglak, “Bin bi minim agep kau siñak ap mogim gil minim agebal siñak ma amnimin mer,” aglak.

³²Pen bin bi koñai nep ap mogim gil, minim kib agil, minim ke ke yib nep aglak. Bin bi koñai nep kiri minim wagin mideb niñil agobin ak, agil, ma niñlak; abramek nep aglak. ³³Pen bi Juda ognap, bi cin Aleksada kirop ag ñi tep ginigab, agil, nop bin bi udin yirik siñak yokil, bin bi ognap minim ar ognap nig nig gi agnimin, agil, sik par agelak pen ne minim agnig gi, nibi minim ma agim, agil, ñinmagil tig milic gi ñak. ³⁴Aleksada ñinmagil tig milic gi ñek niñlig gi, bin bi okok niñlak, ne Juda nib bi alap, niñil meg miñan dap ranil, minim ar nokim nep sik kib par agil aglak, “Atemis Epesas nib ne kib yib! Atemis Epesas nib ne kib yib!” agil, minim ar nokim nibak nep ñon sek sik par aul yib par ag midelak.

³⁵Kiri tu aua nep nig sik par ag midel midel, kisen bi taun gapman wög gil, ñu kil tikep bi kib kiri ak warikil, kirop agak, “Kapkap midem!” agak. Nib agek agek, kapkap midel niñlig gi, ne agak, “Epesas bin bi. Karip lim cin aul, god kib Atemis kab kaunan ne seb kab alañ nib ju owak ak dil, karip gi li tep gil, sobok gipin ak, bi an ma niñip, agil, minim saköl agebim? ³⁶Minim nibak, bin bi okok magilsek bir nipal. Nib ak, nibi kapkap midil sidol ma ginimib. ³⁷Pen bi dopim omal aul, god cin Atemis nop ag juil, karip sobok gipin siñak tap ognap si ma dipir ak, pen kirop siñaul dopim. ³⁸Nib ak, Demitrias aka bi ne ognap, bi alap nop minim kib agnig ginigal ak, bi kib minim tig bilokep bi okok midebal siñak amil minim agel, kiri minim kib nibak niñnigal. ³⁹Pen minim miker ognap midonimniñ ak, gapman bi minim tig bilokep niñ mideniñal udin yirik kiri siñak agem niñlañ. ⁴⁰Cin miñi siñaul ap mogim gil, minim pig agobin ak, minim wagin alap midek ma agobin. Gapman bi kib yib alap, “Tari ginig ap mogim gil nig gebim,” agek, pen minim alap agjin rek ma lip,” agak. ⁴¹Ne nib agil, bin bi okok kirop ag yokek, ke ke amnilak.

Pol Masedonia Propins amil, Akaia Propins amnak

20 ¹Pen bin bi okok minim pig kilopil ag mid kirig gil, am karip kiri ke ke okok amnilak. Pol bin bi Jisas nop niñ dilak okok kirop sik agek, apelak, kiri gos sek midil Jisas nop niñ di kilis gilig gi midenimel,

agil, ne minim ognap ag ñi tep gil, “Ñibi siñaul midem,” agil, kirop kirig gil Masedonia Propins amnak. ²Amil, nib okok gi taglig gi, bin bi Jisas nop niñ dilak nib okok, kiri gos sek midil Jisas nop niñ di kilis gilig gi midenimel, agil, ne minim ognap ag ñi tep gi damil, Akaia Propins amjakak. ³Akaia amjakil, takin omal nokim nib okok kin midil, ñig magöb dil Siria Propins amnim, agak ak pen ne minim alap niñak, Juda kai nop ñag pak linig gelak. Minim nibak niñil me agak, “Wagin ar nep adik gi Masedonia amnin,” agak. ⁴Pen Pol ne eip ajelak bi okok me: Piras ñi ne Sopata taun kib Beria nib ak; Aristakas eip Sekadas eip taun kib Tesalonaika nib omal ak; Gaias taun kib Debi nib ak; Ticikas eip Tropimas eip Esia Propins nib omal ak; Timoti ak. ⁵Bi nib okok kiri ned amil, taun kib Troas amil, cinop kod midelak. ⁶Pen ñin kib Bred Yis Sek Ma Ñiñeb ñin ak midon, ap amek niñlig gi, ñig magöb dil, ñin aknib mamid alañ nab kinil, Troas amil, bi ned amnilak okok eip am kausek midil ñin aknib ar oñid nib okok kin midonok.

Pol ñi kimak alap nop gek, kauyañ warikak

⁷⁻⁸Wik nokim alap Troas midonok nibak, sabdañ eyañ ñin ak, bred ti pag gi niñnig gil, karip ñilik miñan ar alañ am mogim gil, Pol, tol amnigain, agil, minim agek niñlig gil, minim ne niñ midonok. Nig gil niñ midon midon, kislim gek, sip milañ koñai nep dagil ar siñ epel lil, Pol minim agek ak niñ midonok. ⁹Pen bi praj alap wido ar siñak bisig gil, Pol minim agek ak niñ midek. Yib ne ak Yutikas. Ne nig gil niñ midek midek, wisin kal yib apek me, uñin jik jik gi gi pis nep karip ar yib alañ nib gi dam lim siñ eyañ pakak. Nig gek, kiri am siñ eyañ di niñlak, pis nep bir kimil midek. ¹⁰Pol ne pen siñ eyañ amil, ñi nibak nop nab nab li dil, agak, “Gos par ma niñnimib; ne komiñ mideb,” agak. ¹¹Nib agil, kauyañ karip miñan ar alañ amil, bred ognap ti pañil, jim ñil ñibil, Pol kauyañ minim ag midek midek, miñab tik melik lak ak amnak. ¹²Pen bi praj ap yap pakil kimak ak nop komiñ karip poñ damil miñ miñ yib gilak.

Pol Troas kirig gil, Mitilini amnak

¹³Pol cinop agak, “Ñibi ñig magöb dil, taun kib Asos am midenimib; pen yad wagin ar apil, taun kib nibak ñig magöb kausek dil karip lim Mitilini amnin,” agak. Nib agek, cin ñig magöb dil, Asos amninok. ¹⁴Asos amil, Pol nop dil, karip lim Mitilini amninok. ¹⁵⁻¹⁶Minek Mitilini kirig gil, karip lim ñig tib kis gak airan Kaios ulep siñak amjaknok. Minek ak, karip lim ñig tib kis gak airan Semos amjakil, Pol ne gos alap niñak, Epesas amil, sisain nep gi taglig gi, Pedikos ñin ak Jerusalem ma niñnigabin rek lip, ag gos niñak. Nib ak me, cin Epesas pis kid jus dil, pis nep taun kib Mailitas amninok.

Pol Epesas bin bi kirop agak, “Yad pis nep amebin,” agak

¹⁷Taun kib Mailitas amjakil, Pol minim yokek, Epesas amek, bin bi Jisas niñ dilak okok kirop kod midelak bi okok kirop agak, “Yad Mailitas

midebin siñaul owim,” agak. ¹⁸Nib agek, bi nib okok apelak, kirop agak, “Ned Esia Propins nibi siñak apil, nibep eip kin midil, mid damil, tari tari göligipin ak nipim. ¹⁹Yib yad den ar ma amnak. Bi Kib nop wög ak ginek niñlig gi, Juda bin bi yip gi timel gin, agel niñlig gi, sil aglig gi minim ag ñen amnak. ²⁰Nibi nipim, yad Jisas minim tep ne alap ma kirig ginek, pen mogim gipim kau okok abe, karip nibi okok abe amil, tari minim nibep gi ñinigab ak magilsek abramek ag ñen amnak. ²¹Nibi Juda bin bi okok lil, Grik bin bi okok lil, minim kilis agil, ag ñi tep gil, agnek, ‘Tap si tap timel gipim ak, tari ginig nig gipin, agil, kirig gil, God minim ne ak niñ dil, Bi Kib cin Jisas nop niñ dinimib,’ agnek.

²²“Pen miñi niñim! God Kaun yip miñ rek lil Jerusalem dad ameb ak, yip tari rek ginigab ak ma nipin. ²³Pen yad nipin, taun kib tigoñ tigoñ amjaken, Kaun Siñ ne yip per agip, ‘Nak Jerusalem amnigan, nep miñ lel, koslam midenigan,’ agip. ²⁴Pen ak minim ma mideb. Yad ke nep mid tep ginim, agil, gos ak ma nipin. Yip paknigal, agil, ma pirikpin, mer. Bi Kib Jisas, wög yip ag lak ak nep gos niñil, God cinop yimig niñil dip minim tep ak, ag ñilig gi nep midenigain. Yad gos nokim nibak nep niñil, amil, kanib nibak pis nep amnigain.

²⁵“Pen yad nipin, nibi bin bi okok akal magilsek, God bin bi dil kod midenigab minim nibak agen nipim okok, yip kauyañ ma niñnigabim, mer. ²⁶Miñi amnig gil me, nibep misen agebin, bin bi an an God minim tep ak ma niñ dil yur kib dinigal ak, ak tap kiri ke; yad mer. ²⁷Yad God tap tari tari ginig geb minim ak alap ma kirig gipin, mer; magilsek yib nibep ag ñibin. ²⁸Nibi ke niñ rep gil, bin bi Kaun Siñ ne agek kod midebim okok abe niñ rep gil midenimib. Bi kaj sipsip mikep okok kaj sipsip kiri okok kod mid tep gipal rek, nibi ak rek nep, God bin bi ne, lakañ ne ke tau adik dak bin bi nib okok me, kirop kod mid tep gil midenimib. ²⁹Yad nipin, yad amen, kain saköl okok apil, kaj sipsip nibi mikebim okok ognap su ñiñnigal. ³⁰Pen bin bi nab nibi siñak midebal ognap ak rek nep, bin bi Jisas nop niñ dipal okok kirop lip gi dad amon, kiri cin eip amnin, agil, kirop minim esek agnigal. ³¹Pen yad mi omal nokim, karip lim nibi Epesas siñak kin midil, pib nab, kislim eyañ, nibep yimig gek, sil aglig gi, nibep magilsek nokim nokim ag ñi tep ginek. Minim ag ñinek nibak saköl ma ginimib; niñ rep gil midenimib.

³²“Yad nibep God ñinmagil ar ne ak lil, minim tep ne ak, ne bin bi yimig niñip minim tep nibak ar ak lil, amebin. God nibep eip midenigab. God minim tep ne ak niñ denigabim ak, ne gek, nibi Jisas nop niñ di kilis gil bin bi ne ke midil, tap tep tep bin bi ne ñinig geb ak dinigabim. ³³Yad nibep eip kin midenek ñin ak, bin bi ognap mani gol, mani silpa, walij tap kiri okok asib ma agnek. ³⁴Nibi nipim, ñinmagil yad ak ke nep wög gil, bi yad eip tagoligipin okok eip, tap magil ñibil, walij tau yimil midoligipin. ³⁵Pen yad gipin nibak rek, nibi ak rek nep gil, bin bi yim

gep rek okok kirop di tep gil, gi ñinimib. Bi Kib cin Jisas ne ke minim agak ak niñ midenimib. Ne agak, ‘Bi ognap nibep tap ñenigal ak, nibep tep ginigab; pen nibi bin bi ognap kirop tap ñenigabim ak, nibep tep yib ginigab,’ agak,” agak.

³⁶Pol minim nibak ag mibil juil, Epesas bin bi Jisas niñ dilak okok kirop kod mideligipal bi okok eip kogim yimil, God nop sobok gak. ³⁷Pol sobok gek niñlig gi, kiri sil agil, nop am di kaig gil, milik rek ñibil bom siloklak. ³⁸Kisen milik dai yad ak ma niñnigabim, agak, minim ak nep niñil, kirop mapin yib gek niñil, sil aglak. Niğ gilig gi, Pol nop nab nab li dam ñig magöb migan ak yoklak.

Pol ñig magöb dil Jerusalem amniğ amnak

21 ¹Pen cin Epesas bin bi okok kirop, siñaul midem, agil, ñig magöb dil, pañdinok. Yigen ak ap tep gek, yipid gil nep amil amil, karip lim ñig tib kis gak airan Kos amninok. Pen minek ak, Kos kirig gil, karip lim ñig tib kis gak airan Rodos amninok. Pen minek ak, Rodos kirig gil, taun kib Patara amninok. ²Taun kib Patara amil niñnok, ñig magöb alap karip lim Pönisia amniğ gek. Nib ak, cin ñig magöb nibak dil pañdinok. ³Amil amil, karip lim ñig tib kis gak airan Saipras ñinmagil añidken pis ar midek niñlig gi, amil amil, karip lim Siria mañ apil me, tap kako okok di yokniğ amil taun kib Taia wös ginok. ⁴Taia am wös gil, amil bin bi Jisas nop niñ dilak okok kirop piyo niñil, kirop eip wik nokim alap kin midonok. Pen God Kaun ne kirop gos ñek, kiri Pol nop aglak, “Jerusalem amniğ geban ak, ma amnimin,” aglak. ⁵Pen amniğ ginok won ak, bin bi Jisas nop niñ dilak nib okok, bin bi ñi pai kiri okok magilsek cinop damil taun kib nibak mis ken ñig gol siñak amil, kirop eip kogim yimil, God nop sobok ginok. ⁶Pen cin, “Nibi siñaul midem,” agon, kiri pen, “Nibi okok amnim,” agel, cin am ñig magöb ak karip migan ak amon niñlig gi, kiri adik gi karip kiri amnilak.

Agabas, Pol nop nib nib ginigal, agak

⁷Pen cin ñig magöb dil, taun kib Taia kirig gil, am taun kib Tolemas wös ginok. Wös gil, bin bi Jisas nop niñ dilak okok kirop, “Nibi midebim?” agil, ñin bad alap kirop eip nab nib siñak kin midonok. ⁸Minek ak kirop kirig gil, am Sisaria amjakil, Pilip karip ak am kinnok. Ne Jisas minim tep ag ñi ajep bi alap. Ne me, ned Jerusalem midil, bi aknib kagol oñid okok eip tap magil nonim loligip. ⁹Pen bi Pilip nibak, pai ne omal omal, Jisas minim tep ak ag ñöligipal. Pai nib okok kiri bi ma dilak.

¹⁰Cin Pilip eip kin midonok ñin nab nib siñak, bi God minim agep Agabas karip lim Judia nib owak. ¹¹Agabas apil, Pol sib nag ne ak dil, ñinmagil tob ne ke nag lil agak, “Kaun Siñ ageb, ‘Bi sib nag nap nib

nibaul, Juda kai Jerusalem siŋak nop nag lil, dam Juda bin bi mer okok kirop niŋigal,' ageb," agak.

¹²Cin magilsek minim nibak niŋil, Pol nop turaj lil neb neb gil agnok, "Jerusalem ma amninim," agnok. ¹³Agonok, Pol pen agak, "Yip tari ginig mapin gek sil agem, midmagil yad yur gip. Yad Jerusalem amil, 'Bi Kib yad Jisas,' agniŋain. Kiri minim ak niŋel, milik yapek, yip nag lenigal aka pis nep ŋag pak lenigal ak, yad ma pirikniŋain. Abramek am agniŋain," agak. ¹⁴Pen cin Pol nop nig gi ag mer niŋil, kirig gil, agnok, "Bi Kib ne ke niŋip rek ginigab," agnok.

Jerusalem bin bi Pol nop ag julak

¹⁵Pen cin nig gil Sisaria kin midil, Jerusalem amniŋabin, agil, tap cin okok gi jin gi lil, paŋdinok. ¹⁶Bin bi Jisas nop niŋ dilak Sisaria nib ognap eip Jerusalem amninok. Kiri cinop dam Neson karip ak lel, eip kinnok. Bi Neson nibak Saipras nib. Ne Jisas nop ned nep niŋ dak.

¹⁷Jerusalem amjakon, bin bi Jisas nop niŋ dilak okok magilsek cinop niŋel tep gak. ¹⁸Tol Pol cin eip Jems nop minim agniŋ amninok. Jerusalem bin bi Jisas nop niŋ dilak okok kirop kod midelak bi okok magilsek ap mogim gil midelak. ¹⁹Pen cin amjakil, Pol kirop, "Niŋi midebim?" agil, God nop kod midek niŋlig gi, karip lim tigoŋ tigoŋ ajil, Juda bin bi mer okok tap tari tari gak ak magilsek, bi nib okok kirop kesim nibak agak. ²⁰Pol nig gil kesim nibak agek niŋil, kiri God nop tep agil, Pol nop aglak, "Mam. Nak niŋan, Juda bin bi koŋai sikerek Jisas nop niŋ dipal ak pen kilis yib gil apal, 'Cin Juda bin bi midobin. Nib ak, Juda lo ar ak nep gin,' apal. ²¹Pen Juda bin bi okok ognap Jerusalem aul apil apal, 'Pol ne, Mosis birarik nep lo minim ŋu kil tikak ak kirig gil, cin Juda kai gipin ar ak kirig gil, Juda bin bi ju amil Juda bin bi mer karip lim nab okok midebal kirop ageb, "Niŋi nibi okok wak tib gi rik ma ginimib, Juda kai gipal rek ma ginimib," ageb,' apal. ²²Nak miŋi Jerusalem aul opam, minim nibak tigoŋ tigoŋ amek niŋniŋal. Nib ak, cin titi gin, agil, minim nibak ag amil apil ginok. ²³Minim ag amil apil gil, minim ag ar nokim linok ak miŋi nep agniŋ gobin, nak niŋil, kisen ginimin. Bi cin aul bi omal omal, minim kilis niŋid niŋid God nop agobin, apal. ²⁴Nig gipal rek, God nop tap pak sobok gi niŋig gebal. Nib ak, nak am ŋin ognap kirop eip midil, tap tari tari gil God uŋin yirik tid mideniŋal ak, gi tep gil, tap God nop sobok gi niŋigal okok, nak tau ŋil kirop gi ŋek me, kisen nabic kimkas kiri ak tikniŋal. Nig geniŋan ak me, bin bi okok magilsek niŋniŋal, nep minim aglak nibak esek nep aglak. Kiri niŋniŋal, nak Juda nib ak me, cin Juda kai gipin rek nep gipan. ²⁵Pen Juda bin bi mer Jisas nop niŋ dilak okok kirop miŋ ŋu kil tik ŋil apin, 'Bin bi ognap tap yokop god esek okok sobok gi niŋig, kimin kaj tap okok pakenimel, niŋi ma niŋniŋimib. Kimin kaj tap okok lakaŋ ak ma

ñiñnimib. Kimin kaj tap okok kiñam tig kibor juel kimonimiñ ak, ma ñiñnimib. Bin si bi si ma ginimib,' agil, mij ñu kil tik ñibin," aglak.

²⁶Nib agelak, Pol minim kirop ak dil, minek bi omal omal tap sobok gi ñiniñ gilak bi nib okok eip, kiri tap tari tari gil God udin yirik tid midenigal ak, gi tep gil, God sobok gep karip ak amnilak. Amil, Pol bi kod midelak okok kirop agak, "Cin ñin akniñ kagol oñid ak midil, ñin ar oñid ak God nop tap ognap ke ke dapil, nop sobok gi ñiniñgabin," agak.

Juda bin bi Pol nop di cici lilak

²⁷Pol nib agil, kiri tap tari tari gil, God udin yirik tid midenigal ak, gi damil, ar oñid ñin ak ulep gek niñlig gi, Juda bin bi Esia Propins midil olak ognap niñlak, Pol God sobok gep karip miñan ak midek. Ne midek siñak niñil, bin bi midelak okok minim agel, kiri kal juil Pol nop di cici lilak. ²⁸Pol nop di cici lil, sik kib agil aglak, "Bin bi Isrel siñaul. Bi nibaul ne karip lim ke tigoñ tigoñ magilsek ajil, bin bi okok kirop minim tom agil, cin Isrel bin bi abe, lo cin abe, God sobok gep karip aul abe, minim timel ageb. Pen ar nibak nep, miñi ne Juda bin bi mer okok God sobok gep karip ñilik miñan siñak ma ameb okok, kirop abramek poñ di dowip. Nib ak, ne karip siñ nibaul gi timel gip," aglak. ²⁹Kiri minim aglak nibak, gos kiri ke nep niñil esek aglak. Pol yokop Tropimas eip God sobok gep karip mañ okok ajerek niñlig gi, gos kiri ke niñil aglak, "Pol bi nak Tropimas Epesas nib ak eip God sobok gep karip ñilik miñan ak ambir," aglak.

³⁰Pen kiri nib agel, minim nibak bin bi okok magilsek niñil, ke nib ke nib apil Pol nop tig lip gi dam God sobok gep karip mis eyañ yokel niñlig gi, dai kijon gi ñilak. ³¹⁻³²Bin bi koñai yib minim saköl kib aqliñ gi, kal juil Pol nop pis nep ñag pak linig gelak. Pen gelak minim nibak Rom ami bi kib yib midek siñak amek, ne ami bi kod midelak bi kib ne ognap dil, ami bi ognap dil, kasek amil bin bi mogim gi midelak siñak amjaklak niñil Pol nop pak adik madik gelak ak kirig gilak.

³³Ami bi kib nibak apil, Pol nop tig cici lil, bi ne okok kirop agak, "Nibi nop sen omal linimib," agak. Agek, agak rek gilak. Pen ne bi ned midelak okok kirop ag niñak, "Ne tap tari gosip nop niñ gebim?" agak. ³⁴Agek, kiri minim ke ke agil, minim pig kib yib aglak. Niñ gel, ami bi kib ak minim wagin alap ma niñil, bi ne okok kirop agak, "Nop dam karip kib kilis nibi dad amnim," agak. ³⁵Agek, ami bi kiri Pol nop dam kijon wagin gol siñak amjakel niñlig gil, bin bi koñai yib nep kabsek amlig gi Pol nop silikil, di pakin, agil, pen pen gi yokelak niñil bi ami bi ognap Pol nop di ka gil, karip miñan kiri dad amnilak. ³⁶Pen bin bi okok kiri kal agil agil, aglak, "Nop pis nep ñag pak lim!" aglak.

³⁷Pen ami bi okok Pol nop dam karip ñilik miñan eyañ amniñ gel niñlig gi, Pol ami bi kib yib ak nop agak, "Minim yad nep alap agnim aka?" agak.

Agek, ami bi kib yib ak agak, “Yad nipin nak Grik minim nipan. ³⁸Yad gos nipin e, nak me, bi sijak Ijip nib bi pen pen gipal po tausani (4,000) nep dil, dam miñ mab kab nep mideb nab okok we gil midelak, nak bi ak nep, ag nipin. Pen nak Grik minim nipan ak me, nak bi nibak mer,” agak.

³⁹Agek, Pol agak, “Mer, yad bi Juda alap. Yip tik dolak taun kib Tasas, Silisia Propins sijak. Taun kib yad ak yib mideb. Pen yip yau, agenimin, yad bin bi sijak aul kirop minim alap ag ñin,” agak.

⁴⁰Agek, ami bi kib ak yau agek, Pol kab kibiñ tan ameb ar ak tob tau midil, ñin milic gek, bin bi okok minim kirig gel niñlig gi, Juda bin bi ageligipal minim ak lil, kirop minim agak.

22 ¹Pol ne Juda bin bi ageligipal minim ak lil, agak, “Bapi mam sikop. Minim nibep agnig gebin aul niñ midem,” agak.

²Nib agek, ne Juda bin bi ageligipal minim yib agak rek niñil, minim minim ma gil, kapkap yib nep midelak. ³Kiri kapkap midel niñlig gi, Pol kirop agak, “Yad Juda nib ak pen yip tik dolak taun kib Tasas, Silisia Propins sijak. Pen yad apil Jerusalem aul, minim ag ñeb bi Gameliel eip midil kib ginek ak me, apis based sikop lo minim tari tari aglak ak magilsek yip ag ñek, nipin. Nib ak, nibi God nop di tep gin, agil, kil tep nep gipim rek, yad ak rek nep göligipin. ⁴Bin bi Jisas Kanib nibak amnilak okok kirop gi timel yib göligipin. Kirop ñag pak lin, agil, bin abe bi abe kirop abramek nag lil, dam miñ löligipin. Pen ognap gi timel gi dam pak len, pis nep kimeligipal. ⁵Göligipin nibak, God nop tap sobok gep bi kib yib ak abe, bi minim tig bilokep Kansol midebal bi kib okok abe, kirop ag niñem, esek ageb, agil, ma agnigal; niñid ageb, agnigal. Ñin alap yad Damaskas amnig genek, bi kib nib okok yip mij ognap nimam sikop kiri Damaskas midelak okok ñu kil tikil ñilak. Mij nib okok ñu kil tikil aglak, ‘Pol nop kod midenimib. Damaskas bin bi Jisas nop niñ dipal okok kirop nag lil, dad Jerusalem aul donimiñ,’ aglak. Yad mij nib okok dil, bin bi okok kirop nag li Jerusalem dapan, yur dinigal, agil, Damaskas amninek.

Pol ned Jisas nop niñ dak, kesim ak agak

⁶“Pen yad mij nib okok dil, bi ognap eip amil amil pib nab epel won ak, Damaskas mañ mañ gon niñlig gi, dai melik kib aknib ke seb kab ar alañ nib ap yapil yip niñak. ⁷Niñ gek, yad ap yap lim eyañ paken niñlig gil, minim alap yip agak, ‘Sol, Sol, yip tari ginig gil per gi timel geban?’ agak.

⁸“Agek, yad agnek, ‘Bi Kib! Nak bi an?’ agnek.

“Agenek, agak, ‘Yad Jisas Nasaret nib; yip per gi timel geban ak nep agebin,’ agak. ⁹Bi yad eip amonok okok, melik kib ak niñlak ak pen minim magil yip agak ak peyig ma niñlak.

¹⁰“Yad pen agnek, ‘Bi Kib. Yad tari ginim?’ agnek.

“Agenek, yip agak, ‘Nak warikil, Damaskas amnoŋ, bi alap apil, tari tari ginigan ak nep agnigab,’ agak. ¹¹Melik nibak melik kib yib gil, udin yip ak pis nep kwoi gak. Nig gek, bi yad eip amonok okok, yip ñinmagil kid ak dil, poŋ dil Damaskas amninok.

¹²“Pen taun kib nibak bi alap midek, yib ne ak Ananaias. Ne lo cin ak niŋ tep gil, ageb ageb rek nep goligip. Bi nibak nep, Juda bin bi Damaskas midelak okok magilsek aglak, ‘Ak bi tep yib,’ aglak. ¹³Pen ne yad midenek ulep siŋak apil yip agak, ‘Mam Sol. Udin magil nak kauyan ñil niŋan,’ agak. Nib agek niŋlig gi, dai udin yad kwoi gak ak pis nep komiŋ lek, ñil niŋil nop niŋnek.

¹⁴“Nig gek, Ananaias yip agak, ‘God apis based sikop cin sobok göligipal God ak nep, nep dip. Ne tap tari tari ginigain ag gos niŋip ar ak nep yomek niŋnigan. Ne gos niŋip, nak Bi Komiŋ Tep ne ak nop ke miseŋ niŋil, minim meg migan ne ke agenimiŋ minim ak miseŋ niŋnigan. ¹⁵God wög gi ñeb bi midil, nep tari tari gek udin niŋnak ak, minim tari tari agek peyig niŋnak ak, bin bi okok magilsek kirop ag ñinigan. ¹⁶Nib ak, ma kod midenimin. Warikil, God nop sobok gil, ñig pakenigan, ne tap si tap timel gipan gac ak lig gi ke yoknigab,’ agak.

“Juda bin bi mer okok kirop minim tep yad ak ag ñinimin,” agak

¹⁷“Nib agek, agak rek nep ginek. Kisen Jerusalem aul apil, God sobok gep karip ak amil, God nop sobok gi midil, nigrikep niŋnek. ¹⁸Nigrikep niŋil, yad Bi Kib niŋnek niŋlig gi, ne yip agak, ‘Bin bi Jerusalem siŋ aul minim tep yad agenigan ak ma niŋ dinigal. Nib ak nak kasek Jerusalem kirig gil, karip lim ke okok amnoŋ,’ agak.

¹⁹“Nib agek, yad agnek, ‘Bi Kib. Kiri ke yip nipal, yad ned Juda mogim gep karip okok ajil, bin bi nep niŋ dilak okok kirop miñ lil, tapin magil nep paköligipin. ²⁰Pen ñin alap bi minim tep nak agep Stipen nop kab ju pak lel niŋlig gi, yad bi nop pak lelak okok walij kiri tig ju lilak okok kod midil, paj agnek,’ agnek.

²¹“Nib agenek, Bi Kib yip agak, ‘Yad nep ag yoken amil Juda bin bi mer par okok midebal okok amnigan,’ agak,” agak.

Ami bi kib ak Pol nop kod midek

²²Juda bin bi Pol minim agek ak niŋ mid damil, Juda bin bi mer minim ak nep agosiŋ ak niŋil, kiri meg migan dap ranil minim kib yib agil aglak, “Nop di ñag pak lim! Bi akniŋ rek komiŋ ma midonimiŋ,” aglak.

²³Minim kib nib aglig gi, walij kiri ognap tig ju lil, silpil yipriŋ dil, di yokel ap ranak. ²⁴Nig gelak, ami bi kib yib ak, bi ne ognap kirop agak, “Nop dam karip ñilik migan damil, pakem, bin bi siŋ aul tari ginig nop minim kib agebal wagin ak nibep ag ñaŋ,” agak. ²⁵Nib agek, nop pakniŋ

damil, nag ñon gi lilak. Pen Pol ne ami bi kib ulep nib siñak warik midek ak nop agak, “Cin Rom bin bi lo alap nig gil ma mideb. Bi Rom nib yipid gil okok yokop ma paknigal. Kiri ned minim kib agil, minim tig bilokil, ginigal,” agak.

²⁶Pol nib agek, ami bi kib nibak am bi kib yib ak nop agak, “Nak tari ginig geban? Bi nibak ne bi Rom nib rek,” agak.

²⁷Nib agek, ami bi kib yib ak apil, Pol nop agak, “Nak niñid bi Rom nib rek aka? Yip agek niñin,” agak.

Agek, Pol agak, “Yau. Niñid, yad bi Rom nib rek,” agak.

²⁸Agek, ami bi kib yib ak agak, “Yad mani kib yib ak yokil me, Rom bi midebin,” agak.

Agek, Pol pen agak, “Yip Rom nib rek tik dolak ak me, yad bi Rom nib rek midebin,” agak.

²⁹Pol nib agek, bi nop nag lilak okok piriklak. Ami bi kib yib ak, “Bi aul Rom nib bi alap pen nop nag lipin,” agil, ak rek nep pirikak.

³⁰Minek pen ami bi kib yib ak, Juda kai Pol nop minim tari agebal ak niñ rep gin, agil, God tap sobok gep bi kib okok abe, Juda kansol bi okok magilsek abe, owim agek, ap mogim gel niñlig gi, Pol nop am wisib gi dapil, midelak nab siñak lak.

Pol Juda Kansol kib bi okok kirop minim agak

23 ¹Pol ne Juda Kansol kib bi nib okok kirop niñ i sek lil agak, “Mam sikop. Yad God ageb rek per gipin ak me, gos par niñlig gi ma midebin,” agak. ²Pol nib agek, Ananias, bi God nop tap sobok gep bi kib yib ak, bi ulep siñak midelak okok kirop agak, “Jonib wak nop pakim,” agak. ³Nib agek, Pol Ananias nop agak, “Nak milik sigi dagil mideban. Bin bi okok nep niñel, bi tep rek mideban ak pen gos magil nak nipan ak timel yib gip. Nib ageban nibak, God nep pen eyik paknigab. Cin Juda gipin rek niñil, yip minim kib ageban ak pen Juda gipin ar ak kirig gil, ‘Nop abramek pakim,’ agesan,” agak.

⁴Pol nib agek, bi ulep siñak midelak nib okok aglak, “God nop tap sobok gep bi kib yib ak nop ag jueban aka?” aglak.

⁵Agelak, Pol pen agak, “Mam sikop. Ne God nop tap sobok gep bi kib yib agip, agil ma nipin. God Minim ak ñu kil tikil aglak, ‘Bi kib nibi okok kirop ma ag junimib mer,’ aglak,” agak.

⁶⁻⁸Pen Pol ne niñak, bi Kansol kib midelak nib okok ognap Sadyusi bin bi gos niñlak rek gos niñlak, ognap Perisi bin bi gos niñlak rek gos niñlak. Bi Sadyusi okok gos kiri ak niñil agöligipal, “Ejol okok ma midebal. Kaun ma mideb. Bin bi okok kimil, pis nep kimil, ma wariknigal,” agöligipal. Pen bi Perisi okok aknib gos ma niñeligipal. Gos kiri ak niñil agöligipal, “Ejol okok midebal. Kaun mideb. Bin bi okok kimil, pis nep kimil mer, wariknigal,” agöligipal. Pol ne yakam

ke ke midelak nibak niñil, minim kib agil, agak, “Mam sikop. Based bi yad okok magilsek Perisi nib; yad ak rek nep Perisi nib nep. Yad bin bi kimil wariknigal minim apin ak me, yip pen minim kib agebal,” agak. Nib agek, bi Sadyusi Kansol kib okok asik ke ke lil, bi Perisi Kansol kib okok asik ke ke lil, minim pen pen aglak. ⁹Minim pen pen agil, minim bleble gil, minim saköl aglak. Agelak, Perisi kai bi lo ag ñeb bi kiri ognap warikil, minim pen pen agil, aglak, “Bi aul tap timel alap gip, agil, ma agobin. Ne Damaskas amek ñin ak, kaun alap aka ejol alap nop agek niñak rek lip; cin ma nipin,” aglak. ¹⁰Nib agil, pen pen ag dad amelak niñlig gi, ami bi kib yib ak niñil, midak midak nib ag damil Pol nop tig gi rik gi dai dai linimel rek lip, agil, ami bi ne okok kirop agek, Pol nop poñ di dam karip kib migan kiri dam lilak.

¹¹Pen ñin nibak kislím nab eyañ Bi Kib apil Pol midek ulep siñak warik midil agak, “Gos sek midenimin. Minim tep yad ak Jerusalem aul apan rek, taun kib Rom amil, ak rek nep agnigan,” agak.

Pol nop ñag pak linigabin, aglak

¹²⁻¹³Minek pen Juda bi ñinjuil omal rek ap mogim gil, minim ag ar nokim lil aglak, “Cin Pol nop pis nep ñag pak linigabin. Nop ñag pak ma lipin won aul, tap ma ñibil, ñig ma ñiñnigabin!” aglak. ¹⁴Nib agil, amil God nop tap sobok gep bi kib okok abe, bi minim tig bilokep okok abe, kirop aglak, “Cin minim kilis minim niñid niñid God nop apin. Tap magil ma ñiñnigabin; Pol nop pis nep ñag pak lil me, kisen tap ñiñnigabin. ¹⁵Nib ak, nibi abe Juda Kansol kib bi okok abe, Rom ami bi kib yib ak nop minim piñil yokil, esek agnimib, ‘Pol nop poñ di aul dapem, nop minim ognap sek ag niñ tep gin!’ agnimib. Nibi esek nib agenigabim, cin uliñin li midil, ne aul apek niñlig gi, nop pis nep ñag pak linigabin,” aglak.

¹⁶Pen Pol ñi yin ne ak, Pol nop paknig gelak minim nibak niñil, nibap Pol nop dam lilak midek karip ak amil, nop ag ñak.

¹⁷Ag ñek, Pol niñil, ami bi kirop kod midek bi alap sik agek, apek, nop agak, “Bi praj aul minim ne alap mideb. Nop ulik gi ami bi kib yib mideb ak amek, minim nibak agañ,” agak. ¹⁸Pol agek, ami bi nibak ñi yin ne nibak nop ulik gi dam ami bi kib yib midek siñak amil, agak, “Bi nagiman Pol ak agip, ‘Bi praj aul minim alap mideb niñil nop ulik gi dam ami bi kib yib mideb siñak amek, minim nibak agañ,’ agosip, nop ulik gi dapebin aul,” agak.

¹⁹Nib agek, ami bi kib yib ak, bin bi ognap niñnigal, agil, ñi nibak nop ñinmagil kid ak dil, kapkap ulik gi ke ke gol siñak amil, agak, “Yip minim agniñ geban ak agañ,” agak.

²⁰Agek, ñi praj nibak agak, “Juda bi okok tol nep minim yokil, esek agnigal, ‘Pol nop dam Juda Kansol kib midebal ak apenimin, minim

ognap sek ag niŋ rep gin,' agniŋal. ²¹Nib ak, minim kiri agenimel ak ma niŋnimin, mer. Bi kiri niŋnjuil omal rek Pol nop ŋag pak lil nep me, kauyaŋ tap magil niŋbil ŋig niŋbil ginigabin, agil, minim ag lipal. Kiri minim nep ak niŋil, nib gin, agil, kod midebal," agak.

²²Ŋi praj nib agek, ami bi kib yib ak niŋil, nop ag yoklig gi agak, "Bin bi ognap kirop niŋil, 'Ami bi kib yib ak nop nib niŋ gi agil apebin,' agil, ma ag niŋnimin, mer yib," agil kab lak.

Pol Gapna Piliks midek amnak

²³Ami bi kib yib ak nib agil, ami bi kod midep ne omal kirop sik agek, aper, agak, "Ami bi okok niŋnjuil akniŋ wajrem alaŋ (200) dil, ami bi kaj hos ar bisig gil pen pen gipal okok niŋnjuil omal nokim adik gi dam akniŋ wajrem alaŋ (70) dil, ami bi cim kisal pen pen gipal okok niŋnjuil akniŋ wajrem alaŋ (200) dil, miŋi kislim nab eyaŋ nep Sisaria amnimir. ²⁴Pol nop kaj hos ognap sek niŋil, nop poŋ di dam tep gil, gapman bi kib Gapna Piliks mideb siŋak yokil, onimir," agak.

²⁵Nib agil, ne Gapna Piliks nop mij alap ŋu kil tikak:

²⁶Yad Klodias Lisias. Nep gapman bi kib Gapna Piliks mij aul ŋu kil tikebin.

Nak mideban?

²⁷Bi nep ag yokebin aul, Juda bin bi nop di cici lil pak liniŋ gelak ak pen yad niŋnek ne bi Rom nib rek ak niŋil me, ami bi yad ognap eip am nop ulik gi donek. ²⁸Dapil, nop ŋag pak liniŋ gelak minim wagiŋ nibak niŋnim, agil, nop damil Juda Kansol kib minim agep kiri siŋak amiŋ niŋnek, ²⁹Juda bin bi kiri gipal rek lo minim ar ognap nep midek. Pen ne tap timel ognap gek, nop pis nep ŋag pak lep aka miŋ lep minim wagiŋ alap ma midek. ³⁰Pen minim alap aglak, 'Bi nibak nop uliŋin lil ŋag pak liniŋabin,' agelak yad jelep niŋil, nak mideban siŋak ag yokebin. Bi nop minim apal nib okok ognap ag yoken, amiŋ, nep minim wagiŋ nibak ag niŋniŋal.

Minim apin me ak.

³¹Ami bi kib yib ak nib agil, mij nibak ŋek, ami bi okok Pol nop kislim eyaŋ nep ulik gi damil, taun kib Adipatris amjaklak. ³²Minek ami bi wagiŋ tageligipal okok magilsek adik gi Jerusalem amnilak. Ami bi kaj hos ar bisig gil pen pen göligipal okok nep Pol nop dad taun kib Sisaria amnilak. ³³Sisaria amjakil, amiŋ mij dapesal ak, bi kariŋ lim nibak kod midoliŋip Gapna Piliks nop niŋil, Pol niŋmagil ar ne ak lilak. ³⁴Gapna Piliks ne mij nibak udiŋ li niŋil, Pol nop agak, "Kariŋ lim nak akal nib?" agak. Agek, Pol agak, "Yad Silisia Propins nib," agak. ³⁵Pol Silisia Propins nib bi midek minim ak niŋil, Gapna Piliks nop agak, "Bi nep minim agniŋal okok apeniŋal, minim kib nak agniŋabin," agak. Nib agil, bi ne ognap kirop agak, "Nop dam Herod kariŋ kib gi lak ak lil, kod mid tep ginimib," agak.

Juda bi kib okok Pol nop minim kib aglak

24 ¹Pol nop dam Herod karip gi lak ak lel, ñin omal omal midek. Minek mamid ñin ak, God nop tap sobok gep bi kib yib Ananias, taun kib Sisaria ak amnig, bi minim tig bilokep ognap ponj dil, bi minim agep kiri Tetalas eip Sisaria amnilak. Minim kib agep karip ak amil, kiri gapman bi kib Gapna Piliks ak nop, Pol nig gil nig gil gak ak minim kib agnig gobin, aglak. ²Pol karip migan ak dapel niñlig gi, bi minim agep Tetalas Gapna Piliks nop agak, “Nak me milek par cinop kod midesan, pen pen gilig gi ma gil, mid tep gipin. Nak gos niñ tep gil gesan ak me, karip lim cin aul tap tep tap kisen nib miseñ lip ak, cin mid tep gipin. ³Karip lim cin aul tigoñ tigoñ okok magilsek per nep gi tep gipan nibak niñil cin miñ miñ gil nep tep yib agobin. ⁴Pen nep minim par kib ma agnigain. Minim mañ won alap agnig gebin ak, timid pak niñnimin. ⁵“Bi siñaul mideb aul, cin nipin ne per nep gi timel gip. Bin bi okok kirop minim esek agek, kiri minim esek nibak niñ dil, ne gi timel gip rek kiri nig aknib rek nep gi timel gipal. Karip lim ke tigoñ tigoñ magilsek gi tagil minim esek agil, Juda kai kirop tig asik ke ke lek niñlig gi, kiri gapman minim ag juil, pen pen gipal. Bin bi Jisas bi Nasaret nib ak nop niñ dipal okok, bi kib kiri alap me aul. ⁶⁻⁷Ne God sobok gep karip gi timel ginig gek, cin niñil nop tig cici lil, tap cinop gi timel gak nibak, lo cin ke minim kib agnig gonok, ami bi kib yib Lisias kal ju apil, nop damil agak, ‘Bi ak nop minim kib agnig gebal okok, bi kib Piliks mideb siñak damil, minim kib agnimel,’ agak. Nib agek me, cin miñi opin. ⁸Minim nibak Pol nop ag niñenimin, ne ke, cin minim kib agobin wagin ak agek, nak niñnigan,” agak.

⁹Tetalas nib agek, bi Juda ap midelak okok, minim ne agak ar ak nep agil, aglak, “Niñid yib agip,” aglak.

Pol Gapna Piliks nop minim agak

¹⁰Gapna Piliks ne ñinmagil dap ranlig gi, Pol nop, minim agan, agek, Pol agak, “Nak mi koñai nep karip lim aul kod midil, niñ tep gil, minim tig asik tep geban rek, yipid gil nep agnigan. Nib ak niñil, yip tep gek niñlig gi nep minim agnigain. ¹¹Nak bi okok kirop ag niñenimin, agnigal ñin aknib umigan alañ ma amnak nep, yad Jerusalem amil, God sobok gep karip ak sobok ginigain, agil, amninek. ¹²Yad bin bi ognap dil, God sobok gep karip ak aka Juda mogim gep karip okok aka Jerusalem nab siñak, cibur timel gep rek minim ognap ma agnek, mer. ¹³Yip miñi minim kib agebal ak, nak niñnigan minim wagin alap ma mideniñgab, mer. ¹⁴Pen nep minim alap miseñ agnig gebin. Yip apal, ‘Pol cin Juda bin bi gipin ak rek ognap ma gip; ne tom agil, Kanib kisen nib ak ameb,’ apal. Yip Kanib kisen nib ajeb, apal ak, niñid apal. Yad Kanib kisen nib

tagil, based sikop sobok göligipal God nokim nibak nep sobok gipin. Mosis Lo minim ñu kil tikak ak abe, bi God minim agep okok minim ñu kil tiklak ak abe, magilsek niñ dilig gi midebin. ¹⁵Bi Juda siñaul midebal, bin bi tep okok abe, bin bi timel okok abe, magilsek kimil wariknigal, agil nipal rek ak, yad ak rek nep nipin. ¹⁶God eip amil midenigain, agil, yad abramek ma gipin, mer. God niñil aka bin bi okok niñil, Pol yipid gil ma gip, agnigal ak niñil, per niñ tep gil, mid tep gipin.

¹⁷“Pen yad mi ognap Jerusalem ma amninek. Pen kisen yad amil, bin bi yad tap ma mideb okok kirop mani ognap ñil, God nop tap sobok gi ñin, agil, Jerusalem amninek. ¹⁸Jerusalem amil, cin Juda bi, God udin yirik ar ne siñak mid tep gin, agil, tari tari gipin ak, ginek. Nig gi sakil, God nop tap sobok gi ñin, agil, God sobok gep karip ak am midenek. Nig gilig gi midenek ak, bi siñaul kiri apil yip niñlak. Pen bin bi koñai nep yad eip ap ma midelak. Pen pen agep minim ognap ma agnek. ¹⁹Pen Juda bin bi Esia Propins nib okok Jerusalem apil, God sobok gep karip siñak midelak. Minim kiri midobkop ak, kiri siñaul apil, minim nibak aplap. ²⁰Ma opal ak, bi Juda Kansol kib siñ aul yip Jerusalem minim kib agil, yad tap timel ginek minim wagin niñlak ak agel nak niñan! ²¹Pen yip minim kib aglak ñin ak, yad minim nokim alap nep agnek. Meg miñan dap ranil agnek, ‘Yad bin bi kimil wariknigal, agil, gos ak nep nipin ak me, yip minim kib agebim aul,’ agnek,” agak.

²²Pol nib agek niñlig gi, Gapna Piliks, Kanib ak agöligipal minim ak niñ rep gak ak me, Juda bi okok minim agelak ak ma dil, agak, “Kisen ami bi kib yib ak Lisias apek, minim ne ak niñil, minim nibak agnigain,” agak. ²³Nib agil, bi nagiman kai kirop kod midek ak nop agak, “Pol nop kod mid tep ginimin; nop pis nep nag wös ma linimin. Ne tap ognap ma midonimiñ, bin bi ne okok kirop ag niñek, nop ñinimel,” agak.

Pol mi omal miñ midek

²⁴Ñin sikol bad alap amek, ñin alap Piliks bin ne Drusila eip orek. Bin Drusila nibak ne Juda nib bin. Pen kiri ber apil, nigmil ne Pol nop sik agek, apil, Krajs Jisas nop titi gil niñ dipal minim ak agek, Piliks niñ midek. ²⁵Pol ne minim ag damlig gi, cin titi gil gi tep ginigabin minim ak abe, cin titi gil cibur gos midmagil cin gos gip rek nep ma ginigabin minim ak abe, God kisen cinop minim kib agnigab minim ak abe, Piliks nop agak. Pen Pol nib agek, Gapna Piliks minim nibak niñil, pirikil, Pol nop agak, “Nak miñi am midenimin. Kisen yad ñin alap nep sik agen, onimin,” agak. ²⁶Pen gapman bi kib nibak, gos ne ke okok nep niñak, “Yad Pol nop per per sik agenigain ak, ne pen gos niñnigab, ‘Yad bi aul nop kapkap mani ognap ñen, ag yokek, amnin,’ agil, yip mani ognap ñinigab,” ag gos ak niñak. Pen gos nibak nep niñ midil, Pol nop digep minek sik agek, apil, minim ageligipir.

²⁷Mi omal ap amek niŋlig gi, bi nak Posias Pestas, Piliks kau nop dil, karip lim nibak gapna midek. Pen Piliks, Juda kai yip bi tep agnigal ak tep, agil, Pol miñ midek ak ma wisib yokak.

Pestas Pol nop minim kib niŋak

25 ¹Pen Pestas taun kib Sisaria siŋak amil, gapna wög nibak dil, ñin omal nokim nep midil, Jerusalem amnak. ²⁻³Pestas Jerusalem amek niŋlig gi, God nop tap sobok gep bi kib okok abe, Juda bi kib ognap abe nop am niŋil, Pol nig gil nig gil gi timel gak minim nibak nop aglak. Juda bi okok kiri ke kapkap minim ar nokim ag lil, Pol nop kanib nab siŋak uliŋin lil, ñag pak linigabin, agil, aglak, “Cinop yimig niŋil, bi nak ognap agek, Pol nop kasek poŋ dil Jerusalem dolaŋ,” aglak. ⁴Nib agelak, Pestas agak, “Pol miñ mideb Sisaria. Nib ak, yad Sisaria amniŋ gebin rek, ⁵nop minim ognap midonimiŋ, bi kib nibi ognap agem, yad eip Sisaria amil, nop minim kib agnimel,” agak.

⁶Pestas nib agil, ñin jil oŋid aka wajrem alaŋ sek Jerusalem kin midil, adik gi Sisaria amnak. Minek, Pestas ne minim kib agep karip ñilik miŋan ak amil, Pol nop dowim, agak. ⁷Pol nop dapelak, Juda bi Jerusalem nib olak okok apil nop piŋil kis kis gil, minim ar ke ke koŋai nep aglak. Pen minim aglak ar nib okok minim wagin alap midek, ma aglak.

⁸Kiri minim agelak, Pol warikil pen agak, “Yad Juda bin bi lo minim nibi ak ma tib jupin; yad God sobok gep karip ak tap timel alap ma gipin; yad Rom Empira Sisa nop minim timel alap ma apin,” agak.

⁹Agek, bi kib Pestas, Juda bin bi okok yip bi tep agnigal ak tep, agil, Pol nop ag niŋil, agak, “Minim kib agobin nibaul, Jerusalem amil agin aka?” agak.

¹⁰Agek, Pol agak, “Miñi Sisa minim kib ar ne ak bir midebin. Yad Juda bin bi kirop tap timel alap ma gipin ak, nak ak rek nep bir nipan. ¹¹Pen tap timel alap gen, yip minim kib agil, ñag pak lin, aplap ak, ma pirikpnep; nib ak yip ñag pak liplap. Pen minim kib agil, minim wagin alap ma mideb ak, bi alap yip Juda bin bi kirop ñinimiŋ rek ma lip. Nib ak, nak yip Sisa mideb ak ag yokek, ne ke minim nibaul niŋniŋab,” agak.

¹²Pol nib agek, bi kib Pestas amil, bi ne okok eip minim nibak ag amil apil gil, adik gi apil, agak, “‘Sisa minim kib yad ak niŋniŋab,’ apan ak me, nep Sisa mideb ak ag yokniŋain,” agak.

Kiŋ Agripa eip ninai ne Benis eip

¹³Pen yokop ñin omal yapek niŋlig gi, Kiŋ Agripa eip ninai ne Benis eip, Pestas kisen nep gapna owak rek nop am niŋir, agil, Sisaria amil, Pestas eip ñin bad tapin alap kin miderek. ¹⁴Kiri ñin koŋai nep siŋak kin midniŋ ger niŋlig gi, Pestas ne Kiŋ Agripa nop agak, “Ned Piliks gapna midek ñin ak,

ne bi alap miñ lak. Pen gapna wög ne ak kirig gil, bi nibak miñ lep kau ak kirig amnak. ¹⁵Yad Jerusalem amenek, bi Juda God nop tap sobok gep bi kib okok abe, Juda bin bi minim tig bilokep bi kib okok abe, bi nibak nop yip minim kib agil, aglak, ‘Nak agek, Pol nop ñag pak lilanj,’ aglak. ¹⁶Pen minim wagin alap ma agelak niñil yad kirop agnek, ‘Cin Rom bin bi lo alap nig gil ma mideb. Bin bi yokop ma ñag pak lijn. Minim kib agnigabin niñil bi minim midonimiñ okok amil, bi kirop gi timel gak udin yirik ne siñak minim misenj agenigal; ne minim pen agenigab; minim wagin alap midenigab ak, nop ñag pak linimel, agnigabin,’ agnek. ¹⁷Nib agil, Juda bi okok yad eip Sisaria aul apil, minek me, yad amil minim kib agep karip ñilik migan ak bisigil, Pol nop am dowim agen, dolak. ¹⁸Yad gos niñnek e, minim kib yib mideb, agnek ak pen minim kib aglak ak minim agel niñlig gi niñnek, minim kib ma midek, mer. ¹⁹Kiri yokop aglak, ‘God minim ak, cin ag tep gipin rek ma agip. Pen bi Jisas ak bir kimak ak pen Pol agip ne komiñ mideb agip,’ aglak. ²⁰Minim agelak ak yad niñ tep ma ginek rek, Pol nop ag niñnek, ‘Nak Jerusalem amenigan, nep minim kib agnigal aka?’ agnek. ²¹Agenek, ne mer agak. Ne agak, ‘Yad miñ midenigain. Kisen Empra Sisa ne ke minim nibak agnigab,’ agak. Nib agek, yad nop Sisa mideb siñak ag yoknigain, agil, miñ linek rek mideb,” agak.

²²Pestas nib agek, Kiñ Agripa agak, “Pestas. Bi nibak minim ne ke agek, yad niñnigain,” agak. Agek agak, “Nib ak, tol niñnigan,” agak.

²³Nib agek, minek, Agripa ninai Benis eip, walij tep tep nep yimil, ami bi kib ognap abe, bi kib yib ognap abe poñ dil, bin bi kib apobin, agil, miñ miñ gilig gi minim kib niñeb karip ñilik migan ak amnilak. Ap midel niñlig gi, Pestas bi ne ognap kirop agak, “Pol nop am dowim,” agak. ²⁴Agek, dapelak, Pestas agak, “Kiñ Agripa abe, bin bi ap midebim siñ aul abe, bi aul nop niñim. Juda bin bi nop minim kib agil, bi nibaul pis nep ñag pak lep, apal. Yad Jerusalem midenek, yip nib aknib rek nep aglak. Siñaul opin, yip ak rek nep apal. ²⁵Yad nipin, bin bi okok tap timel yib gel, ñin ognap ñag pak lipal ak pen bi aul nop minim kib agil niñnek, tap nibak rek alap ma gip, mer. Pen ne ke agak, ‘Empra ne ke minim yad agnigab,’ agak. Nib ak me, yad nop Empra nop ag yoknigain. ²⁶Bi nibaul Empra nop ag yoknigain ak pen ne tap tari tari gip minim wagin ak, mij sek ñu kil tik ñinim rek ma lip. Nib ak, nak Kiñ Agripa abe, bin bi ognap siñ aul abe, bi nibaul tap tari tari gip minim wagin ak niñnigabim. Nibi minim ne ak niñil, minim wagin magil ak yip agenigabim, yad ñu kil tikil, Empra mideb siñak yoknim. ²⁷Pen gos yad nipin ak, bi nagiman Empra mideb siñak yokop ag yokil, lo tari tari tib juip ak ma agenigain ak, tep ma gip, mer,” agak.

Pol Kiñ Agripa nop minim agak

26 ¹Pen Kiñ Agripa Pol nop agak, “Yad nep peyig niñlig gi midebin, minim agan!” agak.

Nib agek, Pol ñinmagil dap ranlig gi agak, ²“Kiñ Agripa. Nak nep apil yip minim agan, agesan, Juda bin bi minim yip agebal ak, nep agnig gebin ak, yip tep gip. ³Cin Juda bin bi gipin gipin ar ak abe, minim pen pen apin apin ar ak abe, nak magilsek bir nipan ak me, nep agnig gebin aul, yip tep gip. Nib ak, yad minim agen, yip yirik ma niñninin.

⁴“Yad ñi sikol karip lim yad ke okok midenek ñin ak abe, kisen am Jerusalem midenek ñin ak abe, yad bi tigepe bi rek midenek ak, Juda bin bi okok magilsek bir nipal. ⁵Kiri yip milek par niñöligipal. Yad bi Perisi, Juda lo minim niñil, kilis gil, asik mosik gi tep yib gi midöligipin. Kiri nep minim nibak miseñ agenigal ak, yad minim niñid agebin ak, agil niñnigan. ⁶Pen God birarik nep apis based sikop kirop minim tep agek, gos sek kod mideligipal minim nibak nep niñ dipin ak me, kiri yip minim kib agebal. ⁷Cin Juda wagin ke ke aknib umigan alañ magilsek, God apis based sikop kirop ag lak minim tep ak kod midobin. God ne tap tep ñinigin ag lak tap tep nibak din, agil, piñ nab kislim eyañ nop sobok gilig gi midobin. Pen Kiñ Agripa, nak niñan! God minim agak nibak minim niñid nep ageb, agil, niñ dilig gi nep midebin ak me, yip minim kib agebal me aul. ⁸Pen nibi tari ginig bin bi kimal okok, God gek ma wariknigal, ag gos nipim?

⁹“Pen ned yad ke, bin bi Jisas Nasaret nib minim agelak bin bi okok kirop gi timel gin, ag gos niñöligipin. ¹⁰Pen Jerusalem midil, yad ak rek nep genek. God nop tap sobok gep bi kib okok yip agel, bin bi Jisas nop niñ dilak okok koñai nep am dapen, kirop miñ löligipal. Yad ke bi minim tig bilokep okok eip yau agen, ognap pis nep ñag pak lel kimlak, kirop paj agöligipin. ¹¹Juda mogim gep karip okok gi tagil, bin bi Jisas nop niñ döligipal okok kirop milik kal niñil, kiri Jisas minim ne ak kirig gilañ, agil, kirop gi timel göligipin. Yad gos ar nokim alap nep niñil, ñin ognap bin bi nib okok kirop piyo niñin, agil, karip lim par kib okok ajöligipin.

Jisas Kraiss Pol nopp dak ak, Pol kesim nibak agak

¹²“Pen ñin alap Damaskas bin bi Jisas nop niñ dilak okok kirop nag li donim, agenek, God nop tap sobok gep bi kib okok, yau, agil, mij ñu kil tik ñel, dil sañdinek. ¹³Pen kiñ tep yad niñan! Yad piñ nab siñ epel owak magil ak, kanib nab siñak amlig gi niñnek, melik kib aknib ke seb kab ar alañ nib yad bi ognap eip amonok okok pak ñak. Melik pak ñak nibak, piñ melik rek mer; melik nibak ke yib gak. ¹⁴Nig gek, cin magilsek lim eyañ ap yap pakil, yad niñnek, minim alap, minim yib cin Arameik minim agil, yip agak, ‘Sol! Sol! Yip tari ginig per gi timel geban? Nep per kanib tep yomnim, apin ak pen nak yad eip pen pen geban ak, nep ke yur adik ñeb,’ agak.

¹⁵“Agek, yad agnek, ‘Bi Kib, nak bi an?’ agnek.

“Agenek, Bi Kib agak, ‘Yad Jisas, yip per gi timel geban ak nep agebin,’ agak. ¹⁶Nib agil yip agak, ‘Pen miñi nak warikan! Yad nep minim agnig

opin. Nak wög gi ñeb bi yad midil, yip miñi udin niñeban ak abe, yad nep kisen yomnigain ak abe, bin bi ognap okok kirop ag ñinigan. ¹⁷Yad nep ag yoken, nak amil Juda bin bi okok abe, Juda bin bi mer okok abe ag ñek, nep gi timel gel niñlig gi, nep kod midil tig asik yoknigain. ¹⁸Nak minim tep yad kirop ag ñek, udin kwoi midebal ak, udin ñil niñnigal. Nak minim tep yad kirop ag ñek, kislim okok midebal ak, kirig gil melik onigal. Nak minim tep yad kirop ag ñek, Seten kilis won ne mok okok midebal ak, kirig gil God nop onigal. Niğ genigal, tap si tap timel gipal okok, Bapi niñil kirig gek, bin bi ned yip niñ dipal okok eip kausek komiñ midenigal,' agak.

Pol God nop wög goligip minim ak agak

¹⁹“Pen Kiñ Agripa. Yad nigrikep karip lim seb kab ar alañ siñak nib apil minim agak niñnek nibak ma kirig ginek. ²⁰Damaskas amil, bin bi nib okok kirop minim tep nibak ag ñinek. Kisen amil Jerusalem bin bi kirop ag ñil, karip lim Juda bin bi midebal okok magilsek kirop ag ñil, Juda bin bi mer okok ag ñil, ginek. Kirop ag ñil agnek, ‘Tap si tap timel gipim ak, tari ginig nig gipin, agil, kirig gil, God nop nokim niñ dil, tap timel okok bir kirig gipin ak niñnimel, agil, God ageb rek nep ginimib,’ agnek. ²¹Yad niğ ginek ak me, ñin alap God sobok gep karip siñak amenek, Juda bi siñaul kiri yip di cici lil, ñag pak linig gelak. ²²Pen God yip per nep kod mideb rek, yad miñi won aul nep siñaul warik midil, minim tep ne ak, bin bi yib mideb okok abe, bin bi yib ma mideb okok abe ag ñilig gi midebin. Minim ag ñebin nibak, ar alap ke mer; bi God minim agep bi okok abe, bi nak Mosis abe, kisen ginigab, agil, ñu kil tiklak minim ak nep ag ñebin. ²³God minim agep bi Aisaia God Minim ñu kil tikil agak, ‘Krais apil, yur dil kimnigab, pen ne bi ned nep kauyan wariknigab ak me, Juda bin bi okok abe, Juda bin bi mer okok abe niñnigal, God kirop ak rek nep di komiñ yoknimiñ rek lip. Niğ ginigab ak, ne kirop melik rek pak ñinigab,’ agak,” agak.

²⁴Pol minim nibak agek niñlig gi, Gapna Pestas minim kib agil agak, “Pol, nak bi minim ar ke ke nipan rek, nabic jin mok nak milep gip saköl ñagil ageban,” agak.

²⁵Agek, Pol pen agak, “Bi pobiñ tep yad Pestas. Yad saköl ñagek ma agebin. Gos niñil niñ tep gil, minim niñid yib ak agebin. ²⁶Yad tari minim agebin aul, Kiñ Agripa ne ke bir niñip. Jisas nop tari tari gil minim tari tari agil gilak ak we gil ma gilak. Misen nep gilak ak me, yad nipin, Kiñ Agripa ne magilsek bir niñip. Niğ gek niñil yad nop pirikil ma agebin, mer,” agak. ²⁷Pol nib agil Kiñ Agripa nop niñil agak, “Kiñ Agripa. Nak bi God minim agep okok minim aglak ak, niñid aglak, agil, gos nipan aka? Yad nipin, minim nibak niñid apal, agil, nipan,” agak.

²⁸Pol nib agek, Kiñ Agripa pen agak, “Pol. Nak yip, minim sikol alap agen, Jisas bi ne alap miden, agil, yip minim nibak ageban aka?” agak.

²⁹Agek, Pol agak, “Minim ulep agnim aka minim par agnim, yad gos nokim alap nep niñil, God nop sobok gil agebin, nak abe, bin bi minim agebin niñebal siñ aul magilsek abe, yad midebin rek midenimib, agil, sobok gebin. Pen yip sen ñon gipal rek nibep lilañ, agil, ma sobok gebin,” agak.

³⁰⁻³¹Pol nib agek, Kiñ Agripa ak, Gapna Pestas ak, Agripa ninai Benis ak, bin bi midelak okok magilsek warikil, sönj amil, aglak, “Bin bi ognap gi timel gel me, minim kib agil, ognap miñ lil, ognap pis nep ñag pak linigal. Pen bi aul tap timel alap ma gip, mer,” aglak.

³²Nib agil, Kiñ Agripa ne Pestas nop agak, “Miñi miñ lep karip kirig gil mis ambkop ak pen ne, ‘Sisa minim kib yad niñnigab,’ agip ak me, miñ midil, bi kib Sisa mideb ak amnigab,” agak.

Pol Rom amnig gi ñig magöb dak

27 ¹Gapna Pestas Pol Rom miñi amnimiñ, agil agek, ami sikop okok kod midep bi kib Julias ak, Pol abe nagiman bi ognap sek abe dil kod midek. Ami sikop nib okok kirop “Empira Ami Sikop Ne” agöligipal.

²Pen ñin nibak, ñig magöb karip lim Adramitiam nib ak, Esia Propins amnig gi, Sisaria am wös gak. Nib ak, ñig magöb nibak dil ñig nab eyañ amninok. Bi taun kib Tesalonaika, Masedonia Propins siñak nib bi alap eip amninok. Yib ne ak Aristakas.

³Minek taun kib Saidon amjakil am wös ginok. Julias ne Pol nop di tep gil agak, “Amil namid namam sikop kirop niñil, nep tap tari ma midonimiñ okok nep ñinimel,” agak. ⁴Pen cin Saidon kirig amnig gil niñnok, yigen kib yib ak apil, ñig solwara ak abe pag apek. Nig gek, karip lim ñig tib kis gak airan Saipras pis kid amninok. ⁵Nig gil, amil amil Silisia Propins sil gil, amil karip lim Pampilia sil gil, am Lisia Propins amil, taun kib Maira amjakil wös ginok. ⁶Amjak wös gil, ami bi kib bi nagiman okok kirop kod midek ak niñak, ñig magöb Aleksadria nib alap karip lim Itali amnig gek. Nib ak, ne cinop agek, ñig magöb nibak amninok. ⁷Ñig magöb nibak amil, ñig nab kib eyañ amil, sisain sisain nep koslam amil amil taun kib Kinidos amjaknok. Pen yigen kib ma apek niñil yipid gil ameb rek ma lak. Nib ak me, pis kid nep amil amil karip lim Salmoni sil gil, karip lim ñig tib kis gak airan Krit beñ kid jus dil, ⁸koslam amil amil karip lim sikol ñig gol siñak alap, “Ñig Magöb Mid Tep Gep Kau,” agöligipal, amjakil siñak wös ginok. Karip lim nibak Lasia taun ulep siñak.

⁹Cin nig gil, sisain sisain nep gi ajon niñlig gi me, Juda bin bi tap ma niñeb ñin ak ap padikek, ñig solwara kib pag owep ñin ak bir owak.

¹⁰Pen Pol ne kirop agak, “Bi ognil. Ameb rek ma lip rek, amenigabin ak, tap wis wad tap okok magilsek timel gil, ñig magöb abe timel gek, cin magilsek ñig niñjin rek lip,” agak. ¹¹Pol nib agak ak pen, ñig magöb bi

wög gelak kod midek bi kib ak abe, bi ñig magöb nap nib ak abe, minim ke agerek niñil, ami bi kib Julias, Pol minim kirig gil, minim kirop ak dak. ¹²Bi koñai nep aglak, “Karip lim aul karip lim timel. Yigen kib dip ñin aul, karip lim timel nibaul ma midojin; Piniks ulep mideb siñak am midojin. Yigen kib apeb ñin ak, ñig magöb dam karip lim nibak lon, timel ma ginimiñ,” aglak. Piniks taun nibak, karip lim ñig tib kis gak airan Krit mideb. Ñig magöb Piniks apoligip ak, yigen kib pib apeb pis ken apenigab ak, ñig magöb kapkap pib pañid ameb pis ken amnigab; pen yigen kib pib pañid ameb pis ken apenigab ak, ñig magöb kapkap pib apeb pis ken amnigab.

Yigen kib apil, ñig solwara pagak

¹³Pen kiri nib agel, siñak midonok niñlig gi, yigen sikol sikol apek ak niñil, “Miñi amil amnigabin,” agil, bi ñig magöb wög gelak okok, aga yoklak ak lip gi dil, karip lim ñig tib kis gak airan Krit ñig gol ar siñak amninok. ¹⁴Ñig gil amon niñlig gi, dai asad kib yib, airan Krit pis kid nib, ñig magöb amnig gonok pis ken apil, ñig magöb tig jinomno gak. ¹⁵Ñig gek, bi ñig magöb wög gelak okok niñil, dad yipid gil amnin, agil, gi mer niñil, kirig gel, cinop sek dad ñig solwara nab kib okok dad amnak. ¹⁶Yigen nig gil dad amek, amil amil karip lim ñig tib kis gak airan sikol Kauda apal ak, pis kid alap amonok niñil yigen kib apek ak ulekak. Ñig gek niñlig gi, agnok, “Yigen sikol apeb rek, ñig magöb sikol bad ak dil, ñig magöb kib migan ak di lin,” agil, koslam yib di linok. ¹⁷Ñig magöb sikol bad ak di li tep gil, ñig magöb kib ak pipag ginimiñ rek lip, agil, ñig magöb okok nib okok nib nag ñon gil, lip gi li kilis gilak. Pen, “Yigen kib apeb aul, ñig magöb cin ak dam kab kilip Sötis apal okok amil, kab kilip timel ak piñ lek, timel ginigab,” agil, sel ñon gilak ak wisib yokel, jel gek piriklig gi amninok. ¹⁸Yigen kib ak aplig gi midek ak me, minek ñig magöb ak auan amnan, agil, wis wad tap okok di ñig yoklak. ¹⁹Minek ak, ak rek nep, yigen di nep midek ak me, tap tari tari ñig magöb mid tep gan, agil, karip migan lel midek ak, magilsek niñebir di ñig eyañ yoklak. ²⁰Pen cin per per pib gap okok ma niñoligipin, mer. Yigen ak nig gil dilig gi nep midek ak me, gos alap niñil, agnok, “Karip lim alap ma amnigabin; kim saknigabin,” agil, gos niñnok.

²¹Pen milek par kiri tap magil ma ñibeligipal. Kisen Pol midelak nab siñak warikil agak, “Bi ognil, minim yad agnek ak nipkep rek, cin airan Krit nep midil, wis wad tap okok di ñig eyañ ma yokpno. ²²Pen yad nibep agebin, miñi gos par ma niñnimib; gos sek midenimib. Cin alap ma kimnigabin. Ñig magöb ak nep pis nep timel ginigab. ²³Yad God nop wög gi ñeb bi ne midebin ak me, miñi kislím eyañ God ejol ne alap ag yokek, apil yad midesin ulep siñak apil yip agip, ²⁴Pol, nak ma piriknimin! Midil, nak bi kib Sisa mideb siñak amil, minim kib niñnigan. Pen bin bi

ñig magöb karip migan midebal okok, God kirop ak rek nep kod midek ognap ma kimnigal. God ne nep yimig niñil, komiñ midep magil kiri ak nep ñib, agip. ²⁵Ñib ak, bi ognil, nibi ma piriknimib; gos sek midenimib. Yad nipin, God nop niñ dipin ak, ne ageb rek nep ginigab. ²⁶Pen cin amil amil, karip lim ñig tib kis gak airan alap amon, ñig magöb kab kilip piñ li wös ginigab,” agak.

Ñig magöb pis nep timel gak

²⁷Pen yigen ak cinop nig gil di damek damek ñin akniñ wajrem pis kid adañ amek niñlig gi kislím eyañ me, ñig solwara Edriatik, apal ak, nab siñak amlig gi, bi ñig magöb wög gelak okok, gos alap niñil, ulep karip lim alap apjaknigabin rek lip, aglak. ²⁸Kiri gos nibak niñil, kab kilip ulep ulep mideb aka agil, tap ñig li nipal alap lil niñlak par kib kib 40 mita midek. Yokop sikol sikol magil alap amil, tap nibak kauyañ lil niñlak 30 mita midek. ²⁹Ñig gek, cin kab kib salai ar siñak amjin rek lip, agil, pirikil, aga omal omal yoklak niñil, ñig magöb kilis gak. Kilis gek niñlig gi, God nop sobok gil aglak, “Karip kasek tikil piñ lañ,” aglak. ³⁰Pen bi ñig magöb wög gelak okok, karip lim ñig tib kis gak airan nibak yokop ulep nib siñak amniñ, bin bi okok niñ midelak rek, esek wai ñil aglak, “Ñig magöb sikol ak dam ñig magöb nabic pis ar yokil, aga ognap sek yokin,” aglak. ³¹Kiri esek nig gel niñlig gi, Pol niñil, Julias ami bi ne okok eip kirop agak, “Bi ñig magöb wög gebal aul, kiri ñig magöb sikol ak dil pirik gi amenigal ak, nibi magilsek kim saknigabim,” agak. ³²Pol nib agek, ami bi okok, ñig magöb ñig eyañ yokniñ gelak nag ak, pis nep tib gi rik gi yokel, ñig nab eyañ yowak.

³³Pen miñab tikniñ gak magil ak, Pol kirop agak, “Ñin akniñ wajrem pis kid adañ ak (14) gos par niñil, tap magil ma ñibil, yokop nep midebim. ³⁴Ñib ak, miñi tap ognap niñim. Mer ak, nibi titi gil midenigabim. Bin bi nokim alap nabic kas nokim alap ma yonigab,” agak. ³⁵Pol nib agil, bred ognap dil, kiri midelak nab siñak God nop tep agil, ti pañil, tap ognap niñak. ³⁶Pol ne ñibek niñlig gi, kiri ak rek nep cibur tep gek, tap ognap di niñlak. ³⁷Cin mañ ñin juil akniñ wajrem pis kid adañ (276) bin bi ñig magöb migan nibak midonok. ³⁸Pen tap ñib sakil, ñig magöb auan amnañ, agil, wid midek okok di ñig eyañ yoknok.

³⁹Miñab tikek niñlig gi, karip lim nibak niñnok. Pen bi ñig magöb wög gelak okok karip lim nibak tari, agil, ma niñlak. Pen kiri niñlak, ñig solwara oñid pak sak amnak ak, kab kilip tep nep midek kid ak me, aglak, “Ñig magöb ar nibak yipid gil amnigabin,” aglak. ⁴⁰Ñib ak, ñig magöb aga yoklak nag okok pis nep tib gi rikil, ñig magöb pis pis lilak stia omal wisib yeplil, sel kib ak wisib lilak ak kauyañ dap ran ñon gil, pañdilak. ⁴¹Amil amil me, ñig magöb milik dai ak, kab kilip ar ak piñil, paklig gi kilis gak. Nig gil paklig gi kilis gek, ñig solwara ak pag apil, ñig magöb cimgan dai pis nep pag jisipik masipik gi dad amnak.

⁴²Nig gek, ami bi ognap apil, bi kib kiri Julias nop aglak, “Ñig magöb aul timel geb. Bi nagiman okok pirik gi amel, cinop ag ginigal. Nib ak, kirop ñag pak lin,” aglak. ⁴³Nib aglak ak pen Julias, Pol nop gos niñil, kirop mer agil, agak, “Bi ñig kas parik nipal okok ned ñig kas parik amnilañ. ⁴⁴Kisen bi ñig kas parik ma nipal okok, mab bog dai dai okok dil, di cici lil amnilañ,” agak. Agek, agak rek nep ginok. Bi alap ñig ma ñijnok; magilsek komiñ amninok.

Pol karip lim Molta am midek

28 ¹Pen cin karip lim ñig tib kis gak nibak amninok, bin bi nib okok midelak okok cinop aglak, “Karip lim aul Molta,” aglak. ²Nib agil, cinop dil gi tep gilak. Cinop miñab pak kalau gak rek, cinop di tep gil, mab dap dagilel, mañil tep ginok. ³Pol pen amil mab lek lek ognap yiprig dapil dagilek niñlig gi, kodal alap mab lek lek dapek nab nib siñak midek ak me, piboñ gek, ap ranil Pol nop ñinmagil kid ak su i sek lak. ⁴Nig gek, bin bi karip lim nibak midelak okok niñil, kiri ke aglak, “Bi nagiman aul gi timel gip rek komiñ amnimiñ rek ma lip. Ñig solwara nab siñak midlig gi, ñig magöb ak timel gek ma kimib ak pen miñi kimnigab,” aglak. ⁵Nib aglak ak pen Pol ñinmagil ne ak pipal pakek, kodal nibak yapil, mab yinak. Pen Pol nop tap alap ma gak. ⁶Nig gek, bin bi nib okok kiri ke aglak, “Bi aul nop kodal suip ak su ginimiñ aka su ma gek kasek kimnimiñ,” agil, tapin nep niñ midelak. Pen nig gi niñ midel, nop tap alap ma gak, mer. Kiri niñil, aglak, “Bi nibak bi yib alap mer; ne god alap,” aglak.

⁷Pen bi kib karip lim nibak kod midek ak yib ne ak Pablias. Karip lim ne ak ulep nib siñak midek ak me, cinop dad karip ne ak amil, ñin omal nokim kod mid tep yib gak. ⁸Bi kib nibak nap ne ak miñ goñ ne ak, mab rek yinil, cib yipil gil, kim midek. Pen Pol ne Pablias nap nop niñil, God nop sobok gil, nop ñinmagil lek niñlig gi, tap gak nibak pis nep komiñ lak. ⁹Nig gek me, bin bi karip lim nibak tap gak okok peyig niñil apel niñlig gi, Pol ne God nop sobok gek, kirop komiñ lak. ¹⁰Pol nig gek me, cinop kod mid tep yib gil, ñig magöb dil amnig gonok ñin ak, tap tari tari ma midek okok cinop abramek ñilak.

Pol taun kib Rom amjakak

¹¹Pen karip lim nibak, ñig magöb Aleksadria nib alap, ak rek nep ap midek. Ñig magöb nibak yib ne ak “Ñi Tam” aglak. Ñin nibak yigen kib dep ñin ak owak ak me, ameb rek ma lek, nib siñak midek. Cin abe karip lim nibak midon, takin omal nokim yowak. ¹²Pen yigen kib ma owep ñin ak, ñig magöb Ñi Tam nibak amil, taun kib Sairakius amjakil wös ginok. Amjak wös gil, ñin omal nokim nib siñak midonok. ¹³Ñig magöb nibak nep dil, Sairakius kirig gil, taun kib Regium amninok. Minek yigen kib

alap kid ken apil, ñig magöb ak dil, kasek amek me, ñin omal nep ñig nab sijak midil, Putiolai taun amjakil wös ginok. ¹⁴Karip lim nibak bin bi Jisas nop niñ dilak ognap midelak ak me, cinop aglak, “Cin eip kin midil, amnimib,” aglak. Agelak, kirop eip ñin aknib ar onjid kin midil, “Rom amnin,” agil, pañdinok. ¹⁵Pen Rom bin bi Jisas nop niñ dilak okok, “Pol bi ñon onigal,” agel, niñil, ognap ap cinop Apias Maker nab sijak nabiñ paklak rek, ognap ap cinop Karip Kineb Omal Nokim midek karip lim sijak nabiñ paklak. Pol kirop niñek, cibur ne tep gek, God nop tep agak. ¹⁶Pen cin amil Rom midonok, gapman bi kib ak Pol nop agak, “Karip nak alap ke kinmin,” agak. Nib agek, Pol ne karip alap piyo niñil kin midek niñlig gi, ami bi alap nop kod midek.

Pol Jisas minim tep ak taun kib Rom sijak ag ñak

¹⁷Pol ñin omal nokim midil, Juda bi kib karip lim nibak midelak okok kirop sik agek, ap mogim gelak, agak, “Mam sikop. Yad bin bi cin okok tap timel alap ma gil, apis based sikop minim aglak ak ma tib jupin ak pen Juda bi kib Jerusalem nib okok yip di cici lil, dam Rom gapman bi kib nib okok kirop ñilak. ¹⁸⁻¹⁹Rom gapman bi okok yip minim kib agil niñlak minim wagin alap ma midek. Cin nop ñag pak lijin rek ma lip aglak. Nib ak, yip, wisib yokin, agil, niñlak ak pen Juda kai midelak okok kilis yib gil, yip kauyañ minim kib aglak. Nig gel me, yad agnek, ‘Sisa ne ke minim yad ak niñnigab,’ agnek. Pen yad bin bi yad Juda okok kirop minim alap agniñ ma opin. ²⁰Pen cin Juda kai Bi Kib nop gos sek kod midobin minim tep ne ak nep ag ñen, yip miñ lipal aul. Minim nibak agniñ me nibep sik agen opin,” agak.

²¹Pol nib agek, nop pen aglak, “Bi karip lim Judia nib nib okok, aul apil aka mij ñel apek, minim timel ognap nep agel, ma nipin. ²²Pen cin nipin, Juda bin bi okok okok magilsek apal, ‘Bin bi gos nak niñan rek nipal okok, bin bi tep mer,’ apal. Nib ak, nak minim nak ke agek, cin ke niñin,” aglak.

²³Pen kiri nib agil, ñin alap minim agnigabin, agil, ag lilak. Ñin ag lilak nibak nep, bin bi ned olak rek mer, bin bi koñai yib nep Pol midek karip ak kislim sek nep ap mogim gilak. Nig gil, ap mogim gel niñlig gi, Pol ne, God bin bi diniñ gil, Ñi ne ag yokek, Kiñ rek owak minim ak ag ñiniñ, Mosis abe, bi God minim agep bi okok abe, birarik nep Jisas nib nib gil ginigab, agil, ñu kil tiklak minim ak kirop ag ñak. Jisas minim ak agen niñlan, agil, Pol minim nibak ag midek niñlig gi, pib pañid amnak. ²⁴Pen minim agak nibak, ognap agak rek niñ dilak pen ognap ma niñ dilak. ²⁵Pol bin bi ma niñ dilak okok kirop agak, “Birarik nep Kaun Siñ ne Aisaia nop goñ lek, apis based kiri okok kirop minim niñid yib agak. ²⁶Minim nibak Aisaia ne God Minim dai alap ñu kil tikil agak,

‘Juda bin bi okok kirop amil agninin,

“Minim agnigal niṅnigabim ak
pen minim agip ak, agil, ma niṅnigabim.

Udin niṅnigabim ak
pen tap alap ma niṅnigabim.

27 Bin bi siṅ aul minim yad agebin ak
kirop yirik gek ma niṅebal.

God Minim niṅon, cinop gek,
bin bi ne midojin rek lip agil,
timid piliṅ gil, udin jikil nep midebal,” agninin,’ agak.

28 “Nib ak, Juda bin bi siṅ aul niṅim! Nibi Juda kai, God minim tep ak
kirig gipim rek, ne agek, minim tep nibak Juda bin bi mer migān ognap
amnigab niṅil kiri minim nibak dinigal,” agak. 29 Pol kirop minim nibak
ag dai juek niṅlig gi, Juda bin bi okok kiri ke amlig gi, pen agek pen agek
gilig gi amnilak.

30 Pen Pol taun kib Rom kin midoligip karip ak taulig gi kin midek, mi
omal yinak. Bin bi nop niṅnig apeligipal okok kirop magilsek ag wasu
dil, di tep goligip. 31 Bin bi nop apeligipal okok, God bin bi dinig gi, Ñi
ne ag yokek, Kiṅ rek owak minim ak kirop ag ñil, Bi Kib Jisas Krai
minim tep ak ag ñil, goligip. Ne niṅ gek, Rom gapman bi kib okok nop
ma ag gilak ak me, bin bi okok kirop minim kilis gi agil, yipid gil nep ag
ñoligip.